

Matye-á nìvìnì tir nê wārku Yesu tyí soko

Yesu Krista duku wìl-nsahlɛ

¹ Yesu Krista sùtó náhkì yó ye lésõ Davidilɛ,
Davidi sùtó náhkì yó mɛ Abrahmɛnɛ. Yesu
Krista mèn náh tãn nónó-á ku soko, pé yni wɛ yò:

² Abrahmɛ mènɛ, Yisakɛ sù ye. Yisakɛlɛ,
Nsyakobɛ sù ye. Nsyakobɛlɛ, Nsyuda sù ye, ñmo
nê-á n ðínpi soko yóɛ.*

³ Nsyudalɛ, Peresɛ ànê Nsera sù ye, té Tamar
mɛ pé yúɛ. Peresɛlɛ, Yɛsrɔnɛ sù ye. Yɛsrɔnɛlɛ,
Wramɛ sù ye.

⁴ Wramɛnɛ, Yaminadabɛ sù ye. Yaminadabɛlɛ,
Nasõ sù ye. Nasõnɛ, Salma sù ye.

⁵ Salmalɛ, Bowasɛ sù ye, té Bowasɛ yú mɛ
Wrahbɛlɛ. Bowasɛlɛ, Wobɛdɛ sù ye, té Wobɛdɛ
yú mɛ Wrutilɛ. Wobɛdɛlɛ, Nsyese sù ye.

⁶ Nsyeseɛlɛ, yòtɛ ðí Davidi sù ye. Yòtɛ ðí
Davidilɛ, Salomo sù ye, té Salomo yúɛ, Yuri
lékókè kyɛ ye lésõ.

⁷ Salomolɛ, Wroboyam sù ye. Wroboyamɛ,
Abya sù ye. Abyalɛ, Asaft sù ye.

⁸ Asaftɛlɛ, Nsyosafatɛ sù ye. Nsyosafatɛlɛ,
Nsyoram sù ye. Nsyoramɛ, Wosyasɛ sù ye.

* **1:2** 1.2 - Nsyakobɛ ðínpi ye Yisrayel no yìkìni gbõninó súbilɛ.
Yah n tɛ Yenesɛ 46.8-21.

⁹ Wosyasıle, Yotam sú ye. Yotamne, Asyası sú ye. Asyasıle, Yesekyası sú ye.

¹⁰ Yesekyasıle, Manası sú ye. Manasıle, Amo sú ye. Amole, Nsyosyası sú ye.

¹¹ Nsyosyasıle, Yekonya sú ye, ñmɔ nê-á ñ dínpi sɔkɔ yóle. Té légbí ye sò pè me Yisrayel no kyĩ mɔ à pè tẽ sɔkɔ Babilonu yamana sɔkɔ.†

¹² Képah náh, Salatyelɔ dubi, ñmɔ nê-á Yekonya píđine. Salatyelɔle, Nsorobabelı sú ye.

¹³ Nsorobabelɔle, Abiyudi sú ye. Abiyudile, Yelyakimi sú ye. Yelyakimine, Asorı sú ye.

¹⁴ Asorıle, Sadokı sú ye. Sadokıle, Asyimi sú ye. Asyimine, Yeliyudi sú ye.

¹⁵ Yeliyudile, Yeleyasar sú ye. Yeleyasarle, Matã sú ye. Matãne, Nsyakobı sú ye.

¹⁶ Nsyakobıle, Nsyosefu sú ye, nê-á Mari pele. Mari mè ye sò dubi Yesule, nê-á pè n ye Kristale, Liyel ney yáhntokɔnɔle.

¹⁷ Knɔ knɔ nóno pól-á we sɔkɔ, sè we yò: A tɔkɔ Abrahamı gbĩ tyí, pópó à pɔ syı Davidi gbĩ tyí, knɔ knɔnɔ gbõnyáh ye we sɔkɔ. A tɔkɔ Davidi gbĩ tyí, à pɔ syı Yisrayel no tẽnsokɔnɔ tyí Babilonu yamana sɔkɔ, knɔ knɔnɔ gbõnyáh ye tɔ we sɔkɔ. Té à tɔ tɔkɔ Yisrayel no tẽnsokɔnɔ tyí Babilonu yamana sɔkɔ à pɔ syı Krista gbĩ tyí, knɔ knɔnɔ gbõnyáh ye we sɔkɔ.

Yesu Krista dubi dükùle

¹⁸ Yesu Krista dubi dükù we yò: N yú Mari sò me gbínóle Nsyosefu tyí. Nte pèkì náh sò we

† **1:11** 1.11 - Yah n te 2 Yõtãm 24.12-16.

yah pé wró, té kè pɔ we Mari me kúrkile Liyel Mirki gbõ yõ.

¹⁹ Té ñ pe Nsyosefulé, négbí ye sò ñne. A náh sò me ké tyí ne pé Mari yĩn yíkí névyé yí yah. Képah ye à kè yah tɔkɔ ne, páh kɪ à yahle sètĩn sò sɔkɔ.

²⁰ Wǎh me képah sɔnɔ sɔkɔ, Tě ñgbě Liyel yĩnyõ tɔnpi yó pɔ wil ñ yah dékí sɔkɔ, té yo ñ tyí ne: «Davidi pídí Nsyosefu, káh tíkí pi á kyi Mari fúrnóle. A náh we di, Liyel Mirki gbõ yõ ye à tɔkɔ kúrkĩ mènne.

²¹ A kɪ pídí dubi nê-á kɪ ñ no pwah n mɔ n pi pé tyípêl sɔkɔ. Képah ye, á kɪ ñ yĩn sah Yesule.»‡

²² Tě ñgbě Liyel-á lésõ ñ tẽntõ syĩnyo-ò kõ à tyi nónó yo sah, sépi wil yĩn ye tyi nópi pól kõ sè pi. A lésõ ne ñkě:

²³ «Yah, dí pí-ñkě sê kɪ kúrkĩ tɔkɔ. A kɪ dĩnpir yó dubi, té ñ yĩn kɪ sah Yemanuwelile, nê kór-á: Liyel me ápile.»§

²⁴ Nsyosefu-á pɔ dɔ yuku, Tě ñgbě Liyel yĩnyõ tɔnpi-á tyi nónó yo ñ tyí, à sè pi. A ñ kyi Mari fur.

²⁵ Nte pèkì náh we yah pé wró, fóó Mari syi pɔ pídí mè dubi, té Nsyosefu me ñ yĩn sah Yesule.

2

Nwǎ kèpye sɔkɔ tyi pnèpu kyínyahnóle Yesu tyí

‡ **1:21** 1.21 - Wáh noh pàh ne Yesu-á, ké kór ye pwáhnmo-òle.

§ **1:23** 1.23 - Yah n te Yesayi 7.14.

¹ Yesu dubi Betlemu kwil soko, Nsyude sétáh yõ, gbí nê-á lésõ yõtõrí me yõtë dí Yerõdu gbõ. Yesu-á dubi sê, n̄wõ kèpye soko tyi pnèpu me wil gbìngbokele, à pɔ Yerusalemu kwil soko,

² té me píkinyahnɔ pi ne nkê: «Nsyifuno yõtë dí nê-á dubi, à me n̄yāh soko? Api me gbìngbokele té n̄ n̄wõ kèpil we kè wil. Képah ye á ne á pɔ gbílkinó sah n̄ yõ.»

³ Yõtë dí Yerõdu-á képah tẽ noh sê, kè n̄ foko fẽki ànê Yerusalemu tân pólle.

⁴ Kǎh pi sê, à me sárká syínwilkipu yõtām ànê Liyel tyi kònsàhnó kwópú pól ye tuke, té pè piki yah ne nkê, n̄yāh soko se Liyel ney yáhntokono yĩne à pɔ dubi ni?

⁵ Pè me yo n̄ tyí ne: «Betlemu soko ye, Nsyude sétáh yõ. Á náh we di, Liyel lésõ n̄ tẽntò syinyo-ò kò à kè wǎrki sah ne nkê:

⁶ «Áwɔ Betlemu kwil nê-á Nsyude sétáh yõ, á náh me fõrɔɔ Nsyude sétáh yõ kwlo n̄gbno soko dé. Yah, névyè yah tẽ-ò yó ki pɔ n̄ dubi n̄ pi á soko, nê-á ki n̄mɔ no Yisrayel tẽnó ple n̄ pi.»*

⁷ Képah tẽne, Yerõdu me n̄wõ kèpye soko tyi pnèpu wõbi ye à pɔ pè piki yah pi, gbí nê tótó-á pè we n̄wõ kèpil mène.

⁸ Képah náh, à pè tekɪ mɔ Betlemu soko, té yo pé tyí ne, pàh ki kyɪ, pè píkinyahnɔ pi palle piri mè tyí soko, pàh ki à we, pè pɔ kè yo pé tyí, péwɔ tɔ kò pé kyɪ gbílkinó sah n̄ yõ.

* 2:6 2.6 - Yah n̄ tɛ Mise 5.1.

9 Yõtë dí Yerodı-á welo nópi yo te pé tyí, pé me wëkì tẽ. Páh wëkì tẽ, nıwõ kèpil nê-á sò pé we té me gbìngbokele, pé tã kè we pé yah fìnne kè n yuku péle, pópó à kyı yĩn piri mé-ńsah yõtah sírr soko.

10 Nwõ kèpil mè tɔnwenole, kè pé nı kah vı.

11 Pè me de gbô, té piri we ànê n yú Marile. Képah tẽne, pé pé gbètukuno di piri mè yah à gbílkinó sah n yõ, té pé vyó yey ykı mo à sán, ànê wòkò yõ yõ kwâh pãn pènèkì yó, ànê làsèkwèl pãn pènèkì yó wilki sé soko, à pèporı pı piri tyí.

12 Képah náh, Liyel gbáhdyâh yó di pé tyí dékí soko ne, pé káh pé syı yuku Yerodı fìnne. Káh pı sê, pé me wëkì káhkí yó tẽ, à pé syı soko pé kwil soko.

Nsyosefu ànê n no tónsokónole Yesyipti yamana soko

13 Nwõ kèpye soko tyi pnèpu-á pé syı soko, Tẽ ñgbê Liyel yĩnyõ tɔnpı yó me wil Nsyosefu yah dékí soko, té yo n tyí ne: «Yõtë dí Yerodı kı piri mè soh n kã n pi núkúnúku n ko n mo n yĩnne. Képah ye, yuku piri mè tẽ ànê n yúne, n to n soko péle Yesyipti yamana soko, n kyı n tẽ nénpó, pópó kı pɔ n nɔ ní yónmɔno tyí á tyí.»

14 Képah tẽne, Nsyosefu me yuku kéne lékâhne, à piri ànê n yú tẽ pé soko Yesyipti yamana soko.

15 Pè kyı tẽ nénpó, pópó Yerodı syı pɔ ku. Káh pı sê, Tẽ ñgbê Liyel-á lésõ n tẽntõ syınyo-ò kã à

nê yo sah ne: «Mé í Pídí ye yal Yesyipti yamana soko.»† kè kɪ wil.

Betlemu wɛnpì yrɔ̀ kònmmɔ̀lɛ

16 Yerɔ̀dɪ-á pɔ̀ pĩ ne íwɔ̀ kèpye soko tyi pnèpu-á pé vi tɛ́, ò foko kah vyãh. Té wãh lésõ íwɔ̀ kèpil mè wil gbí we noh soko te íwɔ̀ kèpye soko tyi pnèpu tyí sɛ́, à núkú ne pè kyí Betlemu kwil ànê ké gbòplɔ̀ kwlo wɛnpì pól ko mɔ̀, nónó-á pè nãh kah ye nínó nínólɛ.

17 Képah soko, Liyel tɛ́ntò syínyo-ò Nsyeremi-á lésõ né yo sah, kè wil. A lésõ ne íkɛ́:

18 «Yĩnpɔ̀ yó me n doko Wrama kwil soko, nê-á pò gbónó ànê yãm yãm tyi kàhnpínólɛ. Arasyɪɪ ye n gbo ò wɛnpì yĩnne.

Pè ye yah kwlo, képah ye à nãh me fàlnó tyí.»‡

Nsyosefu ànê ò no kyíntɛ́nólɛ Nasaretɪ kwil

19 Yerɔ̀dɪ kúntenɔ̀ nãh, Tɛ́ ògbɛ́ Liyel yĩnyõ tònpi yó wil Nsyosefu yah dékí soko Yesyipti yamana,

20 té yo ò tyí ne: «Nónó-á sò n yah n kò piri mè kònmmɔ̀-ísahle, pè ku te. Képah ye, yuku piri ànê ò yú tɛ́ n soko Yisrayel sétáh yõ.»

21 Képah soko, Nsyosefu me yuku piri ànê ò yú tɛ́ pè soko Yisrayel sétáh yõ.

22 Té wãh pɔ̀ noh ne Arsyɪlawusi-á tɔ̀ko Nsyude mara yòtòríle ò sú Yerɔ̀dɪ swɔ̀, tíkí à tɛ́

† 2:15 2.15 - Yah n te Wose 11.1. ‡ 2:18 2.18 - Yah n te Nsyeremi 31.15.

kyínóle nénpó. Nte Tě ñgbě me yo mo ñ tyí dékí soko. Képah soko, à me soko Kalile mara soko,[§]
²³ à kyí tě ké kwil yó soko, nê-á pè n ye Nasaretile. Tě ñgbě Liyel-á lésõ ñ tẽntõ syínyopu kõ pè tir nê yo sah, képah wil yĩn ye tir mè kõ kè pi. Pè lésõ ne níkě: «À kɪ n ye Nasaretɪ neyne.»

3

Wèlnwìlkì-ò Nsyõ me Liyel weyne n yo

¹ Légbíne, Wèlnwìlkì-ò Nsyõ pò Nsyude mara gběnni soko, à pò tyah Liyel weyne n yo.

² A sò me yo tũ ne: «Yé yé tyípèl pínó yal mo. Yé náh we di, Liyel tǒrí me yĩni tẽ te.»

³ Liyel tẽntõ syínyo-ò Yesayi-á lésõ nê yo sah ne níkě: «Ñnî yó yĩnpõ me n dokò gběnni soko ne níkě: <Yé Tě ñgbě wěkì tǒ sah. Yé ñ sókó-ńtân pi tómtóm.» Nsyõ yĩnpõ tyí ye lésõ à n yo.

⁴ Yàhmíkì yè fwòmòni ye sò Nsyõ wil, té à me ñ syĩ tẽ sêl kòle. Sègblo ànê syĩri ye sò ñ yòkele.

⁵ Képah tẽne, Yerusalemi kwil tãn, ànê Nsyude mara pól névyè, ànê Nsyurdě yo gběnyah pól névyè sò me n wil n pò ñ tyí.

⁶ Pè sò me pé tyípèl pínóle n yo n pò no pól yĩ yah, té Nsyõ me péle n wel n wilki Nsyurdě yo soko.

⁷ Képah soko, Nsyõ-á kè we Farisi wěkì kópú ànê Sadusi wěkì kópú náhnáh me n pò n pò à

§ 2:22 2.22 - Nsyude mara ànê Kalile mara sò me Yisrayel sétáh yõ.

kõ à péle n wel n wilki sě, à me yo pé tyí ne, wáhn míró dùkù nópi! Nê se kwɔ péle ne pǎh kɪ fě to pwah Liyel fòkònyǎhni yah, nê-á n pi ni?

⁸ Pè tyí péplɔle n pi, nóno-á n wěki n pi ne pǎh pé tyípél pínó yal mɔ.

⁹ Té pè káh we ne páh kɪ n sɔ pé fɔkɔni sɔkɔ ne Abrahami-á pé súle, kápah-á kɪ yíne dé. Páh kéle n yo pé tyí, dyêh nóno-á yò, Liyel-á kɪ fě sè vi mɔ pi Abrahami pyele.

¹⁰ Té man nítê-á me yáhn sáhntenɔle sésân fě yinne sé sémìn sɔkɔ. Séswô nê-à n syí-ńkêne pye pèplɔle, káh kɪ ko min dah mɔ nyàh sɔkɔ.

¹¹ Péwɔ tě wɔ-á péle n wel n wilki ni sɔkɔ, nê-á kɪ kè wěki ne pǎh pé tyípél pínó yal mɔ. Nte névi nê-á kɪ n pɔ n pi péwɔ náhle, tě wɔ těnwɛnɔ-á kal péwɔ tyíle. Páh fórɔɔ kah ñ lékyêh nítě dénóle. Tě wɔ-á kɪ pɔ pè wel wilki Liyel Mirki ànê nyàh sɔkɔ.*

¹² N sèmu kɔ fwo fwo kwâh-á me ñ gbò. Wǎh kɪ ñ táh tǔ sah, kɪ ñ sèmu kɔ fwo, té kɪ ké pórí kwel mɔ dúkúrí sɔkɔ. Nte sé yésyî wɔle, wǎh kɪ sépi suke ní-ńkê nyàh sɔkɔ.

Yesu wèlnwìlkinóle ni sɔkɔ

¹³ Kápah těne, Yesu wil Kalile mara sɔkɔ à pɔ Nsyɔ tyí Nsyurdě yóngbalɪ sɔkɔ, ne pé pɔ à kɔ à pé wel wilki ni sɔkɔ.

¹⁴ Nte Nsyɔ me yahle té ne, péwɔ-á yíne pé pɔ ñmɔ kɔ à pé wel wilki ni sɔkɔ, té ñmɔ pyé pɔ péwɔ tyí ni?

* **3:11** 3.11 - Yah n te Tyípínì 2.1-13.

15 Nte Yesu me yo ñ tyí ne: «Ye kè pi sě ätre. Á náh we di, ké yah ye Liyel-á nê yah kō, ápi kè pi.» Wǎh képah yo sě, Nsyō me fě syi.

16 Yesu wèlnwǐlkintɛno ñsō, à wil ni soko. Nénpó swo yǐnyō yiki mo, té à me Liyel Mirki we kè me n tiki n pi kèpíkípíkí tyí kōle, à po tē ñ yō.

17 Képah soko, yǐnpō yó núkú n wil yǐnyō ne nkē: «Ñmo ñidè Pídí ye yò. Nmo ye ní ñivìni yōle.»

4

Sétàn yòtē-á Yesu tō mo yah òkù nêne

1 Képah náh, Liyel Mirki Yesu tē yuku gběnni soko ne sétàn yòtē à we tō mo yah nénpó.

2 Wǎh sèpìn tikinini ànê lékǎhlónó tikinini pi yōke yó-ńkēne, kweki à tē.

3 Képah soko, sétàn yòtē nê-á tōnmo-òle, ñmo me no de Yesule té yo ñ tyí ne, ñmo-à ki nê Liyel Pídine, à yo dyêh nópi tyí sè vi mo pi yōkele.

4 Yesu me yo ñ tyí ne: «Kè me wǎrkínsàhnóle Liyel wey sébéy soko ne nkē: <Yōke ó náh n pu névile dé. Nte welo nóno-á n wil Liyel vyǎh, sépi ye pyē n pu névile.>»*

5 Képah náh, sétàn yòtē yuku ñne Yerusalemi kwil, à kyi à sah Liyel ní-ńsah gbô yòtah†

* 4:4 4.4 - Yah n te Tōnyono 8.3. † 4:5 4.5 - Liyel ní-ńsah gbô yòtah nê tyí-á n yo ásô soko yò, ké kolo kah métérno gbámne.

6 té me yo n tyí ne, òmò-à kɪ nê Liyel Pídíne, à yòkò n tiki sétáh. A kó we ni, káh me wárkínsàhnóle Liyel wey sébéy sòkò ne níkě, òmò yínnè, Liyel-á kɪ n yínyõ tònpiɓi kǒ sè kɪ à swah syi sé gbǎn sòkò, n gbáhkì kǒ kè náh n mɪ n pi dáhkì tyí.‡

7 Képah sòkò, Yesu me yo n tyí ne: «Kè me wárkínsàhnó tɔle ne: <Káh á Tě ògbě Liyelle n mɔ n yah.>»§

8 Képah náh, sétàn yòtě tǒ sòkò ònne yǒlɪ kèyy yó yǒ, à kyɪ kèkǒyó tǒrí pólle à wèkɪ ànê ké tahrɪe,

9 té yo n tyí ne, wáh kɪ n gbètukunɔ di péwo yah à pé gbilki, páh kɪ sé pólle à kǒ.

10 Képah tǎne, Yesu yo n tyí ne: «Yal n tnô, sétàn yòtě! Kè me wárkínsàhnóle Liyel wey sébéy sòkò ne: <Á Tě ògbě Liyelle n gbilki, n té ne n sah òmò ó tyí yǒ.>»*

11 Képah sòkò, sétàn yòtě me yal n tnô. Yínyõ tònpiɓi me pɔ n tnô, à pɔ n yah n dah n mɔ n tyí sòkò.

Yesu tǒ tyàhnóle Kalile mara sòkò

12 Pè lésǒ Wèlnwìlki-ò Nsyǒ dah mɔ wòkònpèkè sòkò.† Yesu-á kè noh gbí nêne, à n syi sòkò Kalile mara sòkò.

‡ 4:6 4.6 - Yah n te Gbálnó 91.11-12. § 4:7 4.7 - Yah n te Tǒnyono 6.16. * 4:10 4.10 - Yah n te Tǒnyono 6.13. † 4:12 4.12 - Yah n te Matye 14.1-12; Markɪ 6.17-18; Likyi 9.7-9.

13 Té à náh tẽ Nasareti kwil soko. A sò me ky tẽ Kalile yó-̀ngbẽ gbòpo kwil yó soko pè n ye Kapernayumine, Nsabalõ yìkì ànê Nefutali yìkì névye sétáh yõ.

14 Kè ye pi sã, nê-á kɪ Liyel tẽntò syinyo-ò Yesayi tir yónsàhnó mè kò kè kɪ wil. A lésõ ne nkẽ:

15 «Nsabalõ yìkì ànê Nefutali yìkì névye nónó-á me wèkì gbòpo nê-á soko yó-̀ngbẽ tnò, ànê pé nónó-á me Nsyurdẽ yónkahnune, à tahlɪ pé Kalile mara tãn tyí nónó-á pé tókù náh pi Nsyifunole,

16 pépi nónó-á sò me fẽntú soko, pè kyòo ògbẽ yó we. Pépi nónó-á sò me fẽntú soko kũ tíkile pé soko, kyòo yó me we pé tyí.»‡

17 Té à toko gbí nê-á sò Yesu me Kapernayumi soko, à tyah Liyel weyne n yo, me yo tũ ne: «Yé yé tyípêl pínó yal mo. Yé náh we di, Liyel tórí me yini tẽ te.»

Yesu tò sáhpú négbrole

18 Yesu sò me n ko Kalile yó-̀ngbẽ gbòpo soko, té díbí népí ní mí we. Simo nê-á pè yin dyi à kò Pyerile, òmò ye sò ànê ò gbẽndí Andrele. Pè sò me yẽnkyo tẽ tẽ mnole n min yo soko. Yẽnkyo tẽpú ye sò péle.

19 Yesu me yo pé tyí ne: «Yé n sò tẽ. Mé kɪ yé pi névye tẽnpopule Liyel tyí.»

‡ 4:16 4.16 Yah n te Yesayi 8.23 - 9.1

20 Nénpó swɔ, pè núkú pé yěnkɔ tẽ tẽ mɔ sah té ñ sò tẽ.

21 Wǎh tǔ yuku yahle kwéy, à díbí nǐpí ní mí yísyó wɛ. Nsyakí ànê Nsyɔ ye sò, pépi nónó-á Nsebede dínpile. Pè sò me ànê pé sú Nsebedele krótókè sɔkɔ, me pé yěnkɔ tẽ tẽ mɔle n tǔ n sah. Yesu me pé ye yah.

22 Nénpó swɔ, pè núkú yal krótókè ànê pé sú tnô, té ñ sò tẽ.

Yesu névyé kwónó ànê yámpú dénmonɔle

23 Yesu sò me Kalile mara pólle n kɔ n kɔ, me nolé n kwɔ Nsyifunɔ Liyel ní-rítân vî sɔkɔ, me Nìvìnì tirlé n yo Liyel tǔrí tyí yô, té me yámpú pól ànê néfukuló pólle n de n mɔ.

24 Kǎh pí sɛ, Yesu yīn wil Siri yamana pól sɔkɔ. No me tyah n pɔ n pɔ yámpú pólle ñ tyí, nónó-á sò me kwlónó sɔkɔ yam ànê yèvyǎhri duke duke pól sɔkɔ, ànê sétǎn-á sò me nónó sɔkɔ, ànê ñdyìkìnpùbule, ànê wil kúnó névyele, Yesu pé pól de mɔ.

25 Képah tǎne, tówû ñgbě Yesu sò tẽ. Pé tókù sò wil Kalile mara sɔkɔ, tókù wil Dekapoli mara sɔkɔ, tókù wil Yerusalemí kwil, tókù wil Nsyude mara sɔkɔ, tókù me wil Nsyurdě yónkahnine.

5

Yesu-á kwónó nónó pí yǒli yô.

1 Yesu-á tówû wɛ sɛ, à dɔkɔ yuku yǒli yô. Wǎh kɔ tẽ, ñ tǔ sáhpú me nɔ de ñ tnô.

2 Képah sɔkɔ, à me tyah péle n kwɔ ne nkě:

Névye nónó-á me nɔli sɔkɔ

3 «Nónó-á pĩ ne Liyel yétô-á me pé tẽ, pépi tyí nɔ. Pè kɪ Liyel tǒrí nɔli yõ n pi.

4 Nónó-á me gbní sɔkɔ, pépi tyí nɔ. Liyel kɪ pé yéfi kele n pi.

5 Gblɔy tíkínmɔnɔ-á me nónó sɔkɔ, pépi tyí nɔ. Sétáh kɪ pɔ n pɪ n pi pépi tyíle.*

6 Gbɪ wěkì kóló dékè-á me nónó sɔkɔ, á kɪ ne kwekɪ ànê níkì sǒ tẽ péle, pépi tyí nɔ. Páh nêne n yah n kǒ, pè kɪ kè we n dal n mɔ n pi.

7 Nónó-á névye yãmne n yah, pépi tyí nɔ. Liyel kɪ pé tɔ yãm yah n pi.

8 Nónó nno-á me yályál Liyel yah, pépi tyí nɔ. Pè kɪ Liyel we n pi yíne.

9 Nónó gbõ yõ-á yèvɪnɪ n we, pépi tyí nɔ. Pè kɪ n ye n pi Liyel wěnpìle.

10 Nónó-á me fóhnóle n we pé négblo pínó yinne Liyel yah, pépi tyí nɔ. Pè kɪ Liyel tǒrí nɔli yõ n pi.

11 Névye-à yéle n gbyɔ gbí nêne, té yéle n fõh, té yé tyíle n yo n ko à mìnì duke duke pólle n sah yé yõ n mɔ yinne, yépi tyí nɔ.

12 Sě ye lésõ pè fõh Liyel tẽntò syínyopule nónó-á yé dyàh tẽ pɔ sɔkɔ. Yé kɪ ké yõre ñgbě we n pi yínyõ sɔkɔ. Képah ye, yé ne n me nìv̀nì ñgbě sɔkɔ yèsyìkì tẽne.

* 5:5 5.5 - Yah n te Gbálnó 37.11.

Yesu-á kwónó nêne ò tò sáhpú kǒ pne ànê kyòò tyí yǒ

¹³ Yépi ye n nɔ kèkǒyóle, sǒ-á pne pǎnne n nɔ. Nte pne dëndên-à wal ké sɔkɔ, sǒ me kè kɪ tǒ fě pɪ dëndên? Kè náh tǒ fě tir yó pekɪ n pi, à wil mǐlkinó tyí sɔkɔ kégbó, té névye kɪ n kɔ n sɔkɔ ké yǒ.

¹⁴ Yépi ye kèkǒyó kyòòle. Kwil nê-à me mónóle yǒlɪ yǒ, kè náh fě n wǒbɪ n pi dò.

¹⁵ Pè náh fǒtnòle n soh té dúle n kwĩnki n mɔ ké yah. Pè kè sah fǒtnò sahki sɔkɔ, kè kǒ kè n pɪ kyòòle wòkò sɔkɔ névye pól tyí.

¹⁶ Sě ye yé yĩne yè pɪ kyòòle névye tyí, pè kǒ pè yé tyípéplɔ pínó wɛ, pè mó yé Súle n gbilki, nê-á me yĩnyǒ sɔkɔ.

Yesu-á kwónó nêne ò tò sáhpú kǒ tyi kǒnsàhnó tyí yǒ

¹⁷ Yé káh wɛ ne nímo-á pɔ tyi kǒnsàhnó duku kò-nsah, képah náh pɪ Liyel tǐntǐ syínyopu-á kwónó nónó kǒ, sépi duku kò-nsah dé. Mé náh pɔ sé duku kò-nsah, nte mé pɔ sé tyi píndalnmɔ-nsah.

¹⁸ Kègbɪ yǒ mé kéle n yo yé tyí, yĩnyǒ ànê sétáh tǐ-à fyò me, kwáh tyĩ yó, képah náh pɪ kwáhkyĩrí yó nte náh n wilki n pi tyi kǒnsàhnó sɔkɔ, fǒ kɪ pɔ syɪ ké sɔkɔ tyi pól píntenɔ tyí.

¹⁹ Képah ye, névi nê-à n sàh-ñkěne tyi kǒnsàhnó sɔkɔ tir kyĩrí fyé yǒ, té no téló tɔ yǒ yɪkɪ mɔ sǐntǐ pínó sɔkɔ, tǐ kɪ fǒrɔɔ kal Liyel

tǒrí nɔli yǒpú pólle. Nte névi nê wɔ-à n sah sé soko tyíyónó yǒ, té séle nole n kwɔ, tẽ wɔ kɪ yín-ńsah ñgbẽ we Liyel tǒrí nɔli yǒ-ńsah soko.

²⁰ Mé kéle n yo yé tyí, yáh kɪ pí-ńkẽne gbɪ wẽkì kópúle Liyel yah à kal Liyel tyi kònsàhnó kwópú ànê Farisi wẽkì kópúle, yé náh Liyel tǒrí nɔli yǒ n pi.

Yesu-á kwónó nêne ñ tò sǎhpú kǒ fǒkònyǎhni tyí yǒ

²¹ Yé kè noh soko ne kǎh yo á náh tǎn tyí ne, ney káh nékókè mɔ. Névi nê-à nékókè mɔ, tẽ-á yĩne tükèńóle.

²² Nte ñmɔ wɔ kéle n yo yé tyí ne, névi nê-à ñ foko vyǎh ñ ní-òle, tẽ-á yĩne tükèńóle. Nê-à ñ ní-ò ye Nêwòle, tẽ-á yĩne tükèńóle tukey tükèpu tǐnkì tyí. Té nê-à à ye Vínpule, tẽ wɔ-á yĩne dáhnmɔnɔle ní-ńkẽ nyàhnpèkè soko.

²³ Wáh pɔ á yĩ n kǒ kǒ kwáhle Liyel kǒ-ńsah, té á dyɔ to kǒ nénpó soko ne wáh pɪ de á ní-ò yó tyí,

²⁴ á yĩ n kǒ kǒ kwáh sah nénpó, ñ té n kyɪ á wró tǒ n sah á ní-ò mènne, ñ té n pyẽ n pɔ kéle Liyel kǒ.

²⁵ Tir yó kénkǒ-à me yé wró ànê ñnî yóle, té à kyɪ ñ ye tukey tükè-ò tyí, gbah n tẽ ké yah wah yé yínintẽ-ńkẽ soko nénpó. Képah-à pí-ńkẽne, à kɪ kyɪ ále tukey tükè-ò tyí ne à ké yah wah, tukey tükè-ò mè kɪ kyɪ ále sràsýíbí kǒ, té pépi kɪ mó ñ dah mɔ wòkònpèkè soko.

26 Kègbi yõ mé kéle n yo á tyí, á náh n wil n pi nénpó, né á náh kòlì mè pól dyah te pnépné.

Yesu-á kwónó nêne ò tò sáhpú kō fòfíkì tyí yõ

27 Yé kè noh sòkò ne káh me yónóle ne: «Káh fòfíkìle n pi.»†

28 Nte ñmò kéle n yo yé tyí ne, névi nê-à sê yó yah, té yí wil ò tyí, tẽ-á fòfíkì pi te òne ò nu sòkò.

29 Á gbòyò sò yí-à kù nê ò dah n mò n pi tyípékè pínó sòkò, kè gbahlì n wilki n milki ále fíí. Á tékínóle á wil gběnsê fí núkú sòkò, képah kù fónfó kal á wil pól mínndahnmonò yõ ní-ńkě nyàhnpèkè sòkò.

30 Á gbòyò sò gbò-à kù nê ò dah n mò n pi tyípékè pínó sòkò, kè kām n milki ále fíí. Á tékínóle á wil gběnsê fí núkú sòkò, képah kù fónfó kal á wil pól kyíndenò yõ ní-ńkě nyàhnpèkè sòkò.

Yesu-á kwónó nêne ò tò sáhpú kō fúr yíkínó tyí yõ

31 Kè me yónó tole ne, névi nê-à ò kyle n fin n mò, tẽ-á yĩne à ò fínnmonò tàrfyò sébéy pi à kō.‡

32 Nte ñmò tẽ wò kéle n yo yé tyí ne, névi nê-à ò kyí fin mò né fòfíkì tẽ tyí yõ náh, tẽ-á me òne n mò fòfíkì pínó wěkì yõ. Névi nê to-à mó sê fínnmonò tokò, fòfíkì-á tẽ n pi.

† 5:27 5.27 - Yah n te Yálnó 20.14; Tõnyonò 5.18. ‡ 5:31 5.31 - Yah n te Tõnyonò 24.1.

Yesu-á kwónó nêne ñ tò sáhpú kô gblöy wónó tyí yô

³³ Yé kè noh soko tole ne káh yo á náh tãn tyí ne: «Káh ále n wo mìnì tyi soko. Wâh á wo tir nê soko Tẽ ñgbẽ yah, á yĩne ñ kè pi.»

³⁴ Nte ñmò tẽ wo kéle n yo yé tyí ne, yé káh yéle n wo pólle. Yé káh yéle n wo yĩnyõle. Liyel tõrí kô ye kéle, kápah ye yé káh yéle n wo kéle.

³⁵ Yé káh yéle n wo sétáhle. Liyel gbyêh súnsàh-ñsah kô ye kéle, kápah ye yé káh yéle n wo kéle. Yé káh yéle n wo Yerusalemune. Yõtẽ ñgbẽ Liyel kwil ye kéle, kápah ye yé káh yéle n wo kéle.

³⁶ Káh ále n wo á yõle. Á náh fẽ á yòyén pó núkú rítẽ fyé piki, kápah náh pi à kè silki n pi, kápah ye káh ále n wo kéle.

³⁷ Káh àwele, yo ne àwe-á. Káh òõle, yo ne òõ-á. Té wâh nê yo dohnì sépi yô, pèkè pí-ò tò vyãh ye.

Yesu-á kwónó nêne ñ tò sáhpú kô pèkè dyáhnó tyí yô

³⁸ Yé kè noh soko ne káh me yónóle ne: «Wâh yí so, á yí ki so. Wâh yín dal, á yín ki dal.»§

³⁹ Nte ñmò kéle n yo yé tyí ne, névi-à tyítúkù pi yé tyí, yé káh ne yáh ké wóle n de. Té névi-à á gbòyò sò létáh mi, ké ní-ò to vi n mò à kô.

⁴⁰ Névi-à me ké tyí ne pé ñ ye tukey tükèpu tyí á fwòmònpír syi yĩnne, á fwòmò-ñgbẽ tole tẽ kô.

§ 5:38 5.38 - Yah n te Yálnó 21.22-25.

⁴¹ Névi-à n̄ kyĩ m̄o ne á kíló núkú k̄o péle,
kílónó nínó k̄o t̄ēne.

⁴² Névi n̄ê-à ni á tyí, yĩ t̄ē k̄õ. N̄ê-à ne pé deki
syi á tyí, káh n yahle.

*Yesu-á kwónó n̄ene n̄ tò sáhpú k̄õ à yuku sépébi
tyí-á ȳine k̄e n̄o pé tyí s̄õ*

⁴³ Yé k̄e noh sok̄o ne káh me yónóle ne, á ní-ò
tyí-á ȳine k̄e n̄o á tyí, * á mó á sépe dyole n yo.

⁴⁴ Nte n̄m̄o kéle n yo yé tyí ne, yé ye yé sépébi
tyí n̄o yé tyí, yé mó Liyelle n ni yé f̄óhpú tyí.

⁴⁵ Yáh képahle n pi, yé Sú Liyel n̄ê-á ȳinyõ
sok̄o, yé me kéle n w̄ek̄i ne n̄m̄o w̄ēnp̄i-á yéle.
N̄m̄o ye n se n̄ gb̄ine nép̄el àn̄ê nép̄épl̄o tyí, t̄é
p̄ũne n pi n m̄o négb̄l̄ó àn̄ê nétúkùn̄i tyí.

⁴⁶ T̄é yépi tyí-á n̄o nónó tyí, pépi ó tyí-à n̄o yé
tyí, yõre n̄ê me yé k̄i n we n pi képah sok̄o Liyel
tyí? Mórí syípú n̄t̄ē t̄o náh me s̄ēnt̄ēne n pi di?

⁴⁷ Yáh n w̄ek̄i n m̄o yé no ó tyí, gb̄ēndùn̄i tir
n̄ê me képahle? Liyel w̄ēk̄i k̄ó-n̄k̄ēpú n̄t̄ē t̄o náh
me s̄ēnt̄ēne n pi di?

⁴⁸ Yépi t̄ē w̄ole, yé tyípépl̄o ó kókóle n pi, s̄õ-á
yé Sú tyípépl̄o ó kókóle n pi, n̄m̄o n̄ê-á me ȳinyõ
sok̄o.

6

*Yesu-á kwónó n̄ene n̄ tò sáhpú k̄õ yĩ n k̄õ òkù
tyí yõ*

* **5:43** 5.43 - Yah n te Levitiki 19.18.

¹ Yé yé gblöyne n tẽ gbi wẽkì kólóle yínyáhkì soko dé. Yâh képahle n pi, yé náh ké yõre we n pi Sú Liyel tyí, ñmò nê-á yínyõ.

² Képah ye, wâh kwâhle n yĩ yãm neyne n kõ, káh ké kwníne n kõ sõ-á névye tókù n ne n pi kéle Liyel ní-ńtân vì soko ànê wâl yey soko, névye kõ pẽ péle n gbilki. Kègbi yõ mé kéle n yo yé tyí, pè ye ké yõre we te.

³ Nte áwò-à kwâhle n yĩ yãm neyne n kõ, káh n ye ñnî yó n tẽ pĩ ké soko.

⁴ Képah soko, yínkõnò nê-á á pi, kè kú tẽ sètìn sò soko. Té Sú Liyel nê-á sètìn sò tyile n pne, ñmò kú ñ dyah ké yõrele.

Yesu-á kwónó nêne ñ tò sáhpú kõ Liyel ni dükù tyí yõ

⁵ Yâh Liyelle n ni, yé káh névye tókùle n yah n pi. Liyel ní-ńtân vì ànê wětlo yey soko yúkúnyínttẽnó tyí ye nò pépi tyí pàh Liyelle n ni. Pé gblöy wẽkì yĩn ye pè n ne n pi képahle. Kègbi yõ mé kéle n yo yé tyí, pè ye ké yõre we te.

⁶ Nte áwò-à me ké tyí ne á Liyel ni, wâh pi ñ de á wòkò soko, ñ té á yah vike, ñ té á Sú Liyelle n ni. Té Sú Liyel nê-á sètìn sò tyile n pne, ñmò kú ñ dyah ké yõrele.

⁷ Yâh níríle n pi, yé káh tyile n tõ n yo tyé-ńkêne Liyel pĩ-ńkêpú tyí kõe. Pépi tẽ sònò soko, tyi tõnyonò kwlěyy nírí ye Liyel n tẽ.

⁸ Nte yî nónó yétô-á me yépi tẽ, yé Sú Liyel sè pĩ te sé ní-ńkẽ gbí ntẽne n tyí. Képah ye, yé káh Liyel pĩ-ńkẽpúle n yah n pi.

⁹ Yáh yĩne yè Liyelle n ni dùkù nêne, kè we yò: Ápi Sú Liyel nê-á yĩnyõ, á yĩn ne n gbilki.

¹⁰ A yõtõrí wẽki.

Wáh me nê tyí,

képah ne n pi sétáh yõ, sõ-á kéle yĩnyõ.

¹¹ A kwey gbìyìkì yõkele á kõ.

¹² Ápi-á pi de áwɔ tyí tyi nónó sɔkɔ, sè yõ n mɔ á kõ,

sõ-á ápi to yõ mɔ névyé kõ, nónó-á pi de á tyí.

¹³ Káh n ye à sétàn yõtẽ tõnmɔnɔle n fẽ n syi.

Nte á pwah n mɔ n gbò, n̄mɔ nê tyí-á pèkè pínó sõ n wil.

[Yõtõrí, ànê tẽnwenɔ, ànê gbílkinóle, áwɔ tyí ye gbíme gbí. Amiina!]

¹⁴ Névyé nónó-á n pi n de yé tyí, yáh n yõ n mɔ péle n kõ, yé Sú Liyel nê-á yĩnyõ, à ki n yõ n mɔ yé tɔle n kõ.

¹⁵ Nte yépi-à névyé tyípèlle n yõ n mɔ péle n kõ-ńkẽne, yé Sú Liyel náh yépi to tyí yõ n mɔ yé kõ n pi.

Yesu-á kwónó nêne n tò sáhpú kõ níkì tẽ dùkù tyí yõ

¹⁶ Yáh níkì tẽ, yé káh yé yey kwɔ n sah névyé tókù tyí kòle. Pépi ńkẽne pé yey yõre n sah ne

névye pĩ ne páh me níkì tẽ. Kègbı yõ mé kéle n yo yé tyí, pè ye ké yõre we te.

¹⁷ Nte áwɔ-à níkì tẽ, á yah wu, té káh á yõ pı n sah yákará,

¹⁸ névye kã pè pĩ ne wáh me níkì tẽ. Té á Sú Liyel nê-á sètın sò tyile n pne, ñmɔ kı ñ dyah ké yõrele.

Yesu-á kwónó nêne ñ tò sáhpú kã tahrı koh n sah dükù tyí yõ yĩnyõ

¹⁹ Yé káh tahrıle n yah n koh n sah kèkõyõ mè soko, képah nê soko-á sóhrı ànê syímı kı fẽ séle n yõ, képah náh pı yípú kı fẽ kye de vı soko kı sè yĩ toko.

²⁰ Nte yé tahrıle n yah n koh n sah yĩnyõ, képah nê soko-á sóhrı ànê syímı náh me sé yõ yõ tẽne, yípú tɔ náh me kı fẽ kye de vı soko, képah náh pı kı yĩbe yĩ.

²¹ Á náh we di, á tahrı-à me nýãh, á sônɔ tɔ kı me nénpó.

²² Wil kyòole, yí ye. Á yí-à me vyele, á wil pól kı me kyòo soko.

²³ Nte á yí-à yıkı, á wil pól kı me fěntũ soko. Kyòo nê-á á soko, káh kı me fěntũne, á me yĩ fěntũ pbèy soko dé.

²⁴ Névi yó ntẽ náh fẽ tò kwɔ n pı n pi yõtãm népı ními tyí. A kı núkú dyole n yɔ, té kı nɔ ñ ní-òle. Képah náh pı, à kı núkúle n tınki, té kı ñ ní-ò we mɔ. Sẽ ó ye, yé náh fẽ tò kwɔ n pı n pi Liyel ànê pó tyí.

25 Képah ye ní kǒ mé kéle n yo yé tyí ne, yé káh yé fókole n sǒ yáh ne we n yǒ [té we n wǒ] n pi sǒ, té kɪ me min sǒkɔ, ànê yáh ne yé wil flo we n mɔ n pi sǒ. Névi min tyí náh tah kal yǒkele di? Wil tɔ tyí náh tah kal flole di?

26 Yé yah kèpyele yínyǒ sǒkɔ kè; sè náh sèmukole n duku, sè náh sèmukole n tokɔ; sè náh se mó tǒ sèmukole n koh n sah díké sǒkɔ; té yé Sú Liyel séle n pu. Nte yépi náh fónfó kal kèpye yǒ nahnáh di?

27 Yépi sǒkɔ nê tǔ kɪ fě kwéy ntě fyé dohnɪ n̄ gblǒy min yǒ, n̄ fókósǒnɔ gbǒ yǒ?

28 Nte kwâh nê fókɔ sǒnɔ me yé tyí yé mɔ mɔ flo tyí sǒkɔ wé? Yé yah filkǐ fi pɪ dukùle swěy sǒkɔ kè: Sè náh tǒle n pɪ, sè náh se mó tǒ flole n tǐ.

29 Nte mé kéle n yo yé tyí ne, yǒtǔ dí Salomo tǎh fyé yah yǒ, à náh flo we mɔ yah nónó-á ple nɔ filfí nǒpi sǒkɔ yó ntěne.

30 Liyel yǒ sěnyĩ-ńkěpú nǒpi. Fílkǐ nê-á swǎh sǒkɔ kweyne, té kɪ pɔ n suke n pi n̄sǒne, Liyel-á képah fi pɪ palle sě à, yépi wɔ se pyě à kɪ ye kóhnmonole kal pléntnɔɔ?

31 Yé káh yé fókole n sǒ yè pɔ ne n yo ne, kwâh nê se yé kɪ we yǒ nɪ? Kwâh nê se yé kɪ we wɔ nɪ? Kwâh nê se yé kɪ we mɔ yé wil sǒkɔ nɪ?

32 Yé náh we di, Liyel pǐ-ńkěpú ye n̄kěne ne n yah n kǒ sépi pólle tyétyéní kěne. Nte yé Sú nê-á yínyǒ, à pǐ ne yǐ nǒpi pól yétô-á me yé tǔ dò.

33 Yé Liyel tǒrí ñgbò yah n kǒ, ànê wǎh me nê tyí. Képah sǒkɔ, à kɪ yǐ tǔlɔ tɔ pól dohnɪ yé kǒ.

³⁴ Yé káh yé fòkòle n sǒ nísô tyí sòkò. Yé nísô tyi sah nísô yah. Swǒ swǒ pól ànê sé yótyí ye.

7

Yesu-á kwónó nêne ò tò sáhpú kǒ ne pè káh no télólè n tuke

¹ Yé káh nolè n tuke. Képah sòkò, Liyel náh yé tò tuke n pi.

² Yé náh we di, yáh no télólè n tuke sǒ, sǐ ye Liyel kɪ n tuke n pi yé tǒle. Yáh no téló tyíle n sǎh dú nêne, yé tò tyí kɪ n sǎh n pi kéne dú óle.

³ Á pɪ sǒ té òndan we á yúnpi yí sòkò, té dàhnpele áwò yí sòkò, á náh me képah wò pĩ?

⁴ Á kɪ pɪ sǒ, té kɪ yo á yúnpi tyí ne, à ye á òndan wilki à kǒ ò yí sòkò, té dàhnpele mó tǒ me áwò yí sòkò?

⁵ Fòkòpìl névi. Á yí sòkò dàhnpele ògbò wilki. Képah-à pɪ, á kɪ fě n yah palle kɪ á yúnpi yí sòkò òndan wilki.

⁶ Yí nónó-á me Liyel tyí yǒ, yé káh séle névyele n kǒ nónó-á me pǎhlo tyí kǒle, pè kǒ pè káh n pò pé yey vi yé tyí kápékèyô. Yé káh mó tǒ yí kètárnòle névyele n kò nónó-á me slo tyí kǒle, pè kǒ pè káh n pò n suki n sòkò sé yǒ.

Yesu-á kwónó nêne ò tò sáhpú kǒ ne pè ne n ni Liyel tyí

⁷ Yé ne n ni, yé kɪ n we n syi. Yé ne n yah n kǒ, yé kɪ n we. Yé wùkahle n mɪ, kè kɪ n yɪkɪ n mǒ yéle n kǒ.

⁸ Yé náh we di, nê-à ni Liyel tyí, tẽ n we n syi. Nê-à yah kɔ̃, tẽ n we. Nê-à wùkah mɪ, kè n yɪkɪ n mɔ tẽ kɔ̃.

⁹ Nê tẽ me yépi sɔkɔ, n pídí-à búrn ni n tyí à kɪ dáhkɪle à kɔ̃?

¹⁰ Képah náh pɪ, wàh yěnkô ni n tyí, à kɪ wahyne à kɔ̃?

¹¹ Yépi nónó-á népêlle, yé yé wěnpì kɔ̃nó yah we yípeplɔle. Tòtò náh me ké sɔkɔ, yé Sú Liyel nê-á me yínyò sɔkɔ, n̄mɔ kɪ yîle sé nípú kɔ̃ nónó-á ple kal yépi tyíle dò.

¹² Yáh me ké tyí ne no tyi nónó pólle n pɪ yé tyí, yépi tɔ sɛ̄nknɔle n pɪ pé tyí. Sɛ̄ ye tyi kònsàhnó ànê Liyel tẽntò syínyopu sébéynó yo kéle.

Yesu-á kwónó nêne n tò sáhpú kɔ̃ dé-nsah wòkè ànê dé-nsah fĩ tyí yò

¹³ Yé ne n de dé-nsah fĩle. Yé náh we di, wěkì nê-á n yuku tyí yíkínó tẽ-nsah, ké kóló me fàhfàh, ké dé-nsah me wò. Képah sɔkɔ dépú me dò.

¹⁴ Nte wěkì nê-á n yuku tyé-ńkɛ̄ min tẽ-nsah, ké kóló me táhnóle, ké dé-nsah me fĩ. Ké wéndepu náh me fwó.

Yesu-á kwónó nêne n tò sáhpú kɔ̃ Liyel yĩn yò mìn̄yobe tyí yò

¹⁵ Yé yé gblɔ̄yne n kyɔmɪ Liyel yĩn yò mìn̄yobe. Pàh n pi yé tyí, pé pé gblɔ̄y pɪ mámm képyénì tyí kòle, té ké kègbɪ tẽ yò sɔkɔ, pé me pékénóle gběnpàhlo sɔ̄.

16 Yé kɪ pè pĩ n pi pé tyípínó sɔkɔ. Yèrēsĕ náh fĕ n wɛ n gbɛ kahɾɪ sɔkɔ. Sènsóké pye tɔ náh mó fĕ n wɛ n gbɛ gbíyĕkì sɔkɔ.

17 Sésân pèplɔ pól n syi pye pèplɔlɛ. Té séswóntùkù wɔ mó n syi pye túkúnìnɛ.

18 Séswô pèpɛy náh fĕ n syi pye túkúnìnɛ. Séswóntùkù tɔ náh mó fĕ n syi pye pèplɔlɛ.

19 Séswô nê-à n syí-ríkĕnɛ pye pèplɔlɛ, kè n kãm ò min n dah n mɔ nyàh sɔkɔ.

20 Sĕ ó ye yé kɪ n pĩ n pi Liyel yĩn yõ m̀inyobelɛ pé tyípínó sɔkɔ.

Yesu-á kwónó nêne ò tò sáhpú kǔ tir yónó ànê ké pínó tyí yõ

21 Kè náh pɪ nɛ nóno pól-á òmɔlɛ n ye Tĕ ògbĕ, Tĕ NGBĔNɛ pé pól sǔ kɪ Liyel tǔrí nɔlɪ yõ n pi dé. N Sù Liyel nê-á mɛ yĩnyõ, òmɔ-á mɛ nê tyí, képah pípú ó ye kɪ yõ ké nɔlɪlɛ.

22 Liyel tukey tuke sǔlɛ, névyɛ náhnáh kɪ n yo n pi ò tyí nɛ, Tĕ ògbĕ, Tĕ ògbĕ, òmɔ yĩn yõ kó lésõ pé n syi n yo Liyel tĕntǔnène nɪ? Nmɔ yĩn yõ kó lésõ pè n nɛ n yĩni n wilki sétǎnne névyɛ sɔkɔ nɪ? Nmɔ yĩn yõ kó lésõ pè n nɛ n pi gbĩlno náhnáhlɛ nɪ?

23 Ntɛ mé kɪ yo pé tyí nɛ, mé náh péle n pɛnè pólɛ. Pè gbɛ mɔ ònɛ, Liyel tyi kǔnsàhnó dĕl pípú nópɪ.

Yesu-á kwónó nêne ò tò sáhpú kǔ vɪ duke nínó mónó tyí yõ

24 Képah ye, névi nê-á ní welo nópi noh, té me sé tyíyónóle n pi, tẽ me á ki ne lékám névi yó sǒ, nê-á ò wòkò mǒ légbí yǒ.

25 Pũ me pǒ pi, yrey yuku à kwǒki kyi syi kéne wòkò tyí, púnyáhkí tǒ me kǒ kyi mi ké sǒkǒ, òte kǎh sǒ sǒ légbí yǒ sě, képah ye kè náh syiki.

26 Nte névi nê-á ní welo nópi noh té à náh me sé tyíyónóle n pi, tẽ me á ki ne lékám kě névi yó sǒ, nê-á ò wòkò mǒ sèmìyáhrí yǒ.

27 Pũ me pǒ pi, yrey yuku à kwǒki kyi syi kéne wòkò tyí, púnyáhkí tǒ me kǒ kyi mi ké sǒkǒ, kè me syiki à pírki kwe pnépné.

28 Képah sǒkǒ, Yesu-á kwónó nópi kǒ te gbí nêne, tówú gbàn du ò névye kwónó dùkùle.

29 Yé náh we di, ò névye kwónó dùkù náh sǒ me Liyel tyi kònsàhnó kwópú tyí kǒle dé, kè sǒ me yǒtǒrí kwónóle képah ye.

8

Tótě dí yó dénmǎnǎle

1 Yesu-á wil yǒli yǒ à tiki pǒ gbí nêne, tówú ògbě ò sǒ tẽ.

2 Tótě yó me nǒ de à gbètukunǒ di ò yah sǒkǒ, té yo ò tyí ne, pé Tě ògbě, wàh me ké tyí wǎh ki fě pé de mǒ pé kǒ pé pi yályál Liyel yah.

³ Wǎh yo sě, Yesu με ñ gbò ño à tũ ñ tyí, té yo ñ tyí ñe: «Mé me ké tyí, á kɪ de.» Nénpó swɔ, dí dú nyân núkú tyɛ.

⁴ Képah sokɔ, Yesu με yo ñ tyí ñe: «Káh yĩ mè yǎh ñey tyí dé. Té kyɪ á gblɔyne sárká syínwilkì-ò wěkɪ. Moyisi-á sò sárká nê tyí yo sah tótãm dénmonɔ tyí sokɔ, kyɪ képah wilki, nê-á kɪ kéle pè wěkɪ ñe wáh de.»

Wrome sràsyíbí yòtě dí yó tònpi dénmonɔle

⁵ Té Yesu-á pɔ de Kapernayumi sokɔ gbí nêne, Wrome sràsyíbí yòtě dí yó pɔ ñ tnô té à ni

⁶ ñe, pé yòtě, pé tònpi dí-á me sɛnóle gbô sokɔ wil kúnó nyânne ñ sokɔ. Wǎh me n kwɔ képékèyô.

⁷ Képah sokɔ, Yesu με yo ñ tyí ñe páh kɪ ñ sò tě kyɪ à de mɔ.

⁸ Nte kéne dí me yo Yesu tyí ñe, pé yòtě, péwɔ-á fórwɔ kah ñ dénóle pé gbô sokɔ. Nkě à wey núkú ó yo, té pé tònpi-á kɪ de.

⁹ Á kó we ni, yòtã-á me péwɔ tyí, té péwɔ tɔ mó me sràsyíbí yísyó yòtɛne. Páh yo nê tyí ñe, à sokɔ! Tě n sokɔ. Páh yo nê tyí ñe, à pɔ! Tě n pɔ. Páh yo pé yò tyí ñe, à tir mè pi! Á kè pi.

¹⁰ Képah sokɔ, Yesu-á kéne welɔ noh sě, sè ñ gbǎn kah du. Á me yo ñ sò tɛpú tyí ñe: «Kègbɪ yò mé kéle n yo yé tyí, mé náh Liyel yò sɛnó ñgbě mè dükù névi we yah Yisrayel no ñtě fyé sokɔ.

11 Té mé kéle n yo yé tyí ne, névye náhnáh-á kɪ wil ywõ ywõ pólle, kɪ pɔ yõke yõ wě tyí Abrahmine, ànê Yisakile, ànê Nsyakɔbile Liyel tǒrí tyah sɔkɔ.

12 Nte Yisrayel no nónó-á sò yĩne dénóle Liyel tǒrí tyah sɔkɔ, pépi kɪ wũ kégbó fěntú sɔkɔ, nýãh sɔkɔ-á gbní ànê yní táhnó kɪ me.»

13 Képah tēne, Yesu n syi yo sràsyíbi yòtē dí mè tyí ne: «Á syi ne n yuku á tinnē. Wáh sē nmo yõ sē, wáh nê yah kō, kè kɪ pi á tyí.» Nénpó swɔ, n tǔnpɪ dí núkú de.

Yámpú náhnáh dénmɔnɔle

14 Képah náh, Yesu kyɪ Pyeri gbô, té kyɪ Pyeri dénsê we sēnóle wílvýáhnìne.

15 Yesu me tũ pi gbò tyí, wílvýáhnì núkú à fin mɔ. Képah tēne, pi me yuku tyah n yah n dah n mɔ Yesu tyí sɔkɔ.

16 Gbíyí-á de, no pɔ névye náhnáhle Yesu tyí sétàn-á sò me dénóle nónó sɔkɔ. A me n vyãh weyne sétàn nópi yĩni wilki pé sɔkɔ, té yámpú téló pól de mɔ.

17 A képah pi Liyel tēntò syínyo-ò Yesayi tir yónsàhnó mè kō kè wil. A lésò ne nkē: «Á ye á yèvyãhrɪnɔ pól tɔkɔ to á yõ, té á yamno pól tyē.»

Nónó-á sò me ké tyí ne pé Yesu sò tē

18 Yesu-á tówú nḡbē we pè pɔ à mɔ gbī sē, à ne pé tò sáhpú àwɔ pé yuku yó-nḡbē kahnne.

19 Képah sɔkɔ, Liyel tyi kònsàhnó kwó-ò yó nɔ de n̄ tnô té yo n̄ tyí ne, kwó-ò dí, páh kɪ n̄ sò t̄ n̄ kɔ n̄ kɔ n̄ne n̄ yúkú-ńt̄n̄ pól sɔkɔ.

20 Wǎh yo s̄, Yesu me yo n̄ tyí ne:
«Gběnpǎhlo tyí p̄ me. Kèpye tyí syè me. Nte Névi Pídí t̄ tyí, wénsēnmì-ńsah ńt̄ náh me.»

21 Képah t̄ne, n̄ tò sáhpú sɔkɔ yó t̄ à syah ne, kwó-ò dí, à ye páh pɔ pé sú lékó ñgbò ȳ t̄.

22 Yesu me yo n̄ tyí ne: «N̄mɔ sò t̄, n̄ té n̄ ye nékȳ k̄ pè pé lékȳle n̄ ȳ.»

Yesu yáhpékè yó ȳn̄ mɔ yó-ñgb̄ sɔkɔ

23 Képah sɔkɔ, Yesu de krótókè sɔkɔ àn̄ n̄ tò sáhpúle pè sɔkɔ.

24 D̄ yáhpékè yó núkú k̄ yó-ñgb̄ ȳ sɔkɔ, f̄ó krótókè ȳ n̄ tyah ȳn̄óle ni sɔkɔ. Nte Yesu wɔ sò me n̄ do.

25 Képah sɔkɔ, n̄ tò sáhpú nɔ de n̄ tnô me kyɪ ñne n̄ yilki n̄ mɔ ne ńk̄, T̄ ñgb̄, à pé pwah mɔ oo! Yó-á me n̄ tyah pé ȳn̄óle dé!

26 Yesu me yo pé tyí ne: «Kwâh n̄ pɪ té tíkí yé t̄? Liyel ȳ s̄nȳ-ńk̄pú nópi.» Képah t̄ne, à yuku à dírí k̄ yáhkí àn̄ ni ȳ, tyah núkú pɪ súmm.

27 Képah t̄ne, kè kah pɪ gběndùn̄ine pé tyí. Pè me tyah yo t̄ w̄ tyí ne, nédúkú n̄ se dí m̄ne té yáhkí àn̄ yɔ tɔ n̄ sah n̄ tyí ȳ ni?

D̄b̄í n̄p̄í n̄m̄í dén̄m̄ɔn̄le s̄t̄n̄-á sò me nóno sɔkɔ

28 Képah sɔkɔ, Yesu-á kyɪ yĩni tẽ yó-̀ngbẽ kahnɛ Kadarɪ tãn sɛtáh yõ gbí nêne, díbí nɛpî nímí me wil léyâl wró sɔkɔ à pɔ à yohnɪ sɛtãnnɛ pé sɔkɔ. Pé pékénkàhnó tẽ tyí, ney náh sò me fẽ n sɔkɔ nɛnpó wẽkìlɛ.

29 Pãh pɔ à yohnɪ, pè tyah n de n syi nɛ, Liyel Pídí, kwâh nê se à n yah n kɔ pé tyí nɪ? A se pɔ ásô pépi fõh yĩnnɛ ké gbí nó-̀nkẽ sɔkɔ nɪ?

30 Té kè sò pɔ yĩnɛ sel kwĩnki yísyó me n yah n yõ n kɔ fí kwéy pélɛ.

31 Sétãn nópi me Yesu ni nɛ, wàh kɪ sé yĩni wilki díbí nópi sɔkɔ, à ye sé kɔ sé kyɪ n de sel nópi sɔkɔ.

32 Yesu me nɛ, sè nɛ n yuku. Sè núkú wil díbí nópi sɔkɔ à kyɪ de sel nópi sɔkɔ. Sel nópi pól núkú wil yõh yõtãh, à to tiki tükütükü à kyɪ de yɔ sɔkɔ à ku.

33 Képah tẽnɛ, sel nópi fẽpu me to de kwil sɔkɔ, à kyɪ tyi nópi pól yãh no tyí, à tãhlɪ tir nê-á pɪ díbí nɛpî nímí nópi tyí sɛtãn-á sò nóno sɔkɔ.

34 Képah sɔkɔ, kwil tãn pól wil kyɪ Yesu yohnɪ. Pãh fyò à wɛ, pè à ni nɛ à yal pépi sɛtáh yõ.

9

Sèkùkù dǐ yó dɛnmonɔlɛ

¹ Képah sɔkɔ, Yesu de krótókè sɔkɔ à n̄ syɪ yó-̀ngbẽ kah à sɔkɔ n̄ kwil sɔkɔ.*

* **9:1** 9.1 - Yesu kwil nê tyí-á n yo ásô sɔkɔ yò, Kapernayumi ye.

² Nósyó me sèkùkù dí yó twah sě sě kwâh yó yõ à pɔ n tyí. Wâh kè we pè sě n yõ sě, à yo sèkùkù dí mè tyí ne: «Káh n ye á yáh-ńsah tyè ń pídí. A tyípêl pínó ye yõ mɔ n kõ.»

³ Képah tẽnɛ, Liyel tyi kònsàhnó kwópú yísyó tyah n sò ne, dí mè-á me n yo n de Liyel tyí dé.

⁴ Nte Yesu-á pé sòno pĩ sě, à yo pé tyí ne: «Kwâh nê pɪ té sòno túkúnìne yé sɔko sě?

⁵ Mâh yo sèkùkù dí mè tyí ne: «A tyípêl ye yõ mɔ.» Képah náh pɪ, mâh yo n tyí ne: «Yuku ne n kɔ.» Dlo me nê tẽ yónó sɔko kal?

⁶ Nte mé kɪ tir yó pɪ yé kõ yé kɪ pĩ ne, tẽnwenɔ-á me Névi Pídí tyí sétáh yõ kɪ fě tyípêl yõ mɔ.» Té n syi yo sèkùkù mè tyí ne: «Yuku, á sě sě kwâh tɔkɔ n ne n yuku á gbô.»

⁷ Dí me yuku à sɔko n gbô.

⁸ Tówú-á képah tẽ we sě, tíkí pè tẽ. Pè tyah Liyel yinne n gbilki wăh sònpúle tẽnwenɔ mè dukùle névye kõ.

Yesu Matye ye pɪ n tò sáh-òle

⁹ Yesu-á yal nénpó té n sɔko, à dí yó we à me kõ tẽ mórúle n syi mórí syí-ńsah sɔko, pè n ye Matyele. Yesu me yo n tyí ne: «Ñ sò tẽ.» A me yuku n sò tẽ.

¹⁰ Képah náh, Yesu-á sò me yòke yónó sɔko Matye gbô, mórí syípú náhnáh ànê Liyel wěkì kó-ńkěpú tɔ pɔ n yõ ñne wě tyí ànê n tò sáhpúle.

¹¹ Farisi wěkì kópú-á képah we sě, pè yo Yesu tò sáhpú tyí ne, kwâh nê se pɪ té pé kwó-ò dí n

yõ mórí syípú ànê Liyel wěkì kó-nkĕpúle wě tyí nı?

¹² Nte Yesu-á pé wey noh, à yo pé tyí ne:

«Névye nónó-á me lènɔle, sènpı yétò se me pé tyí? Yámpú tyí náh n̄ yétòle di?

¹³ Liyel-á nê yo ne nkĕ: <Yâh wě yãmne n yah, képah tyí nɔ n̄mɔ tyí kal yâh sárká nêne n suke n̄ne n k̄. > Yé kyı yé fɔkɔnı mɔ yah képah tyí sɔkɔ, yè ké kór p̄ı. Yé náh we di, névye nónó-á me n s̄o ne négbłó-á péle Liyel yah, mé náh pɔ pépi yé-ńsah dé. Nte nónó-á p̄ı ne tyípêl pípú-á péle, pépi yé-ńsah ye mé pɔ.»

N̄vìnì tir náh me núkúle Nsyifunɔ tyídile

¹⁴ Képah sɔkɔ, Wèlnwĩlkĩ-ò Nsyõ tò sáhpú nɔ de Yesu tn̄o té à syah ne, kè se pı s̄o té pépi ànê Farisi wěkì kópú níkile n t̄e té n̄mɔ tò sáhpú náh me níkile n t̄e nı?

¹⁵ Yesu me yo pé tyí ne: «Păh nónó ye fúr yõke yõ yĩnne, pépi se kı f̄e pé yey kwɔ sah pe me gbíne pé nyó? Nte sèp̄ın yısyó me n pi, pe mè kı pɔ n t̄e n wilki n pi pé nyó. Légbíne, pè kı níkile n t̄e.

¹⁶ Nn̄ı yó n̄t̄e náh yĩne à fwòsãn kãm à fwòdyàh min. Yé náh we di, fwòsãn mè kı fwòdyàh mè yɔrı tɔ, wãn ó k̄o kè kı t̄o mɔ ké tónó yõ.

¹⁷ D̄ivě sán tɔ náh yĩne mónóle pley d̄ı sɔkɔ. Wâh képah pı, d̄ivě mè-à fũ, kè kı pley nópi sɔkı, d̄ivě kı kwɛ, pley tɔ tyí kı yıkı. Nte kàh

dĩvẽ sánnɛ, pley snó sokɔ ye kè n mɔ. Képah sokɔ, kèyãh nítẽ náh n yiki.»

Pi yó dénmɔɔ ànê sênpir yó lékó yîlkînmɔɔlɛ

¹⁸ Yesu-á me kéne welɔlɛ n yo pé tyí gbí nêne, Nsyifunɔ yõtẽ dí yó nɔ de n tnô, té gbètukunɔ di n yah, té yo n tyí ne pé písê-á yah kwlo núkúnúkú sɛ yò. Nte à pɔ kyɪ n gbõ sah n yõ, wãh kɪ min wɛ.

¹⁹ Képah sokɔ, Yesu ànê n tò sáhpú me yuku dí sò tẽ.

²⁰ Té kè pɔ yĩne sê yó sò me náhle n yo tyé-ńkêne ye gbõninó. Pi mè me nɔ de Yesule n náh ùnne, à pɔ tũ n fwòmɔɔnɪ vyãh tyí.

²¹ Yé náh wɛ di, à sò me n sò n fɔkɔ sokɔ ne páh kɪ tẽ wɛ tũ n fwòmɔɔnɪ nítẽ ó tyí, páh kɪ de.

²² Yesu-á n yah vi té à wɛ, à yo n tyí ne: «Káh n ye á yáh-ńsah tyɛ, ń písê. Á Liyel yõ sɛnó ye n de mɔ.» Nénpó swɔ, pí núkú de.

²³ Té Yesu-á pɔ yĩni tẽ Nsyifunɔ yõtẽ dí gbô, à yikɔ fɛ́bípú wɛ té tówû wɛ pè me n pɪ wrõwrõ. Képah sokɔ, à me yo pé tyí ne:

²⁴ «Yé wil ásô. Pípír náh ku, dɔy† sokɔ ye ñne.» Nte pè sò me kóle Yesule n ko.

²⁵ Páh tówû wilki mɔ te kégbó sokɔ, Yesu me de yuku wòkò sokɔ, té pípír gbõ sokɔ tẽ, pípír yuku.

† 9:24 9.24 - Dɔy nê tyí-á Yesu n yo ásô yò, dɔy gbɔy náh sò dé. Pípír sò ku kègbɪ yõ. Nte Yesu-á sò pí ne páh kɪ fɛ́ n lékó yilki mɔ sɛ́, képah ye à ne dɔy sokɔ-á ñne.

26 Yí mè pínó tyí tyah n yãh kéne mara ywõ ywõ pól sɔkɔ.

Yítūbi nēpî nīmî yísyó yí yíkínmɔnɔle

27 Yesu-á yal nénpó à n sɔkɔ gbí nêne, yítūbi nēpî nīmî yuku ò sò tē té me yo tū léyy ne, Davidi Pídí, à pé yãm yah.

28 Yesu-á pɔ yīni tē gbô sɔkɔ, yítūbi nópi me nɔ de ò tnô. A me pè piki yah ne, pè se sē ké yó ne péwɔ-á kɪ fē pé yí yɪkɪ mɔ nɪ? Pè me ne, àwe-á, Tē ògbē.

29 Képah sɔkɔ, Yesu tū pé yí tyí té ne: «Yáh sē òmɔ yó sô, té nê yah kô ò tyí, Liyel kè pɪ yé tyí sē.»

30 Képah tēne, pé yí yɪkɪ mɔ. Yesu me pè gbah sni ne, pè pé gblɔy tē, pè káh n ye ney pī ké sɔkɔ dé!

31 Nte pé wɪlntɛnɔ òsô, pè kyɪ tyah Yesu yíngbúle n yo n kô kéne mara pól sɔkɔ.

Dí yó dénɔnɔle nê vyãh-á sò me gbínóle

32 No nópi-á wil n sɔkɔ gbí nêne, nósyó pɔ dí yóle Yesu tyí, nê-á sétô yó me ò sɔkɔ à kô à pɪ kèdòkìle.

33 Yesu-á núkú sétô mè yīni wilki dí mè sɔkɔ, dí tyah n wɛkɪ. Kè pɪ gbēndùnìne tówú pól tyí, pè me yo tū ne òkē, pépi náh òsòntē òkù wɛ yah Yisrayel sɔkɔ pólle.

34 Nte Farisi wēkì kópú wɔ sò me yo tū ne, sétàn yòtē gbò yô-á à n yīni sétànne.

Tówû yãm me Yesu tẽ

³⁵ Yesu lésõ me kwló-̀ngbno ànê kwlópî pólle n ko n kõ, me nole n kwõ Liyel ní-̀ntân vì soko, me Nìvìnì tirlè n yo Liyel tórí tyí yõ, té me yámpú pól ànê néfukuló pólle n de n mo.

³⁶ Yesu-á tówû nóno we kwlonó soko, té pé yáh-̀nsah me tye á ki ne yípêy sõ fẽ-ò kène sé tyí, pé yãm à tẽ.

³⁷ Képah soko, à yo n tò sáhpú tyí ne: «Sèmuco toko toko tẽ me dò, té ké tònpihle kwéy.

³⁸ Káh pi sẽ, Tẽ ngbẽ Liyel nê-á sèmuco nétẽne, yé à ni à tònpihle tekì n mo sèmuco toko yinne.»

10*Yesu tẽntò névyè népî gbõnimíne*

¹ Sõ yóle, Yesu n tò sáhpú népî gbõnimí ye po, té tẽnwenole pè kõ ne pè sétanne n yini, pè mó yámpú pólle n de mo, ànê néfukuló pólle.

² Kéne népî gbõnimí nópi ye à pi n tẽntò névyele. Pé yni we yò: Kè tyah Simo tyí, nê-á pè yin dyi à kõ Pyerle, ànê n gbẽndí Andrele, à tahl Nsyaki ànê n gbẽndí Nsyõ tyí, pépi nóno-á Nsebede dínpile,

³ à tahl Filipi ànê Bartelemi tyí. Toma sò me pé soko ànê Matyele, nê-á sò mórí syí-òle, à tahl Alfe pídí Nsyaki tyí ànê Tadile,

4 ànê Simole, nê-á sò sú fò vyãh syípú soko yóle, à tahlı Nsyudası Yisikariyotı tyı nê-á pɔ pı pè kɔ̃ pè Yesu tẽ.

Yesu tẽntò névye népî gbõnimí tékínmɔnɔle Nivìni tir yó-ńsah

5 Népî gbõnimí nópi ye Yesu tɔ té kè gbah yo pé tyı ne: «Yé káh kyı névye ònne nónó náh pı Nsyifunɔle, ànê yé káh de Samari tãn kwil yó ñtẽ soko.

6 Yé ne n yuku Yisrayel no wɔ ònne, pépi nónó-á me képyénì mónpunɔ tyı kòle.

7 Yáh kı n yuku wèkì yò, yé ne n yo n yuku ne, Liyel tɔrí-á me yĩni tẽ te.

8 Yé yámpúle n de n mɔ. Yé lékyîle n yilki n mɔ. Yé tótãnne n de n mɔ pé dú nyân soko, yé mó sétãnne n yĩni n wilki névye soko. Yáh we syi nònóle sɔ̃, yé tɔ ne n kɔ̃ nònóle sẽ.

9 Yé káh pɔ tɔkɔ dah mɔ yé yò.

10 Yé káh pley, ànê fwòmɔlo ní-òno, ànê lékyêh, ànê lépló tɔkɔ kóló yinne. Yé náh we di, tònpi yĩne ñ tò pínó yòke yónóle.*

11 Yáh kyı de kwíl-ńgbẽ képah náh pı kwilpír nê soko, yé négbí yah kɔ̃ yé twah tẽ tyı. Yé mó tẽ tẽ tyı, fók kè pɔ no yé yálnó tyı kéne kwil soko.

12 Té yáh kyı n de kéte nê soko, yé yo pé tyı ne yèvuni ne me pé yò.

13 Kéne kéte tãn-à fẽ syi yé twah pé tyı, yèvuni mè kı me pé yò. Nte pàh yahle, yèvuni mè kı ké syı pı yé tyíle.

* **10:10** 10.10 - Yah n te 1 Korènti tãn 9.14 ; 1 Timote 5.18.

14 Yâh de gbô nê soko kèpah nâh pi kwil nê soko, té pè yahle ne yé kâh twah pé tyí, té yahle yé wey nóhnóle, yâh n yal, yé yé gbyêh nêngbõ kwer n kwe nénpó.

15 Kègbi yõ mé kéle n yo yé tyí, Liyel tukey tuke sôle, Sodomɔ kwil ànê Gbomɔɔ kwil fóhnó ntě nâh n peke n no n pi kéne kwil tyíle.»

Yevyâhrɔ nê-á kɔ n pɔ n pi

16 «Yé yah, yé me á kɔ ne képyénì sɔ́ nɔɔ n tekɔ n mɔ gběnpâhlɔ nyó. Yé ne me lékám névyele áswɔ́ pléy tyí kɔ́le, yé fɔkɔ́ mó ne me pépér títí sɔ́.

17 Yé yé gblɔ́yne n kyɔmɔ névyele dé. Pè kɔ yéle n tẽ n tuke n pɔ tukey tükè-ntân soko, té kɔ yéle n ko yèfòhle Liyel ní-ntân vì soko.

18 Pè kɔ yéle n tẽ n kyɔ n pɔ kwiltãm yòtãm ànê yòtãm tyí nɔɔ yinne. Kèpah soko, yé kɔ nɔɔ tyíle n we n yo pé tyí, à tahlɔ névyé tyí nónó nâh pi Nsyifunóle.

19 Nte pàh yé tẽ n yuku tükè-nsah, yé kâh ye yé yâh-nsah tye yâh ne n yo n wil n pi sɔ́, ànê yâh ne nê yo n pi. Yâh ne nê yo n pi, ké sɔ́nɔ kɔ de yé soko nénpó swɔ́.

20 Yé nâh we di, yé yah yíí welɔ nâh yé kɔ n wekɔ dé, Sú Liyel Mirki ye kɔ tẽ yé yahle yé kɔ n wekɔ.

21 Névyé kɔ pè kɔ pè kɔ pé yúnpyéle n tẽ n ko n mɔ. Súbí tɔ kɔ sěntěne n pi pé wěnpì tyí. Wěnpì tɔ kɔ pé dúbípú tyí yahle, té kɔ pè kɔ pè kɔ péle n ko n mɔ.

22 Névyé pól kɪ yé wɛ mɔ́ n̄mɔ́ yĩnne. Nte nê-à n̄ tah sah à pɔ́ nɔ́ ké tyénó tyí, tẽ kɪ pwáhn̄mɔ́nɔ́ wɛ.

23 Pàh yéle n fõh kwil yó sɔkɔ, yé sɔkɔ kèyãh sɔkɔ. Kègbɪ yõ mé kéle n yo yé tyí, n̄mɔ́ nê-á Névi Pídíne, yé náh t̄õn̄ Yisrayel kwlo pól kɔ n k̄õ n te n pi té mé kɪ pɔ́.

24 Tir sáh-ò náh n kal n pne n̄ kwó-òle. Tõnpɪ tɔ náh n kal n pne n̄ yõt̄ẽne.

25 Tir sáh-ò-à pɪ n̄ kwó-ò tyí k̄õle, kè kɪ yĩne. Tõnpɪ tɔ-à pɪ n̄ yõt̄ẽ tyí k̄õle, kè kɪ yĩne. Névyé-á fyò me kéte tẽ dí n̄t̄ẽne n gbyɔ Belsebulile, (nê kór-á sètãn̄ yõt̄ẽne), n̄ kéte tãn̄ wɔ se pyẽ pè kɪ ye gbyònpèkenɔle?

26 Káh pɪ s̄ẽ, yé káh névyé yah tíkile n pɪ. Yé náh wɛ di, tyípil yó n̄t̄ẽ náh n wũ n pi wĩk̄in̄mɔ́-n̄k̄ẽne. Sèt̄in̄ s̄õ tir yó n̄t̄ẽ náh n wũ n pi p̄í-n̄k̄ẽne.

27 Máh tyi nónónɛ n yo yé tyí f̄ẽntũ sɔkɔ, yé séle n yo n wilki n mɔ́ tyah kyòo yah. Tyi nónó-á n plo n yo yé tyí yé níkíló yey, yé sé kwníne n k̄õ gb̄ẽnt̄in̄ yõ.

28 Yé káh névyé yah tíkile n pɪ, nónó-á névyéle n ko mɔ́ n pne, té pè náh f̄ẽ n̄ min ko mɔ́ n pi. Nte Liyel nê-á kɪ f̄ẽ névi wil gb̄ẽnsê ànê n̄ min tɔ min dah mɔ́ ní-n̄k̄ẽ nyàhn̄pèkè sɔkɔ, yé n̄mɔ́ wɔ tíkile ne n pɪ.

29 Nt̄ẽnp̄in̄ó nínó n yãm pópikí pó núkú óle. Nte sé sɔkɔ yó n̄t̄ẽ náh n sykɪ sètáh, né yé Sú Liyel náh ké w̄èk̄ì k̄õ.

30 Nte yépi tẽ wɔɛ, yé yòyén nítẽ pól dan me pínóɛ Liyel tyí.

31 Káh pɪ sě, yé káh tíkile n pɪ, yépi tyí náh tah kal ñtɛnpî kwĩnki tyíɛ di?

32 Névi nê-à kè yo dal mɔ névye yí yah ne páh me nímɔ tyí yõ, nímɔ tɔ kɪ kè yo dal mɔ n Súsú yí yah nê-á me yĩnyõ, ne tẽ-á me nímɔ tyí yõ.

33 Nte nê-à yahle névye yí yah ne pé náh me nímɔ tyí yõ, nímɔ tɔ kɪ yahle n Súsú yí yah nê-á me yĩnyõ, ne tẽ náh me nímɔ tyí yõ.»

Yesu tyí-á gbékínó nê dahbɪ kèkõyó

34 «Yé káh we ne yèvuni-á mé pɔ mótó-ńsah sétáh yõ dé. Yèvuni náh mé pɔ mótó-ńsah sétáh yõ, gbékínó wɔ ye pyě.

35 Mé pɔ dí ànê ñ súsú wró gbékí-ńsah; sênpir ànê ñ yú wró gbékí-ńsah; sê ànê ñ pɛ yú wró gbékí-ńsah.

36 Névi gbô tãn ye kɪ pɪ ñ sèpébíɛ.

A á gblõy dɔɔ yú tyi we ye, té Yesu sò tẽ

37 Névi nê súsú, képah náh pɪ ñ yú tyí-à nɔ ñ tyí à kal nímɔɛ, tẽ náh yĩne à ne n me nímɔ tyí yõ. Névi nê pídí, képah náh pɪ ñ písê tyí-à nɔ ñ tyí à kal nímɔɛ, tẽ náh yĩne à ne n me nímɔ tyí yõ.

38 Névi nê-à ñ syɪ syɪ dahnu twah n sò tẽ-ńkêne, tẽ náh yĩne à ne n me nímɔ tyí yõ.

39 Névi nê-á ne páh pé minne n koh n sah, tẽ kɪ tekɪ tyé-ńkê min sokɔ. Té nê-á tekɪ ñ min sokɔ nímɔ yĩnne, tẽ wɔ kɪ tyé-ńkê min we.»

Yõre nê-á n we Liyel nípú t̄õnsàhtẽno soko

⁴⁰ «Névi nê-à yé tẽ ple, n̄mo ye tẽ tẽ ple. Nê to-à n̄mo tẽ ple, Sú Liyel nê-á tekı mo n̄ne, n̄mo ye tẽ tẽ ple.

⁴¹ Névi nê-à Liyel tẽntò syínyo-ò tẽ ple n̄ pínó ȳinne Liyel tẽntò syínyo-òle, Liyel tẽntò syínyo-ò dyah dyah kwâh kénkõ ye kı dyah tẽne. Névi nê to-à négbí tẽ ple n̄ pínó ȳinne négbíle, négbí dyah dyah kwâh kénkõ ye kı dyah tẽne.

⁴² Kègbı yõ mé kéle n yo yé tyí ne, névi nê-à nívínó n̄gbíȳine n̄mo tò sáhpú soko yó ntẽ fyé kõ à wõ n̄ pínó ȳinne n̄mo tò sáh-òle, tẽ náh n tekı n pi ké lédyáhnı soko pólle.»

11

¹ Képah soko, Yesu-á tyi kwâh sah n̄ tò sáhpú nép̄ı gbõnimı kõ te gbí n̄ne, à yal n̄npó à yuku gbòplo kwlo soko, à kyı kwónóle n pi té Nìvìnı t̄irle n yo.

Wèlnwìlkı-ò Nsyõ-á pikínyahn̄o nê pi Yesu Krista tyí soko

² Wèlnwìlkı-ò Nsyõ sò me wòkònpèkè soko té Krista tyípínó tyí yónó noh. A me n̄ tò sáhpú yısyó tò pè kyı à piki yah ne,

³ n̄mo se Liyel ney yáhtokònole nê-á kı sò n po n pi, t̄ı pé se ȳne pé ñn̄ne n syıki ni?

⁴ Yesu me yo pé tyí ne: «Tyi nónó-á yé n nohnı té séle n yah yò, yé kyı sè yãh Nsyõ tyí ne,

⁵ ȳt̄ıbi yí-á me n yıki n mo, sèkukubi me n ko tómtóm, tótãm me n de n mo, níkit̄ıbi me n

nohni, lékyî me n yilki n mo, ànê Nìvìnì tir me n yo n kō yām tǎn tyí.

⁶ Nte ñmo tyí-à kɪ névi nê kō à ní yō sǎnó yáhle-ńkēne, tǎ wo tyí no.»

⁷ Nsyō tō sǎhpú-á pé syi soko te gbí nēne, Yesu tyah Nsyō tyíle n yǎh tówú tyí ne ńkē: «Kwâh nê me yé kyɪ yah gbēnni soko? Fílkí yó se yáhkí me n fí n kō?

⁸ Nte kwâh nê me yé kyɪ yah wé? Dí yó se nê-á me fwòtǎhnì mo? Té nónó-á mó tō fwòtǎhnìne n mo, pépi me yòtām fné soko dò.

⁹ Nte kwâh nê me yé kyɪ yah wé? Liyel tǎntò syínyo-ò yó se? Mé kéle n yo yé tyí ne sǎ-á. Té ñmo ńtǎ-á kal Liyel tǎntò syínyo-òle.

¹⁰ Yé náh we di, Nsyō tyí ye wǎrkínsàhnóle Liyel wey sébéy soko ne Liyel-á ne: «Yah, ñmo Liyel kɪ ń tǎntò névi tekɪ mo á yahle, à kɪ po á wǎkì tō sah.»*

¹¹ Kègbɪ yō mé kéle n yo yé tyí ne, sê foko tǎh pi yó ńtǎ náh me nê-á kal Wèlnwìlkì-ò Nsyōne. Nte nê-á tyí kal Liyel tǎrí noli yópú soko, ñmo ńtǎ kal ñne.

¹² Té à tǎko Wèlnwìlkì-ò Nsyō gbí tyí, pópó à po syi núkúnúkú tyí, Liyel tǎrí noli me n we n yō tǎhnsàhnó ó soko. Tǎhnsàhpu ye n we kéle.

¹³ Liyel tǎntò syínyopu pól ànê Moyisi tyi kònsàhnó sò me Liyel tǎrí tyíle n yo, pópó à po syi Nsyō gbí tyí.

* **11:10** 11.10 - Yah n te Malaki 3.1.

14 Yáh kɪ fě n sě n pi ké yõ, Nsyõ ye Yeli mènɛ, nê pónó tyí-á sõ yónsàhnóɛ.†

15 Nê-à kɪ mɛ kè noh, tẽ kè tẽ yĩn.

16 Mé kɪ kwɛy gbĩ névye tɔkɔ sãh nêne wé? Pè mɛ á kɪ nɛ wěnpì sõ kõ tẽ tówû tükè-ntàn sɔkɔ, té mɛ n yo n mɔ pé no tyí nɛ,

17 pépi-á yɪkɪ fɪbɪ pé tyí, té pè náh yi. Pé tõ kũ yìkì gbɪ mɔ, pè náh se tõ gbo.

18 Sě ye kwɛy gbĩ névye tɔ mɛ n pi. Yé náh wɛ di, Nsyõ-á lésò pɔ, à náh mɛ yõke yèsyìkìɛ n yõ, à náh mɛ ñvɛnɛ n wɔ. Képah tɛnɛ, pè nɛ sètõ-á mɛ ñ sɔkɔ.

19 Nte Névi Pídí wɔ-á pɔ, ñmɔ n yõ palle té n wɔ palle. Pè mɛ tõ nɛ, pè yah yèwònpɪ ànê sètẽ-á ñnɛ, mórí syípú ànê tyípèl pípú kódí-á ñnɛ. Nte Liyel lékãm-á n tɔkɔ à tyi nónónɛ n pi, sé pal n pne sé tõ n sah n pi ñkù sɔkɔ.

Yesu kàhnwɛkɪnɔɛ Kalile mara kwlo yĩsyó yõ

20 Képah náh, Yesu-á sõ ñ gbɪlnó kan pi kwlo nónó sɔkɔ, à tyah n kah n wɛkɪ sé névye yõ, pãh sõnpúɛ yahle pé tyípèl pínó yálnmɔnɔɛ. A nɛ:

21 «Pèkè mɛ yé yõ, Korasini tãn. Pèkè mɛ yé yõ, Betisayida tãn. Ngbõ gbɪl tyi nónó-á pi yé ñnɛ, sɛnkɔ-à sõ mɛ pi Tiri ànê Sidõ tãn ñnɛ, pè náhkɪ mɛ yèkwɔɪ flɔ mɔ, té náhkɪ mɛ pé piki syũɛ à pé tyípèl pínó yal mɔ di mónóɛ.

† 11:14 11.14 - Yah n tɛ Malaki 3.23.

22 Képah ye mé kéle n yo yé tyí, Liyel tukey tuke sōle, Tiri ànê Sidō tãñ‡ fōhnó nítē náh n peke n nɔ n pi yépi tyíle.

23 Té yépi-á dò Kapernayumi tãñ, yé se me n sō ne yáh kɪ dɔkɔ mɔ yĩnyō? Pólle, yé kɪ tiki mɔ yuku fós lékókwíl nyàh tē-nsah. Yé yah, gbíl nónó-á pɪ yé fɪnnɛ, sɛnkɔ-à sò me pɪ Sodɔmɪ tãñ tyí, Sodɔmɪ kwil náhki me sɛ kwey mè sɔkɔ.

24 Képah ye mé kéle n yo yé tyí, Liyel tukey tuke sōle, Sodɔmɪ kwil tãñ fōhnó nítē náh n peke n nɔ n pi yépi tyíle.

Wékínóle Sú Liyel tyí

25 Légbíne, Yesu ne nkɛ: «Bǒ, áwɔ nê-á yĩnyō ànê sétáh nétɛne, mé n wɛkɪ á tyí wáh sɔnpúle tyi nópi wɔbɪ yĩ pípú ànê lékám névye yah, té séle névye wɔ wɛkɪ nónó-á me wɛnpɪ sǒ.

26 Bǒ, kè ye áwɔ dyɔ á kè pɪ sɛ.»

27 Yesu tǒ ne: «Ñ Sú ye tyi pólle ní gbǒ dahbɪ. Nmɔ nê-á Pídíne, nnî yó nítē náh nne n pne né Sú ó náh. Nnî yó nítē tɔ náh mó Súle n pne né Pídí ó náh, à tahlɪ Pídí-à me ké tyí ne pé nne nê wɛkɪ.

Yesu-á yèvinu nêne névyele n kǒ

28 Yépi nónó pól-á me kwíónó sɔkɔ tókópèlle yé yǒ, yé pɔ nmɔ tyí, mé kɪ yé kǒ yé kɪ n mɪ.

29 Népir névi ànê gblǒy tíkínmɔ-ò ye nímɔle. Képah ye, máh yéle n mɔ tǒ nê sɔkɔ, yé kè fɛ syi

‡ **11:22** 11.22 - Tiri ànê Sidō tãñ-á sò pɪ Nsyifunɔ náh péle sɛ, Nsyifunɔ sò me péle n mɔ n kǒ tyípél kàhnɪpule. Yah n te Yesayi 23.

yé mó pɪ ní tò sáhpu̯le. Képah sɔkɔ, yé kɪ n wɛ n mɪ.

³⁰ Yé yah, nímo tò náh tah, ní tókóbí me fáhah fáhah.»

12

Yesu-á nê yo mɪ mɪ yòh tyí sɔkɔ

¹ Légbí mè ó sɔkɔ, mɪ mɪ yòh sɔ yóle Yesu ànê n tò sáhpu̯ sò me n kah sè mukɔ swɛy yísyó sɔkɔ. Té kwɛkɪ sò me n tò sáhpu̯ tɛ. Káh pɪ sɛ, pè mɪ de sè mukɔ ywɔ kòlɪntahnɔ sɔkɔ.

² Farisi wɛkì kópú-á képah wɛ sɛ, pè me yo Yesu tyí nɛ, tir nê pínó wɛkì náh me kɔnóle mɪ mɪ yòh sɔle, à nɛ n yah n tò sáhpu̯ kéle n pɪ lé.

³ Nte Yesu me yo pé tyí nɛ: «Kwɛkɪ-á lésɔ yòtɛ dí Davidi ànê n náh névye tɛ, wáh nê pɪ, yé náh kè kar yah di?

⁴ Búrn nónó-á lésɔ me sàhnóle Liyel tyí yò Liyel wòkò sɔkɔ, à náh lésɔ de ké sɔkɔ à sè tokò tah ànê n náh névyele di? Té à wil sárká syínwìlkìpu tyí sɔkɔ, ney náh lésɔ yñɛ sé táhnóle.*

⁵ Yé se kɪ nɛ yé náh kè kar yah tole nɛ, sárká syínwìlkìpu-á nkɛnɛ mɪ mɪ yòh dèlle n pɪ Liyel ní-ńsah gbò sɔkɔ mɪ mɪ yòh sònóle, té lékàh náh me pé tyí?†

⁶ Nte mé kéle n yo yé tyí, névi me ásò nê-á kal Liyel ní-ńsah gbòle.

* **12:4** 12.4 - Yah n tɛ 1 Samuyelɪ 21. † **12:5** 12.5 - Yah n tɛ Yáhnó 28.9-10.

7 Liyel kè yo ne níkě: <Sárká súkénkõno náh mé n yah n kõ dé, wě yãm yáhnó ye mé n yah n kõ.> Yáh sò me képah kórle n pne, yé náh náhku lékàhle lékàh kě névye kõ n pi.

8 Yé náh we di, Névi Pídí ye mi mi yòh yòtẽne dò.»

9 Yesu-á yal nénpó, à soko pé Liyel ní-nsah wòkò yó soko.

10 Gbònkù dí yó sò me nénpó. Té pè sò me ké tyí ne pé lékàh we Yesu kõ. Káh pi sě, pè Yesu piki yah ne níkě, yónwó dénmõno wěkì se me kõnóle mi mi yòh sòle ni?

11 Nte à me yo pé tyí ne: «Yé soko yó tyí kópó núkú ó-à me, té à soko de pwàhsùkù yó soko mi mi yòh sòle, tẽ se ki ye ñ kyínwìlkinóle lésòle?»

12 Nte névi náh fónfó kal náhnáh kópó yò di? Káh pi sě, pèpõri pínó wěkì me kõnóle mi mi yòh sòle.»

13 Képah tẽne, té yo gbònkù dí mè tyí ne: «Á gbò tõ.» A me kè tõ, kè núkú pi vile ké ní-ò mè sò.

14 Nte Farisi wěkì kópú-á fyò wil Liyel ní-nsah wòkò soko, pè kyí wě we à vî-nsah yah Yesu we n ko n mọ yinne.

Liyel-á nê yah wilki ne à pé tôle n pi

15 Yesu-á pọ pi ne Farisi wěkì kópú-á me pé kònmo-nsahle n yah n kõ, à yal nénpó. Névye náhnáh me ñ sò tẽ. A me pé soko yámpú pól de mọ,

16 té pè gbah sni ne pè káh pé tyí yáh ney tyí.

17 Yesu-á kápah pi, Liyel-á lésõ nê yo sah n tẽntõ syínyo-ò Yesayi tyí, kè wil. A lésõ ne níkě:

18 «Máh nê yah wilki ne à ní tòle n pi, à we yò. N nìdè ney ye ònne. Nmò ye ní nìvìnì yòle.

Mé kú ní Mirki tiki mò n yò,
à kò à kú gbí wěkì tyí yo yìkìni pól névye tyí.

19 A náh yékâb pi n pi neyne, à náh n gbo n mò
n tũ n pi,

ney náh n yínpõ noh n pi tówû tükè-ntàn soko.

20 Fílki nê-á me kwónmòntẽnóle, à náh ké téy
kwò n pi.

Fòtnò nê-á me n tyah nínóle, à náh ké téy ni n
mò n pi.

Sě ye à kú n pi, pópó kú pò nò gbí nê-á gbí wěkì
kú yah syi.

21 Té yìkìni pól névye gbò sàhnó kú me òmò
yò.»‡

Yesu tẽ we sétàn yòtẽ tyí

22 Kápah náh, nósyó dí yó tẽ pò Yesu tyí. Sétõ
sò me n soko à kò à pi yítũ ànê kèdòkìle. Yesu
me à de mò, à kò tẽ we n wèkú, té fẽ n yah.

23 Kápah tẽne, kè pi gbëndùnìne tówú pól tyí,
pè me tyah n yo wě tyí ne: «Té Davidi Pídí náh
yò lé?»

24 Nte Farisi wěkì kópú-á kápah tẽ noh sě, pè
ne sétàn yòtẽ Belsebuli ó gbò yò-á à n yìni
sétànne.

‡ 12:21 12.18-21 - Yah n te Yesayi 42.1-4.

25 Té Yesu-á pé fɔkɔ sɔnɔ wɛ sɛ, à yo pé tyí ne: «Yõtǒrí nê tɛ névye-à fyò yuku wɛne n fwo, kéne yõtǒrí kɪ yɪkɪ. Kwil nê névye-à yuku wɛne n fwo, kè náh n wũ n pi. Sɛ́ ó ye, kéte nê névye-à yuku wɛne n fwo, ké tɔ náh n wũ n pi.

26 Té sétàn yõtɛ-à tyah n nɔle n yĩni, n gblɔy náh à n fwo di? N yõtǒrí se kɪ wũ?

27 Té nímɔ-à me sétanne n yĩni Belsebuli gbò yò yé yo à; yépi tɪnkɪ névye wɔ-á dò, nê gbò yò me pépi n yĩni séle wé? Pépi nítɛ ye kɪ lékahlɛ yé kɔ.

28 Liyel Mirki gbò yò-à mé n yĩni séle, képah n wɛkɪ ne nkɛ, Liyel tǒrí-á yĩni tɛ yé tyí.

29 Tǎhkì-á me díſ nê sɔkɔ, nê kɪ fɛ n púkúbí-ńkɛ sɔkɔ, kɪ de n wòkò sɔkɔ kɪ n gbàn yí kwel? Máhah wáh kɪ à pukubi tɛ kɪ pyɛ de n wòkò yí kwel.

30 Névi nê-à mó-ńkɛne nímɔle, tɛ me nne n fwo. Névi nê náh me nne n yohnɪ n mɔ tükènmɔnɔ sɔkɔ, tɛ me kárkínóle n pi.

31 Képah ye, mé kéle n yo yé tyí ne: <Névye tyípɛl pól ànê pé Liyel gbyòno pól kɪ fɛ yò mɔ pè kɔ. Nte Liyel Mirki gbyòno tɛ wɔ náh n yò mɔ n pi pé tyí pólle.

32 Névi nê-à yo de Névi Pídí tyí, kè kɪ fɛ yò mɔ tɛ kɔ. Nte névi nê-à yo de Liyel Mirki tɛ wɔ tyí, kè náh yò mɔ tɛ kɔ n pi kwɛyne, kè náh yò mɔ tɛ kɔ n pi nsò tɔle.>

ſ 12:29 12.29 - Dí nê tyí-á yo ásò sɔkɔ yò, sétàn yõtɛ ye pè n ye.

³³ Yé yah, séswô n pne ké pye dùkù sòkò. Yâh ne séswô nê-á me ple, yé ne ké pye to-á me ple. Yâh ne séswô nê nâh me ple, yé ne ké pye to-á me kétúkùyô.

³⁴ Wáhnmíró nópi, tyípéplò se kí fě n wil yé vyěy sòkò té yé nno mó tō me yúkúnóle pèkèlè? Névi ni-á me yúkúnóle tyi nónónè, sépi ye n wil tě vyāh sòkò dò.

³⁵ Népépěy tyípéplò n wil ò ni sòkò. Nétúkù tyítúkùnì tó mó n wil ò ni sòkò.

³⁶ Nte mé kéle n yo yé tyí, yah kě wèlò nónó pól-á névye n wèkì, sé ywō kí piki n yah n pi pé tyí Liyel tukey tuke sōle.

³⁷ Tukey kí tuke á yō à yīne á vyāh weyne kí gbìle ò kō, kèpah nâh pí kí lékàhle ò kō.

Névye me kéle n yah n kō Yesu tyí ne à gbìl yó pí, nê-á n wèkì ne wāh n wil Liyel tyí

³⁸ Kèpah sòkò, Liyel tyi kònsàhnó kwópú ànê Farisi wèkì kópú yísyó me Yesu syah ne, pé kwó-ò dí, pâh me ké tyí ne à gbìl yó pí pé yah, nê-á n wèkì ne wāh n wil Liyel tyí.

³⁹ Á me yo pé tyí ne: «Kwey gbì névye nâh ple. Pè nâh me tě Liyel ó tyí yō. Pè me ké tyí ne mé gbìl yó pí pé yah. Nte kèyāh ntě nâh pí pé wèkì n pi, à wil Liyel těntō syínyo-ò Nsyonasì tyí sòkò.

⁴⁰ Yé yah, sō-á lésō Nsyonasì sèpìn tōnì pí yěnkô-ñgběkì yó fòkò sòkò,* sě ye Névi Pídì tó kí sèpìn tōnì pí sétáh sōwāh.

* **12:40** 12.40 - Yah n te Nsyonasì 1.17.

41 Nsyonası-á lésõ Liyel tẽntõ yo Ninivi kwil tãn tyí, pè fẽ syi pé tyípèl pínó yal mɔ. Nte ney me ásõ nê-á kal Nsyonasıle. Kãh pı sẽ, Liyel tukey tuke sõle, Ninivi kwil tãn kı yuku kwey gbĩ névye yõ, kı lékãhle pè kõ.

42 Pi nê-á lésõ yõtẽne Saba sétáh yõ, à lésõ wil fíí sétáh yĩn tyí, à pɔ yõtẽ dí Salomo lékãm welo noh.† Nte ney me ásõ, nê-á kal Salomole. Kãh pı sẽ, Liyel tukey tuke sõle, kéné pi kı yuku kwey gbĩ névye yõ, kı lékãhle pè kõ.

Sétõ syĩnpɔndenɔle névi sɔkɔ

43 Sétõ-à wil névi sɔkɔ, à n kyı gbẽnnı kɔ n kõ, ñ m̀-ñsah yah n kõ. Nte wàh wé-ńkẽne,

44 à n yo ñ gblóy tyí ne, páh sõ wil nyãh sɔkɔ, páh kı pé syı yuku nénpó. Wàh ñ syı, té kyı ñ tẽ-ñsah dyàh we ké kókóle yàlntõnsàhnóle,

45 à n kyı sé no sétännó kwãrnino syah, nónó-á peke kal ñmɔle. Sé tóó n kyı n de n tẽ tẽ sɔkɔ. Kàh pı sẽ, tẽ mè òkù ké syı n peke n kal ñ gben tẽne. Sẽ ye kwey gbĩ népèl tɔ tyí kı n pı n pi.

Nónó me Yesu yú ànê ñ yúnpyéle?

46 Yesu-á me képah yónó sɔkɔ tówù tyí, ñ yú ànê ñ yúnpyé pɔ yĩn kégbó té me ké tyí ne pé yo mɔ ñ tyí.

47 Nnı me yo ñ tyí ne à noh yò, ñ yú ànê ñ yúnpyé-á me yíntẽnóle kégbó. Pãh me ké tyí ne pé yo mɔ ñ tyí.

† 12:42 12.42 - Yah n te 1 Yõtãm 10.1-13.

48 Yesu me yo tẽ tyí ne: «Nê me n̄mɔ n̄le, ànê nónó me ní yúnpyéle?»

49 Té n̄ gbõ nɔ mɔ n̄ tò sáhpú tyí té ne nkẽ:
«N̄mɔ n̄le ànê ní yúnpyé we yò.

50 Yé yah, n̄mɔ Sú nê-á yĩnyõ, wãh me nê tyí, névi nê-à képahle n pi, tẽ wɔ ye n̄mɔ yúnpile, képah nãh pi ní n̄le.»

13

Sèmirkì nê-á yãh sèmuƙo mîr-ò tyí yõ

1 Lésõ mè óle, Yesu wil gbô sɔkɔ à kyɪ kõ tẽ yó-̀ngbẽ gbòpɔ.

2 Tówû ñgbẽ yó me pɔ à mɔ gbĩ. Pé tnónkàhnó tẽ tyí, à de kõ tẽ krótókè yó sɔkɔ. Tówû pól sò me yínttẽnóle yóngbalɪ sɔkɔ.

3 A sò me tyi náhnãhle n yãh pé tyí sèmîrn sɔkɔ, me n yo pé tyí ne: «Sõ yóle, dí yó lésõ kyɪ sèmuƙo mîr-̀nsah ñ swãh sɔkɔ.

4 Wãh me mîrnó sɔkɔ, yísyó syɪkɪlɪ wẽgbalɪ sɔkɔ, kèpye me pɔ sépi yɔ.

5 Yísyó me syɪkɪlɪ yen kwéy tẽ-̀nsah légbí yõ. Té kãh pi yen gbɪ nãh sò me nénpó sɛ, sè núkú fi súú.

6 Té sè nãh tẽ we yãhnì gbɪ mɔ. Kãh pi sɛ, gbĩ-á pɔ vyãh sè tẽ, sè kɔkɔ.

7 Yísyó me syɪkɪlɪ de pãn nɪyó, pãn me yuku fyãh sé yõ.

8 Nte yísyó me syɪkɪlɪ sétáh pèpɛy sɔkɔ à pɔ ywõ pi. Túkù pyenɔ lèkwěkwɛ pi, túkù tikitõnítõnɪ pi, túkù yõgbãmbãmbã pi.

9 Nê-à kɪ mɛ kè noh, tẽ kè tẽ yĩn.»

Tir nê yĩn mɛ Yesu n yãh névyɛ tyí sèmìrn sɔkɔ?

10 Képah sɔkɔ, ò tǒ sáhpú mɛ no de ò tnô té à piki yah nɛ, kwâh nê se pi té à n yãh no nópɪ tyí sèmìrn sɔkɔ nɪ?

11 A mɛ yo pé tyí nɛ: «Liyel tǒrí tyi nónó-á sò mɛ wǒbìnsàhnóle, sé pnèno ye yépi kǒ. Nte kè náh pépi wɔ kǒ.

12 Névi nê tyí kwâh-á mɛ, dòhnìnó kɪ n pi òmɔ tyí yǒ yrǒyrǒ. Té névi nê tyí kwâh náh mɛ, kwéy nê nítě-á mɛ ò tyí, kè kɪ tẽ syi ò tyí.

13 No nópɪ mɛ n yah, té pè náh mɛ kwâh yóle n wɛ, képah n wěkɪ nɛ pè náh mɛ ké tyí yahle n wɛ. Pè mɛ pé níne n kwɔ, té pè náh mɛ kwâh yóle n nohnɪ, képah n wěkɪ nɛ pè náh mɛ ké tyí yahle n wɛ. Képah ye ní kǒ mé n yãh pé tyí sèmìrn sɔkɔ.

14 Liyel tǔntǔ syínyo-ò Yesayi-á lésǒ nê yo sah, képah ye n no péle yò. A lésǒ nɛ nkě:

<Yé kɪ yé níne n kwɔ n nohnɪ, té yé náh ké tyí yah wɛ n pi.

Yé kɪ n yah, té yé náh kwâh yó wɛ n pi, képah n wěkɪ nɛ yé náh mɛ ké tyí yahle n wɛ.

15 Nikisekókó névyɛ ye no nópɪle.

Pè mɛ pé ní tah tũ,

té pé yí vike sah

nɛ sè káh kwâh yó nítě wɛ,

pé ní káh tir yó nítě noh

pé kǒ pé káh fě ké tyí yah wɛ,

pé mó vi mɔ Liyel wěkì yǒ

ní kǒ mé pè wɛ n de n mɔ.>

16 Welo nópi yóntenɔ náh, Yesu tǝ yo pé tyí ne: «Ñte yépi tǝ wɔ tyí nɔ, yé yí me n yah, yé ní me n nohni.

17 Kégbi yǝ mé kéle n yo yé tyí, yáh tyi nónó we, Liyel tǝntǝ syínyopu ànê névye nónó-á néglǝle Liyel yah, pé náhnáh sǝ me ké tyí ne pé sè we, té pè náh sè we. Yáh tyi nónó noh, pè sǝ me ké tyí ne pé sé tɔ noh, té pè náh sè we noh.»

Sèmirkǝ kórlɛ, nê-á yǎh sèmuƙɔ mǐr-ò tyí yǝ

18 «Sèmuƙɔ mǐr-ò sèmirkǝ yǝ-á nêne, yé yé ní sah kè noh:

19 Névye nónó-à Liyel tǝrí tyí yónó noh té pè náh ké dùkù pǝ, sétǎn yǝtǝ n pɔ wey mè wilki pé fɔkɔni sɔkɔ. Pè me wǝgbali tyí kǝle nýǎh sɔkɔ-á sèmuƙɔ syikili.

20 Túkù me légbí yǝ tyí kǝle, nýǎh sɔkɔ-á sèmuƙɔ mir mɔ. Pépi-à wey mè noh, nénpó swɔ pǝ kè fǝ n syi nìvìnì sɔkɔ.

21 Té pè náh n ye kè yǎhnène n mɔ pé sɔkɔ. Pǝ kè fǝ n syi nénpó swɔ ó sɔkɔ. Té yèvyǎhri, képah náh pi fǝhnó-à núkú pè yǐni tǝ kéné wey yǐnne, pǝ pé náh vi kè kǝ súú.

22 Túkù me pǎn tǝ-nsah tyí kǝle, pàh wey mè noh, kèkǝyó tyi fɔkɔ sǝnɔ ànê tahrɪ dékè n pɔ ké yah kǝ, kè náh n tǝ n we tirlɛ n pekɪ pé tyí.

23 Túkù wɔ mó me sétáh pèpey tyí kǝle, pépi-à wey mè noh, pǝ ké dùkù pǝ, yǝre n we ké tyí sèmuƙɔ tyí kǝle, nónó-á pyenɔ lèkwékwɛ pi, ànê nónó-á tikitǝnítǝni pi, ànê nónó-á yǝgbǎmgbǎm pi.»

Sèmìrkì nê-á yāh filkì tyí yō

²⁴ Yesu tō sèmìrkì yó yāh pé tyí ne níkě: «Yé yah, Liyel tǒrí-á kɪ fě tɔkɔ sāh sèmìrkì nêne, kè we yò: Dí yó lésò sèmukɔ duku pèpɛy mir mɔ ñ swāh sɔkɔ.

²⁵ Té névye-á pɔ do gbí nêne, ñ sépe kyɪ filpyé mir dah mɔ kɔ́ ké sɔkɔ nê-á me ké kètòle, té ñ nāh vi sɔkɔ.

²⁶ Kāh pɔ kyāh té n dubi gbí nêne, filkì tɔ ké yō wilki mɔ kwèy.

²⁷ Sètě dí tǒnrɪbɪ-á kè kyomɪ we sě, pè me kyɪ kè yo pé yòtě dí tyí ne níkě, pé yòtě, sèmuko duku pèpɛy-á se sò à mir mɔ ñ swāh sɔkɔ; té kè se pɪ sǒ té filkì tɔ pɔ n we ké sɔkɔ nɪ?

²⁸ A me yo pé tyí ne, sépe yó tò vyāh-á kèpahle. Pè me ne, à se me ké tyí ne pé kyɪ sè viki nɪ?

²⁹ A me ne ǒǒ-á. Nkě pàh kɪ ne páh séle n viki, sèmukɔ tɔ-á kɪ syah n kwɔɔ n mɔ n viki séle.

³⁰ Pè ye sé yō sè ne n kyāh wě tyí kè syi pɔ n nɔ sèmukɔ tɔkɔ gbí tyí. Té sèmukɔ tɔkɔ gbí-à kɪ pɔ nɔ, páh kɪ yo sèmukɔ tókópú tyí ne pé filkì ñgbò kò, pè mó sè pukubi pbo pbole pé kyɪ n suke. Té sèmukɔ wole, pè kèpah tɔkɔ n mɔ pé dúkúrí sɔkɔ.»

Sèmìrn nónó-á yāh mútárdì pi ànê kókónó tyí yō

³¹ Yesu tō sèmìrkì yó yāh pé tyí ne: «Yé yah, Liyel tǒrí-á kɪ fě tɔkɔ sāh sèmìrkì nêne, kè we yò: Dí yó lésò mútárdì pi tɔkɔ duku mɔ ñ swāh sɔkɔ.

³² Képah yilo kal yípyé pólle. Té kàh fi, kè n pɪ gb̀lò kal sèmukɔ duke pólle. Kè n pɪ sésuwô sɔ́, kèpye n pɔ syè pɪ ké ỳngb̀an tyí.»

³³ Képah nàh Yesu t̃ sèmirkì yó yãh pé tyí ne: «Yé yah, Liyel t̃rì-á kɪ f̃ t̃kɔ sãh sèmirkì nêne, kè we yò: Sê yó lésõ kókónó t̃kɔ mɔ t̃kɔ yí t̃nó mífáhkì sɔkɔ, ké pól k̃ kè d̃kɔ.»

Yesu sèmìrn yáhnó yòle

³⁴ Yesu s̃ m̃e tyi nópi pólle n yãh tówû tyí sèmìrn ó sɔkɔ. A nàh s̃ m̃e tir yó òt̃ene n yo pé tyí né sèmìrn sɔkɔ nàh.

³⁵ A képah pɪ Liyel t̃nt̃ò syínyo-ò tir yónsàhnó k̃ kè wil. A lésõ ne òk̃e: «Mé kɪ tyile n yo sèmìrn sɔkɔ. Tyi nóno-á s̃ m̃e w̃b̀insàhnóle kèk̃yó m̃o gbí d̀ukule, mé kɪ névyè níkí yíkí séle.»*

Sèmìrkì kórl̃e, nê-á yãh filkì tyí yõ

³⁶ Képah t̃ene, Yesu yal tówû tñ à sɔkɔ gb̃o. N t̃ò sáhpú me nɔ de ò tñ té yo ò tyí ne, swãh sɔkɔ filkì sèmìrkì nê-á s̃ à yãh, à ké yõ yo pé syah.

³⁷ A me yo pé tyí ne: «Sèmukɔ duku pèpey m̀rnm̃-òle, Névi Pídí ye.

³⁸ Swãhle, kèk̃yó ye. Sèmukɔ duku pèpeyne, Liyel yòt̃rì sɔkɔ w̃np̃i ye. Fílkile, sét̃an yòt̃ nàh névyè ye.

* **13:35** 13.35 - Yah n t̃e Gbálnó 78.2.

39 Sépe nê-á mir dah mo filpyéle, sétàn yòtë ye. Sèmuco tókónóle, kèkõyó tyénó ye. Sèmuco tókópúle, yînyõ tònpi bi ye.

40 Sõ-á pè filki viki n suke nyàh soko, sènkõ ye ki n pi n pi kèkõyó tyénó to soko.

41 Névyé nónó pól-á névyé yõle n yuki n mo pèkè pínó soko, ànê nónó pól-á tyítúkúni pípúle, Névi Pídí ki n yînyõ tònpi bi teki n mo n pi, pè ki po pè wilki n tórí tyah soko.

42 Té ki pè min dah mo sîнки nyàh soko, nýãh soko-á gbní ànê yní táhnó ki me.

43 Nte névyé nónó-á me négbólóle Liyel yah, pépi wo ki n tẽ pé Sú Liyel tórí soko, gbí tyí kõle. Nê-à ki me kè noh, tẽ kè tẽ yîn.»

Sèmìrn nónó-á yãh tahrì wõbìnsàhnó ànê pérlì tyí yõ

44 Képah náh, Yesu tõ yo pé tyí ne: «Yé yah, Liyel tórí-á ki fè toko sãh sèmìrkì nêne, kè we yò: Dí yó lésõ kyì wil mo tahrì wõbìnsàhnó yó yõ swãh yó soko, té kè toko tõ wõbi. Ké wénó nìvìnì tẽ tyí, à soko à kyì n gbãn yì pól yãm à po swãh mè dwe.

45 Yé yah, Liyel tórí-á ki tõ fè toko sãh sèmìrkì nêne, kè we yò: Gbò yí-ò yó lésõ me, nê-á yì kètárnó yísyóle n yah n kõ, pè n ye pérlìnóle.

46 Wãh po ké dénkókò yó we, à kyì n gbãn yì pól yãm à po kè dwe.»

Sèmìrkì nê-á yãh yẽnkyo tẽ tẽ mno tyí yõ

47 «Yé yah, Liyel tǒrí-á kɪ fě tɔkɔ sãh sèmĩrkĩ nêne, kè we yò: Nósyó lésó yěnkɔ tẽ tẽ mno min dah mɔ yɔ sɔkɔ, à yěnkɔ duke pól tẽ.

48 Kãh yuku, pè kè yɔrɪ wilki pɔ kènkwãh yõ, té kǒ tẽ à yěnkɔ gblɔ wah mɔ dú sɔkɔ, té sé tɛ́lɔ milki.

49 Sě ye kɪ n pɪ n pi kèkõyó tyénó tɔ sɔkɔ. Yinyõ tɔnpɪbɪ kɪ pɔ nɛ́túkúñi wah wilki négbɔ sɔkɔ,

50 kɪ kyɪ pè min dah mɔ sɪnki nyàh sɔkɔ, nýãh sɔkɔ-á gbñí ànê yní táhnó kɪ me.»

Kwónó kedyãh ànê kwónó késãnnɛ

51 Képah náh Yesu tǒ yo ò tǒ sãhpú tyí nɛ: «Yé se tyí nópi pól noh wah?» Pè me nɛ àwe-á.

52 Képah sɔkɔ, à me yo pé tyí nɛ: «Liyel tyi kònsàhnó kwópú nónó-á sǒ kwónó we sɔkɔ Liyel tyi kònsàhnó tyí yõ ògbòle, té tǒ pɔ kwónó we Liyel tǒrí tyí yõ núkúnúkú, té névyele n kwɔ séle, pépi me kéte tẽ yó sǒ, nê-á yídĩ sǒ me ò tyí ò dúkúrí sɔkɔ, té à tǒ pɔ snó we dohnɪ sé yõ, té me séle névyele n kǒ.»

Nasareti tãn yahle sěńóle Yesu yõ

53 Té Yesu-á sèmĩrn nópi yãh te pé tyí gbí nêne, à yal nénpó

54 té sɔkɔ ò kwil sɔkɔ. Wãh kyɪ nénpó, à kyɪ kwónóle n pɪ pé Liyel ní-ńsah wòkò sɔkɔ, fóó no pól gbã du ò tyíle. Pè sǒ me yo tũ nɛ, à se we nýãh lékám ànê tẽnwenɔ mènɛ, à fě gbíl nópile n pɪ ni?

55 Nmɔ kó sésár sé-ò pídíne ni? N yú yĩn kó Marile, té ò gběndípi me Nsyaki, ànê Nsyosefu, ànê Simo, ànê Nsyudele ni?

56 Té ò dósýó pól kó me pépile ásô yò ni? Nte nyãh tẽ ó se òmɔ we lékám ànê tẽnwenɔ mène ni?

57 Képah sɔnɔ sò me pé yò yiki pé kò pé tẽ sɛ kwlo Yesu yò. Képah sɔkɔ, Yesu me yo pé tyí ne: «Liyel tẽntò syinyo-ò kwil ànê ò kéte sɔkɔ ó ye pé náh òne n mɔ n kò Liyel tẽntò syinyo-òle.»

58 Páh yahle sɛnóle Yesu yò sɛ, à náh mó gbílnó náhnáh pi nénpó.

14

Wèlnwìlki-ò Nsyõ kúnóle

1 Légbíne, Kalile mara yòtẽ dí Yerɔdɪ Yesu tyí yónó noh,

2 té yo ò tònpiɓi tyí ne, Wèlnwìlki-ò Nsyõ-á yò tótó. N lékó-á yilki mɔ. Képah-á tẽnwenɔle ò tyí à fɛ gbílnóle n pi.

3-4 Yé náh we di, ògbòle, Yerɔdɪ lésò ò gběndí Filipi kyɪ Yerɔdyadɪ tẽ syi. Nsyõ me kè yo ò tyí ne, ké yah náh à à tɔkɔ. Pi mè yinne, Yerɔdɪ me pé kò pé Nsyõ tẽ à kárn mɔ ò tyí, té à dah mɔ sah wòkònpèkè sɔkɔ.

5 A lésò me ké tyí ne pé Nsyõ ko mɔ. Nte tówù-á lésò me Nsyõne n mɔ n kò Liyel tẽntò syinyo-òle sɛ, pépi yah tíkí me à tẽ.

⁶ Nte Yerɔɔɔ dúbínó yòh vìnpono syáh syah sòle, Yerɔɔɔyadı písê yǒ yi néyénó yah sɔko. Kè me no Yerɔɔɔ tyí,

⁷ fós à n vyähle à kǒ, té n wo n tyí ne wàh kɔ sǒ kwáhdúkú nê yah kǒ pé tyí, páh kɔ kéle à kǒ.

⁸ Képah sɔko, pípír yú me à kurki mo à kǒ à yo Yerɔɔɔ tyí ne, à Wèlnwǐlki-ò Nsyǒ yǒle pé kǒ ásô dú pyahro yó sɔko.

⁹ Képah tēne, kè yǒtē dí yah kwɔ. Nte n wónó mè yinne n néyénó yí yah, à ne pé po kéle à kǒ.

¹⁰ Té pé kǒ pé kyɔ Wèlnwǐlki-ò Nsyǒ yǒ kām wòkònpèkè sɔko.

¹¹ Páh kè kām, pé kè dah mo dú pyahro yó sɔko à po pípír kǒ, à me kè syi kyɔ n yú kǒ.

¹² Nsyǒ tò sáhpú me po n lékó tɔko kyɔ yí, té kyɔ ké yah yo Yesu syah.

Népi kèyò nínó kyegbām (5 000) kénkǒ púnóle Yesu tyí

¹³ Yesu-á yí mè noh sǐ, à de krótókè yó sɔko ànê n tò sáhpúle pé yal nénpó, à yuku gběnnɔ tyah yó sɔko à kyɔ tǐ pé yahle. Tówû-á pé sókónó tyí noh nyáh sɔko, pé wil kwlo kwlo sɔko à pé nyáh sǒ gbáhkì yǒ.

¹⁴ Yesu-á wil krótókè sɔko té tówû ñgbě we sǐ, pé yām à tǐ. A me pé yámpú de mo.

¹⁵ Nví-á po no, n tò sáhpú no de n tnô té yo n tyí ne, gběnnɔ tyah sɔko-á péle yò. Té lékâh-á me n tyah mónóle, à kó tówûle n fin n mo pé kyɔ yǒ yǒ yíle n yah n dwe kwlo sɔko n?

16 Yesu me yo pé tyí ne, yõ náh me ké tyí pé soko. Pépi yõke yah pé gblõy pé kã pé yõ.

17 Képah soko, pé me yo ñ tyí ne, búrn pló kwló ànê yẽnkyo pló nínó ó-á me pépi tyí ásô dò.

18 Yesu me yo pé tyí ne, pé sè tãko n po pé kã ásô.

19 Té me tówú kã pé kã tẽ filkĩ yõ, té búrn pló kwló ànê yẽnkyo pló nínó nópi tãko, té ñ yah yõ yĩnyõ à weki Liyel tyí, té sè kwoki mo ñ tò sáhpú kã pé syi tówú kã.

20 Pé pól me yõ tã, té pé me pé yõnkwlono téló tuke mo vyó gbõninó yĩne.

21 Té nónó-á sò yõ yõke mène, pé sò me díbí népĩ kèyõ nínó kyegbãm (5 000) kénkõle syó ànê wẽnpĩ vyãh kẽne.

Yesu kónóle Kalile yó-ñgbẽ yõ

22 Képah náh, Yesu núkú ñ tò sáhpú gbah tẽ ne pé de krótókè soko, pé mo pé yahle yó-ñgbẽ kahnne, péwo mó tówú fin mo.

23 Wãh pé fin mo te, à doko yuku yõli yõ à kyi tẽ ñ tyíle à Liyelle n ni. Lékãh mo po à we ñ gblõy nénpo.

24 Té légbĩne, krótókè sò me gbe mo te yo vyãhle náhnáh. Té yáhkí sò me péle n yohni. Kãh pi sã, ni sò me krótókèle n kah n fwo.

25 Tyah dal gbĩne, Yesu tyah n ko n yuku pé tnô yo yõ.

26 Pǎh à we à n kɔ n pi yɔ yõ sě, pé sǎm yɔkɔ. Pè tyah n yo ne lékó mírki yó-á. Tě tyah n de n syi tíki tě tyí.

27 Nte nénpó swɔ, Yesu me yo mɔ pé tyí ne, pè pé ni syǎh. Péwɔ-á, pè káh tíki pi.

28 Képah sɔkɔ, Pyeri me yo ñ tyí ne, Tě ñgbě, ñmɔ-à ku nê nítyínɔ, à péwɔ kǔ pé wil kɔ pɔ ñ tnô yɔ yõ.

29 Yesu me yo ñ tyí: «Pɔ!» Pyeri me wil krótókè sɔkɔ à tyah n kɔ n yuku Yesu tnô yɔ yõ.

30 Nte wǎh pɔ kè kyɔmɔ we ne yǎhkí-á me n kah n pi, tíki à tě. Képah sɔkɔ, à tyah n tiki n de ni sɔkɔ té de syi ne, Tě ñgbě, à pé pwah mɔ oo!

31 Nénpó swɔ Yesu núkú ñ gbõ nɔ à à tě té yo ñ tyí ne, à nǎh sě péwɔ yõ fwóó ló. Sǔ se pi té à n sǔ tòtò ni?

32 Tě pè me de krótókè sɔkɔ, yǎhkí núkú yǐn.

33 Nónó-á sǔ me krótókè mè sɔkɔ, pè gbètukunɔ di Yesu yah té yo ñ tyí ne, kègbɔ yõ, ñmɔ-á Liyel Pídíne.

Yámpú dénmɔnɔle Yenesareti sétáh yõ

34 Yesupi-á yó-ñgbě kah te, pè de Yenesareti sétáh yõ.

35 Nénpó tǎn me à yah pĩ, té núkú ñ pónó yo soh mɔ nénpó tǐn tǎn pól tyí. Pè me pɔ pé yámpú pólle ñ tyí.

36 Tě ñne n ni ne, à ye pé kǔ pé tũ ñ fwòmɔni vyǎh ntě ó tyí. Té nónó pól-á fyò tũ ké tyí, pè de.

15

Tyi nónó-á kɪ fě névi silki Liyel yah

¹ Képah sokɔ, Farisi wěkì kópú ànê Liyel tyi kònsàhnó kwópú wil Yerusalemɪ kwil sokɔ à pɔ Yesu tnô, té à syah ne nkě,

² sɔ se pɪ té n tò sáhpú náh me n kɔ lékóló wãldĩ yõ nɪ? A ne n yah pè yãrɛ n yõ, té pè náh se mó tɔ pé gbàn wu à yĩne pé wãldĩle lé.

³ A me yo pé tyí ne: «Té yépi wɔ-á dò, sɔ pɪ té yé wãldĩ yĩnne, yé náh me n kɔ Liyel tyi kònsàhnó wãl yõ?

⁴ Yé yah, Liyel kè yo ne nkě: «Yòyénne n sah á sú ànê á yú yõ.»* Té tɔ kè yo ne nkě: «Névi nê-à wèntùkù wɛkɪ n sú tyí, képah náh pɪ n yú tyí, tẽ yĩne kònmonɔɛ.»†

⁵ Nte yépi wɔ n mó ne, névi nê-à yo n sú képah náh pɪ n yú tyí ne, kwâh nê-á sò me pé tyí n yohnɪ n mɔ mɔ tẽne, páh képahɛ Liyel kɔ tɛ,

⁶ n dúbí-ò mè yòhnìnmonɔ kɔlɪ náh tɔ me n yõ. Kàh pɪ sɛ à, Liyel tyi kònsàhnó náh yé yɪkɪ yé wãldĩ yĩnne di?

⁷ Vyáhsesyírí névyé nópɪ, Liyel-á lésɔ Yesayi kɔ à nê yo sah, képah ye yépi n pɪ yò. A lésɔ ne nkě:

⁸ «No nópɪɛ, vyãh ó sokɔ ye pè n gbilki nímɔɛ. Nte pé nno me fíí nne.

⁹ Pãh kwónóɛ n pɪ tyi nónó yõ,

* 15:4 15.4 - Yah n te Yálnó 20.12. † 15:4 15.4 - Yah n te Yálnó 21.17.

névye yah yíi tyi kònsàhnó ye séle.

Képah ye, gbílkinó nê-á pè n gbilki n pɔ nne pè
yo,

nónó ye kéle.»‡

¹⁰ Képah sɔkɔ, Yesu tówû mɛ ye tuke té yo pé tyí ne: «Yé yé ní kwɔ n noh palle, yè welo nópi syíkí-ńsah pĩ.

¹¹ Yí nónó-á n de névi vyãh sɔkɔ, sépi náh n silki ñne Liyel yah dé. Welo nónó-á n wil ñ vyãh sɔkɔ, sépi ye n silki ñne.»

¹² Képah tɛne, ñ tò sáhpú me nɔ de ñ tnô té yo ñ tyí ne, à kó pĩ ne ñ welo nónó-á sò sé yey mɔ Farisi wɛkì kópú tĩne, sãh pè kah yo ni?

¹³ A me yo pé tyí ne: «Yèh nónó pól tɛ-á fyò me, té ní Sú nê-á yĩnyõ ñmɔ sónó náh séle, sè ki viki to.

¹⁴ Yé ye pé yõ. Yítûbi ye péle, nónó-á me pé no yítûbi yahle n tɛ. Té yítû-à mó tã ñ ní-ò yítû yah tɛ, pé ními ki syiki de pwãh yó sɔkɔ.»

¹⁵ Képah sɔkɔ, Pyeri me yo ñ tyí ne, wãh sò ne pé pé ní kwɔ welo nónó noh palle, à sé kór yo pé syah.

¹⁶ A me pè syah ne: «Lékám kɛ névye se yépi tɔle?

¹⁷ Yé náh pĩ ne yí nónó pól-á n de vyãh sɔkɔ, sãh níkɛne n syõ kèkùrkì sɔkɔ, ñ té n pyɛ n pɔ n wilki n kwɛ kèdúkúdahki sɔkɔ di?

¹⁸ Nte welo nónó-á n wil vyãh sɔkɔ, sé sò n wil sònɔ sɔkɔ. Sépi ye n silki névile Liyel yah.

‡ 15:9 15.9 - Yah n tɛ Yesayi 29.13.

19 Névi lékám soko ye sōno túkúni n wil, ànê nékókè mónóle, ànê fòfíkì pínóle, ànê pròprò pínóle, ànê yĩbele, ànê mìnì yónóle, ànê gbyole.

20 Kéne tyi wo ye n silki névile Liyel yah. Nte névi-à n gbǎn wú-íkēne à yĩne wǎldi-á kè yo sǒ té yǒke yǒ, képah nǎh n silki tēne.»

Sê yó písê dénmwone nê nǎh pi Nsyifulé

21 Képah nǎh, Yesu yal nénpó té soko Tiri ànê Sidō sétáh yǒ.

22 Té pi yó sǒ me nénpó nê-á Kanah neyne. Nmō me pō Yesule yúkey té me n de n syi, me yo tũ n tyí ne pé Tě ñgbě, ñmō nê-á Davidi Pídine, à pé yām yah. Nkě sétō yó-á me pé písê soko me ñne n kwlo kèpékèyō.

23 Nte Yesu nǎh dahbi wilki n tyí. N tǒ sáhpú me nō de ñne té kè yah kō n tyí ne, à pi mè kō à n syi pé nǎh, à káh pé sǒ tē ne n de n syi n yuku sě.

24 Yesu me ne, Liyel-á pé tekì mō Yisrayel no ó yinne, pépi nónó-á me képyénì mǒnpuno sǒ.

25 Nte pi me nō pō n gbètukuno di n yah, té yo n tyí ne pé Tě ñgbě, à pé yohni n mō.

26 Yesu me à syah ne, ké yah nǎh pè wěnpì yǒke toko n mō pǎhnpye kō.

27 Pi me yo n tyí ne, gbi-á à yo pé yǒtě. Nte pǎhnpye wō-á n yǒ sé nátām yěnmîrn yónkwenole.

28 Képah soko, Yesu me yo n tyí ne: «Pi, á sě yíí ñmō yǒ dé. Wáh nê yah kō, Liyel kɪ kè pi á tyí.» Légbí mè ó soko, pi písê núkú de.

Yámpú náhnáh dénmɔnɔle

²⁹ Képah náh, Yesu yal nénpó à yuku Kalile yó-̀ngbê gbòpɔ. Té dɔkɔ yuku yóli yó à kyi kɔ tẽ.

³⁰ Képah tẽne, nékwínkí pé yámpú tẽ pɔ ò tyí à pɔ pè sah ò yah sɔkɔ. Túkù sɔ me gbáhkí núkú névyele, túkù me yítúbile, túkù me nédónène, túkù me kedyò̀nìne, à tahlì yámpú túkù tyí. Té Yesu me pè de mɔ.

³¹ Kè pì gbè̀ndùnìne tówù tyí, pãh kedyò̀nì we pè me fẽ n wekì, nédónè dónónɔ me tye, gbáhkí núkú névye me fẽ n kɔ tómtóm, té yítúbì me fẽ n yah. Képah tẽne, pè gbílkinó sah Yisrayel Liyel yó.

Yesu tɔ tówù ògbê pu

³² Yesu ò tò sáhpú ye, té yo pé tyí ne, tówù mè yãm-á me péwɔ tẽ. Pé sèpìn tònì-á péwɔ náh sɔkɔ kweyne yò, té yó yó kwâh náh se pé tyí. Pé náh me ké tyí ne pé pè fin n mɔ pè sɔkɔ kwekile. Pé túkù-á kì kyì n syah n tẽ n kwlo wèkì yah.

³³ Képah tẽne, ò tò sáhpú à syah ne, pé se kì we nyãh yòkele gbènnì mè sɔkɔ, kì fẽ tówù mè dùkù kɔ pè kì yó tɔ nì?

³⁴ Yesu me pé piki yah ne, búrn pló sɔ se me pé tyí nì? Pè me ne kwãrninɔ-á, à tahlì yènképì yísyó tyí.

³⁵ Képah sɔkɔ, à tówù kɔ pè kɔ tẽ sétáh.

³⁶ Té búrn pló kwãrninɔ ànê yènkýo nópi tɔkɔ, té wekì Liyel tyí, té sè kwokì à ò tò sáhpú kɔ pè syi tówù kɔ.

37 Pé pól me yõ tõ, té pè me pé yónkwlonõ
tuke mɔ tɔkɔ yí kwárninɔle.

38 Té nónó-á sò yõ yõke mènɛ, pè sò me díbí
népî kèyõ nínóle (4 000), syó ànê wěnpî vyāh
kěɛɛ.

39 Képah náh, Yesu tówû fin mɔ pè sɔkɔ, té me
de krótókè sɔkɔ à sɔkɔ Makadã sétáh yõ.

16

*Névyɛ me kéle n yah n kã Yesu tyí ne à gbíl yó pi,
nê-á n wěki ne wāh n wil Liyel tyí*

1 Farisi wěkì kópú yísyó ànê Sadusi wěkì kópú
yísyó nɔ de Yesu tnô ne pé à mɔ yah. Té à syah
ne à gbíl yó pi pé yah, nê-á n wěki ne wāh n wil
Liyel tyí.

2 Képah sɔkɔ, Yesu me yo pé tyí ne: «Gbíyí de
gbíne, yínyõ-à me gbǎlì, yè n ne tyah yah-á kɪ
yiki mɔ.

3 Té séngbǎle, yínyõ-à me fínmòò, yè n ne
kweyne tyah yah náh n yiki n mɔ n pi. Yé me fě
tyah dùkù wɔle n pne, té tyi nónó wɔ-á me n pi
kwey gbí sɔkɔ, sáh me tyi nónóne n wěki, yé tẽ
sépi wɔ dùkù pĩ kwlo kè?

4 Kwey gbí névyɛ náh ple. Pè náh me tẽ Liyel
ó tyí yõ. Pè me ké tyí ne mé gbíl yó pi pé yah.
Nte kèyāh ntẽ náh pi pè wěki n pi, à wil Liyel
tẽntõ syinyo-ò Nsyonasɪ tyí sɔkɔ.» Képah
yóntenɔ náh, à pè sah nénpó té sɔkɔ.

⁵ Képah náh, Yesu ànê n tò sáhpú-á n soko yónkahnune, n tò sáhpú dyo sò fwɔ búrn tókónsokónole.

⁶ Yesu me yo pé tyí ne: «Yé kyòmìnó pi. Yé yé gblɔyne n tẽ Farisi wẽkì kópú ànê Sadusi wẽkì kópú kókónóle.»

⁷ Képah soko, n tò sáhpú tyah n sò ne pépi-á pɔ búrn kɛne, képah-á à kɔ à n yo sɛ yò.

⁸ Nte Yesu me pé sɔno pĩ té yo pé tyí ne: «Liyel yò sɛnyĩ-ńkɛpú nópi. Sɔ pi té yé n sò sɛ ne, yé náh pɔ búrnne képah-á?

⁹ Yé náh tɔnì me sé òkù pĩ sɛ ni? Yé dyo náh me n kwne tole máh búrn pló kwólóle díbí népĩ kèyò nínó kyegbã (5 000) pu, ànê yáh yónkwɔnɔ téló tuke mɔ vyó yí dan nêne di?

¹⁰ A tahlí máh búrn pló kwárninole díbí népĩ kèyò nínó (4 000) pu, té yáh yónkwɔnɔ téló tuke mɔ tɔko yí dan nêne, yé dyo náh me n kwne kéle di?

¹¹ Té sɔ pi té yé náh tẽ we pĩ ne búrn tyí náh mé n yo yé tyí, máh sò n yo yé tyí ne: «Yé yé gblɔyne n tẽ Farisi wẽkì kópú ànê Sadusi wẽkì kópú kókónóle?»

¹² Képah soko, pè pyẽ pĩ ne mífáhkì soko mɔ mɔ kókónó tyí náh sò Yesu n yo pé tyí ne pé pé gblɔyne n tẽ kéle. Nte Farisi wẽkì kópú ànê Sadusi wẽkì kópú-á kwónó nêne n kɔ, képah tyí-á sò à n yo pé tyí ne pé pé gblɔyne n tẽ kéle.

Pyeri-á nê yo Yesu tyí soko

13 Yesu-á kyɪ yĩni tẽ Filipi-Sesarı gběnyah ùnnɛ, à ò tò sáhpú piki yah nɛ: «Névyɛ tẽ tyí nê me ñmɔɛ, ñmɔ nê-á Névi Pídíɛ?»

14 Pè me nɛ, túkù-á nɛ Wèlnwìlkì-ò Nsyõ-á ònɛ. Túkù nɛ Liyel tẽntò syínyo-ò Yeli-á ònɛ. Túkù mó nɛ Liyel tẽntò syínyo-ò Nsyeremi-á, képah náh pɪ Liyel tẽntò syínyo-ò yó-á ònɛ.

15 Képah sɔkɔ, à tò nɛ: «Ntɛ yépi-á dò, yépi tẽ tyí nê me ñmɔɛ?»

16 Simo Pyerɪ me yo ò tyí nɛ: «Áwɔ ye Liyel nɛy yáhntɔkɔnɔɛ. Liyel nê-á min nétɛnɛ, ñmɔ Pídí ye áɛ.»

17 Képah sɔkɔ, Yesu yo ò tyí nɛ: «Áwɔ tyí nɔ, Nsyonasɪ pídí Simo. Á náh wɛ di, névi náh wěkɪ áɛ tyi nópilɛ dé, í Sú Liyel nê-á me yínyõ sɔkɔ, ñmɔ ye wěkɪ áɛ séɛ.

18 Ntɛ ñmɔ kɪ yo á tyí nɛ: «Pyerɪ ye áɛ, (nê kór-á légbíɛ). Té kéné légbí yõ sɔkɔ ye mé kɪ í yõ sɛpú ùnkì sah. Té kũ táhkì ntẽ fyé náh tẽ wɛ tir yó pɪ n pi pé sɔkɔ.

19 Mé kɪ Liyel tǒrí tyah yah gbíní kénikópyéɛ ò kǒ. Wáh tir nê yahle sétáh mè yõ sɔkɔ, Liyel nê-á yínyõ sɔkɔ, ò tɔ kɪ sah ké yõ sɔkɔ. Té wáh nê wěkì kǒ sétáh mè yõ sɔkɔ, Liyel nê-á yínyõ sɔkɔ, ò tɔ kɪ sah ké yõ sɔkɔ.» Mé kɪ áwɔ kǒ á kɪ fẽ Liyel tǒrí nɔɪ yónó wěkìɛ n kǒ. Wáh tir nê yahle sétáh mè yõ sɔkɔ, Liyel nê-á yínyõ sɔkɔ, ò tɔ kɪ sah ké yõ sɔkɔ. Té wáh nê wěkì kǒ sétáh mè yõ sɔkɔ, Liyel nê-á yínyõ sɔkɔ, ò tɔ kɪ sah ké

yõ soko.»

²⁰ Képah náh, Yesu n tò sáhpú gbah sni ne, pé káh kè yãh névi syah ne péwɔ-á Liyel ney yáhntɔkonɔle dé.

Yesu me n kúnó ànê n lékó yilkinmɔɔ tyíle n yo

²¹ A tɔkɔ légbí tyí, Yesu tyah ké yahle n yo n tò sáhpú tyí ne, páh yĩne pé yuku Yerusalemɩ kwil soko. Yèwàhnì, ànê sárká syínwilkɩpu yòtã, ànê Liyel tyi kònsàhnó kwópú-á kɩ yèvyãhrɩ náhnáh sah n pi péwɔ yõ. Pãh kɩ pé ko mɔ, té ké sèpìn tɔ-ò sɔle, pé lékó-á kɩ yilki mɔ.

²² Képah tẽne, Pyerɩ me à ye kẽkɩ té tyah n wekɩ n yõ ne níkẽ, pólle pé Tẽ ngbẽ, képah náh à yĩni n tẽ n pi. Liyel-á kɩ n tũ n mɔ n yõ.

²³ Nte Yesu me n yah vi té yo n tyí ne: «To n yah sétàn yòtẽ mè. Nmɔ fěkì-nsah ye á n yah n kɔ. Yah, á sɔnɔ náh me núkúle Liyel tyíle. Á sɔnɔ me núkúle névi tyíle.»

Yesu sò tẽ dùkùle

²⁴ Képah náh, Yesu yo n tò sáhpú tyí ne: «Névi nê-à me ké tyí ne pé nímɔ sò tẽ, tẽ yĩne à n gblɔy tyi we n ye, à mó n syɩ syɩ dahnu twah nímɔ sò tẽ.

²⁵ Névi nê-à ne páh n to n pwah kũ yah, tẽ náh tyé-nkẽ min we n pi. Té nê-á tekɩ n min soko nímɔ yĩnne, tẽ wɔ kɩ tyé-nkẽ min we.

²⁶ Névi-à ne kèkõyó yĩ pól we n pi, té ne n tekɩ n pi n min soko, yõ se me ké tyí? Képah náh pi,

kwâh se kɪ fɛ wɛ névi tyí à kɪ tokɔ kɔ̃, ò min sɔ̃nɛ?

²⁷ Yé yah, Névi Pídí kɪ ò syɪ n pɔ n pi ànê ò yínyõ tɔ̃npɪbɪlɛ ò Sú Liyel tɔ̃rɪlɛ ò sɔkɔ. À kɪ pɔ nénúkù núkú pól dyah à yĩnɛ pé tyípínìnɛ.

²⁸ Kègbɪ yõ mé kéle n yo yé tyí, névyɛ nónó-á ásô, pé túkù nâh tɔ̃nì mɛ n ku n pi, té kɪ Névi Pídí wɛ à kɪ mɛ n pi ò yòtɔ̃rí sɔkɔ.»

17

Yesu òúkù vɪnmɔ̃nɔlɛ

¹ Sèpìn kénúkò sókóntɛnɔ nâh, Yesu mɛ Pyɛrɪ, ànê Nsyakɪ, ànê Nsyakɪ gběndí Nsyõ tɛ pè yuku yõlɪ kèyy yó yõ, à kyɪ tɛ pé tyíle.

² Dõ, Yesu òúkù vi mɔ pé yí yah. Ñ yèpɔ tyah n tɛ gbĩ sɔ̃, té ò flo mɛ piki préyy.

³ Moyisi ànê Yeli núkú wil mɔ pé yah, té mɛ n yãh ànê Yesule.

⁴ Képah sɔkɔ, Pyɛrɪ mɛ yo Yesu tyí nɛ, Tɛ òngbɛ, pé pól tɛnó-á mɛ plɛ ásô dé! Wãh kɪ mɛ ké tyí, pãh kɪ yèpyɛnɔ tɔ̃nó pɪ: Núkú-á kɪ pɪ òmɔ tyíle, núkú kɪ pɪ Moyisi tyíle, núkú mó pɪ Yeli tyíle.

⁵ Wãh mɛ képah yónó sɔkɔ, òyírkɪ yó núkú wil òvyõõ à fob mɔ pé yõ. Té yínpõ yó mɛ wil òyírkɪ mɛ sɔkɔ nɛ: «Nê-á yò, òmɔ òndè Pídí ye. Ñmɔ ye ò òvìnì yõlɛ. Yé nɛ n nohnɪ ò tyí.»

⁶ Yesu tò sãhpú nópi-á képah tɛ noh òyãh sɔkɔ, pè syɪkɪlɪ pé yah di sétãh tíkí tɛ tyí.

7 Képah soko, Yesu me no de pé tnô à tũ pé tyí, té yo pé tyí ne: «Yé yuku, yé káh n ye tíkí yé tẽ.»

8 Páh pé yey yõ, pè Yesu ó we ñ gblõy nùkúníne.

9 Páh pé syi yõlile n tiki, Yesu me pè sni ne: «Yáh nê we, yé káh kè yãh ney tyí, fóó kè syi n po n no Névi Pídí lékó yílkínmɔno tyí.»

10 Képah soko, ñ tò sáhpú me à piki yah ne, ñte sõ se pi té Liyel tyi kònsàhnó kwópu wo ne ñkẽ Yeli ñgbò-á yĩne à po Liyel ney yáhtokono yah ni?

11 A me yo pé tyí ne: «Gbɪ ye Yeli ye yĩne à po tyi pól tõ sah.

12 Nte mé kéle n yo yé tyí, Yeli po te té pè náh à yah pĩ. Pè pé dyo pi ñ soko. Sẽ ye Névi Pídí to kɪ fóhnó we n pi pé gbõ.»

13 Képah soko, ñ tò sáhpú nùkú pĩ ne Wèlnwìlkì-ò Nsyõ-á à n ye.

Ndyìkìnpɪ yó dènmɔno

14 Yesu ànê ñ tò sáhpú nópi-á po yĩni tẽ tówú soko gbí nêne, dí yó no de Yesule à gbètukuno di ñ yah, té yo ñ tyí ne,

15 pé Tẽ ñgbẽ, à pé pídí yãm yah. Ndyìkìnpɪ-á ñne, wãh me n kwlo kégbile. Kèyãhle à n syiki n de nyàh soko, képah náh pi ni soko.

16 Páh po ñne ñ tò sáhpú tyí, té pè náh tẽ we à de mo.

17 Képah tẽne, Yesu weki pé yõ ne: «Népèl yísyóle n yah dé, Liyel yõ sè-ńkèpú nópi. Mé kɪ tẽ yéle, pópó kɪ po syi gbí nê tẽ tyí? Mé kɪ yé

sómno̅le n pi, pópó kɪ pɔ syɪ gbí nê tẽ tyí? Yé pɔ ònne ní kɔ́ ásò.»

¹⁸ Pàh pɔ ònne, Yesu dírí kɔ́ sétò yò nê-á mɔ̀ ò sɔkɔ̀ òndyìkìnìnne, à me wil dípir sɔkɔ̀. Nénpó swɔ̀, dípir núkú de.

¹⁹ Képah tẽne, Yesu tò sáhpú nɔ de Yesu tnó pé yahle té à piki yah ne, sɔ se pi té pépi wɔ̀ sò tẽ sétò mè yíni wilki kwɔ̀ dípir mè sɔkɔ̀ ní?

²⁰ A me yo pé tyí ne: «Yé Liyel yò sɛ́nó yilo kah mɔ̀ képah ye. Kègbɪ yò mé kéle n yo yé tyí, yé Liyel yò sɛ́nó-à me nɔ mútárdì pi* fyéle, yé náhkɪ fẽ yo yòlɪ mè tyí ne kè yal ásò kè kyɪ n tẽ yàhàh, té kè náhkɪ mó tɔ̀ kè pi. Yé náh náhkɪ tir yó òtẽ pi n kwɔ̀ n pi dò. [

²¹ Nte sétò mè dùkùle, né nírí pínó ànê níkì tẽnó ó sɔkɔ̀ náh, à náh fẽ n yíni.]»

Yesu me ò kúnó ànê ò lékó yìlkinmɔ̀nɔ tyíle n tò n yo

²² Sò yóle, Yesu ànê ò tò sáhpú sò me tükènmɔ̀nɔle Kalile mara sɔkɔ̀. A me yo pé tyí ne: «Pè kɪ Névi Pídí tẽ dahbɪ névye gbò,

²³ pè kɪ à ko mɔ̀. Nte ké sèpìn tɔ̀-ò sòle, ò lékó kɪ yilki mɔ̀.» Welɔ̀ nópi nóhnó ò tò sáhpú yah kwɔ̀ kègbɪle.

Yesu ànê Pyerɪ mórí mónóle Liyel ní-ńsah gbô

²⁴ Yesupi-á kyɪ yíni tẽ Kapernayumi kwil sɔkɔ̀, Liyel ní-ńsah gbô mórí syípú nɔ de Pyerɪle té à

* **17:20** 17.20 - Mútárdì pi yilo kal yípyé pólle. Yah n te Matye 13.31b-32a.

piki yah ne, pé kwó-ò dí kó me Liyel ní-ńsah gbô móríle n mo ni?

²⁵ A me ne àwe-á, wăh me kéle n mo kè. Pyeri-á kyi yīni tē gbô, Yesu ñgbò à piki yah ne: «Simo-Pyeri, áwò sǒnǒ tē nêne à yuku mórí mónó tyí sòkò? Kàh me móríle nê-á kɪ kèkōyó yòtāmne n kǒ, kwil wěnpì se kɪ n mo kéle, t̃i, népân se?»

²⁶ Pyeri me ne népân-á. Yesu me ne: «Kàh pɪ s̃, kwil wěnpì wò vyāh náh mó me ké mónó sòkò kè.

²⁷ Nte mé náh me ké tyí ne no nópi kéle ne n sǒ kétúkuyô. Képah ye, kyi dlóy mo Kalile yó-ñgbē sòkò, yēnkô nê-á kɪ pò tē gbenne, ñ vyāh yɪkɪ n mo n yah, á kɪ pó we ké sòkò. Kè wilki n kyi mórí mo pé tyí, nmo ànê áwò tyíle.»

18

Névi nê-á kɪ pɪ né-ñgbēne kal Liyel tǒrí nɔli yónó sòkò

¹ Légbíne, Yesu tò sáhpú nò de ñne, té à piki yah ne, nê se né-ñgbēne kal Liyel tǒrí nɔli yónó sòkò ni?

² Képah tēne, Yesu me wěnpir tyíí yó ye pò sah pé niyó, té yo pé tyí ne:

³ «Kègbɪ yǒ mé kéle n yo yé tyí, né yé náh yé nno vi mo à pɪ wěnpì tyí kǒle, yé náh Liyel tǒrí nɔli yǒ n pɪ.

⁴ Névi nê-à kɪ ñ gblóy tiki mo pɪ tyíí wěnpir mè sǒ, tē wò ye kɪ pɪ né-ñgbēne kal Liyel tǒrí nɔli yónó sòkò.

5 Névi nê-à wěnpir mè kénkõ těno ple nmo yinne, nmo ye tẽ tẽ ple.»

Gbáhdyâh gbáhdinsàhnóle

6 «Nte wěnpĩ* nónó-á sě nmo yõ yò, névi nê-à pé soko yó yõ yiki mo tyípekè pínó soko, pàh yínónan ñgbèkì yó toh tẽ yègbì té à tu dah mo pne yo tĩ tẽ-ñsah soko kè kõ kè à yõ, képah kɪ fónfó kal tẽne.

7 Pèkè me kèkõyó névyè yõ névyè yõ yíkínmɔno yinne tyípekè pínó soko. Névyè yõ tẽ wo náh fě n ye yíkínóle ó, ñte névi nê gbõ yõ sěnkõ-à we, pèkè kɪ tẽ no.

8 Á gbõ, képah náh pɪ á gbáhkì-à kɪ nê n dah n mo ále tyípekè soko, kè kãm milki fíí ále. Wáh tekɪ á gbõ, képah náh pɪ á gbáhkì soko té tyé-ńkẽ min we, képah kɪ fónfó kal ále á mínndahnmɔno yõ ní-ńkẽ nyàhnpèkè soko gbàn nínì ànê gbyêh nínine á tyí.

9 Á yí-à kɪ nê n dah n mo ále tyípekè soko, kè gbahlɪ n wilki n milki fíí ále. Wáh tekɪ á yí soko té tyé-ńkẽ min we, képah kɪ fónfó kal ále á mínndahnmɔno yõ ní-ńkẽ nyàhnpèkè soko yí nínóle á tyí.»

Képo mónpuno wéntěnole

10 «Yé yé gblõy tẽ wěnpĩ† nópi soko yó yilónóle. Ngbõ yínyõ tònptɪ nónó-á n yah pé

* **18:6** 18.6 - Wěnpĩ nónó tyí-á n yo ásô soko yò, kè kɪ fě pɪ Yesu yõ sěpú ye pè n ye. † **18:10** 18.10 - Yah n te Matye 18.6 yah yónó soko.

yõ, pè me gbímægíbí ní Sù Liyel yah sòkò yînyõ dè. [

¹¹ Yé náh wè di, névye nónó-á me mónpunòlè, pépi pwah n mọ yîn ye Névi Pídí pọ.]

¹² Yépi tẽ tyí à; sǒ kénkǒ-á képyénì lèkwě-à me dí yó tyí à me n fě yǒh yõ, té núkú mọ pu sé sòkò, à náh tikiyéh pọ gbām pọ kwǎryāh nọpi téló sah n pi nénpọ, té kyí mónpunọ mè yah n kǒ n pi di?

¹³ Té gbí yõ mé kéle n yo yé tyí, wàh à wè tẽ, ò n n vı òmọlè à kal tikiyéh pọ gbām pọ kwǎryāh nọpi télólè, nónó náh mọ pu.

¹⁴ Sě ye yé Sù Liyel nê-á me yînyõ, ò tọ náh me ké tyí nè wěnpì nọpi sòkò yó n tẽ mọ n pu.»

Tyípékè pí-ò tẽ n pọ òkùlè gbí wěkì yõ

¹⁵ Yesu tǒ nè: «Á yúnpi yó-à tyípékè pí [á tyí], kyí n wil ò tyí, ò ò yah yo yé nímí wró ó sòkò. Wàh sah á tyí yõ, yé yúnpi kí kú yuku yahle.

¹⁶ Wàh yahle, kyí nénúkù képah náh pí nímí yah n dohnı á gblǒy yõ n tǒ, yè kyí ké yah wah. Sě ye Liyel wey yo kéle nè, ké yah-á yîne kè wah tǎrfyò népì nímí, képah náh pí tǒmí yí yah.

¹⁷ Té wàh yahle sàhnóle pépi tọ tyí yõ, kyí ké yah yo nímọ yõ sěpú fínkì tyí. Wàh se tǒ yahle sàhnóle pépi tọ tyí yõ, ònè nè n mọ n kǒ Liyel wěkì kó-ńkěpú sòkò, képah náh pí mórí syípú sòkò.

¹⁸ Kègbí yõ mé kéle n yo yé tyí, yàh tir nê yahle sétáh mè yõ sòkò, Liyel nê-á yînyõ sòkò, ò tọ kú sah ké yõ sòkò. Té yàh nê wěkì kǒ sétáh

mè yõ sɔkɔ, Liyel nê-á yínyõ sɔkɔ, ò tɔ kɪ sah ké yõ sɔkɔ.

¹⁹ Mé kéle n yo yé tyí tɔle, yé sɔkɔ népî ní mí tẽ-à fyò pé yégbékè pɪ núkúle sétáh mè yõ, té kwáhdúkú nê ni ní Sú Liyel tyí, à kɪ kéle pé kõ.

²⁰ Yé náh we di, népî ní mí képah náh pɪ tǒmí-à wẽ tuke mɔ nýãh sɔkɔ ñmɔ yĩn yõ, mè n ne me pé niyó.»

Névyé-á yĩne pé ne n yõ n mɔ wẽne n kõ dùkù nêne

²¹ Képah sɔkɔ, Pyerɪ me nɔ de Yesu tnô té yo ñ tyí ne, pé Tẽ ñgbẽ, pé yúnpi yó-à n pɪ n de pé tyí, gbáhyí sǒ se pé yĩne pé yõ mɔ à kõ nɪ? Fóó gbáhyí kwãrninɔ se nɪ?

²² Yesu me yo ñ tyí ne: «Õõ, mé náh n yo n pi á tyí ne gbáhyí kwãrninɔ-á dé, ñte fóó gbáhyí kwãrninɔ sàh-ñtännó tikitǒní pó gbãm ye.

²³ Yé yah, Liyel tǒrí-á kɪ fẽ tɔkɔ sãh sèmirkì nêne, kè we yò: Yòtẽ dí yó lésõ me ké tyí ne pé pé pó tyí yah wah ànê pé tǒnpɪbɪle.

²⁴ Pãh tyah pó yáhnóle, pé ñ tǒnpɪ yó tẽ pɔ ñ tyí, ñ kǒlɪ ñgbẽ-á sǒ me nê yõ, fóó talã‡ pó pló kèyõ kwlóle (10 000).

²⁵ Té kwáh náh sǒ me dí mè tyí ké dyah dyah tẽne. Kãh pɪ sẽ, yòtẽ dí ne, pé à tẽ yãm, ànê ñ kyule, ànê ñ wẽnpɪle, à tahlɪ ñ gbãn yî pól tyí, pé kǒlɪ mè dyah.

‡ 18:24 18.24 - Légbíne, talã pó pó núkú kɪ sǒ fẽ nɔ nénúkù ye gbǒnkwólò tò pínó danne.

26 Képah tēne, tōnpi mē me n gbètukuno di té n yah kwĩnki sétáh yòtē dí yah, té yo n tyí ne, à n gblǒy ye à mó pé syki n yah kwéy, páh kɪ pɔ ké pól dyah n tyí.

27 Wáh képah yo sē, n yām yòtē dí kah tē. A me à fin mɔ té kōli mē yō mɔ à kō.

28 Kéne dí-á fyò wil, à n ní-ò tōnpi yó yohni n̄mɔ kōli kwéy-á sò me nê yō deniye§ pó pló lèkwěle. A me à fyāh tē n yègbɪ tyí à n̄ne n fī kírr, té à syah ne níkē, pé kōli nê-á me n yō, à pé dyah kéle.

29 N ní-ò mē me n gbètukuno di n yah té yo n tyí ne, à n gblǒy ye à mó pé syki n yah kwéy, páh kɪ pɔ kè dyah n tyí.

30 Nte à yahle, té se tō à tē kyɪ dah mɔ wòkònpèkè sɔkɔ, fók kɪ pɔ nɔ gbí nê-á à kɪ kōli mē dyah.

31 Pé no tōnpi-á képah tē we sē, kè pé yah kwò kègbule. Pè me kyɪ sé pól yo pé yòtē dí syah.

32 Képah sɔkɔ, yòtē dí me pè kō pè à ye pɔ, té yo n tyí ne: <Tōnpi népo. Wáh lésò ní ni, képah ye mé á kōli yō mɔ n kō.

33 Nte áwɔ tɔ náh sò yĩne n á ní-ò yām yah, n̄mɔ-á á yām yah sō di?>

34 Té fòkònyāhni kèpèkè tē tyí, yòtē dí à dahbi wòkònpèkè névyè fòhpúpèl gbò, fók kɪ syi pɔ nɔ gbí nê-á à kɪ yòtē dí pó pólle à dyah.

§ 18:28 18.28 - Légbíne, deniye pó pó núkú kɪ sò fē nɔ nénúkú gbǐyǐkí núkú tō pínó danne.

35 SĚ ye ní Sú Liyel kɪ n pɪ n pi yé tole, yâh n yõnmɔ-ńkĕne wĕne n kǒ yé nno pólle.»

19

Yesu-á kwónó nê kǒ fúr yíkínó tyí yõ

¹ Yesu-á tye ñ weyne gbí nĕne, à yal Kalile mara sɔkɔ à yuku Nsyude mara tyah yó sɔkɔ, nĕ-á me Nsyurdĕ yónkahnine.

² Tówú ñgbĕ yó me ñ sǒ tĕ yuku, té à me pé yámpú de mɔ nĕnpó.

³ Képah sɔkɔ, Farisi wĕkì kópú yísyó nɔ de ñ tnô ne pé à mɔ yah, té à piki yah ne, ké wĕkì se me dí tyí à kɪ ñ kyɪ fin mɔ, kâh sǒ me tyídúkú nĕ yõ nɪ?

⁴ Yesu me yo pé tyí ne: «Yé nâh kè kar yah Liyel wey sébéy sɔkɔ ne, kèkõyó mɔ gbĕne, Kèkõyó mó-ò-á pè mɔ dí ànĕ sĕle di?

⁵ Wâh ne, képah-á dí-á kɪ yal ñ sú ànĕ ñ yú tnô, té kɪ kwrɔ mɔ ñ kyɪle, pé ními kɪ pɪ wil gbĕnsĕ núkúle.

⁶ Kâh pɪ sĕ, ními nâh tǒ péle dé, núkú-á péle. Liyel-á nónó kwrɔ mɔ, ney kâh pè gbekɪ.»

⁷ Képah tĕne, Farisi wĕkì kópú à syah ne, ñte sǒ se pɪ té Moyisi kè kǒ sah ne, névi nĕ-à ñ kyɪle n fin mɔ, tĕ ñ fin mɔ mɔ tãrfyò sébéy pɪ à kǒ à mó pyĕ à fin mɔ nɪ?*

⁸ Á me yo pé tyí ne: «Yépi nòhnì-ńkĕ yĭn ye Moyisi kǒ à képah wĕkìle yé kǒ kè. Nkĕ sĕ nâh se lésǒ kéle ké tyàh-nsah sɔkɔ té.

* 19:7 19.7 - Yah n te Tõnyonɔ 24.1.

⁹ Té ñmɔ kéle n yo yé tyí ne, névi nê-à ò kyi fin mɔ né fɔfíkì tẽ tyí yõ náh, té sékáhkí tɔkɔ, fɔfíkì-á tẽ n pi.»

¹⁰ Képah sɔkɔ, Yesu tò sáhpú yo ò tyí ne, dí yín-ńsah-à mó me pɔ sah képah yõ à yuku ò kyi tyí ùnne, sê tókó-ńkê-á fónfó dò.

¹¹ Yesu me yo pé tyí ne: «Wey nê-á mé kɪ n yo n pi yé tyí yò, no pól náh fẽ ké syíkí-ńsah we n pi. Nte Liyel-á ké fẽnpĩno lékámne nónó kɔ, pépi wɔ kɪ fẽ ké syíkí-ńsah we.

¹² Yé náh we di, tyi yísyó me nónó-á díbí kɔ pè náh syóle n tɔkɔ: Túkù me pé dúbí-ńsah dukù sɔkɔ, pè náh me díbí sɔkɔ. Túkù me névye ye mɪ péle pè kɔ pè náh me díbí sɔkɔ. Túkù mó sétókókì yahle Liyel yòtòrí yah yúkúnó yinne. Nê-à kɪ fẽ wey mè syíkí-ńsah we n pi, tẽ kɪ ké syíkí-ńsah we.»

Yesu sãm mónóle wẽnpì sɔkɔ

¹³ Képah tẽne, névye pɔ wẽnpì yrɔle Yesu tyí ne à ò gbàn sah pé yõ à Liyel ni pé tyí. Nte ò tò sáhpú me tyah díríle n kɔ pé yõ.

¹⁴ Képah sɔkɔ, Yesu me yo pé tyí ne: «Yé ye wẽnpì kɔ pè ne n pɔ n pɔ ñmɔ tyí. Yé káh pé yahle n kɔ. Yé náh we di, névye nónó dukù-á me wẽnpì nópi tyí kòle, pè kɪ Liyel tórí nɔli yò n pi.»

¹⁵ Képah tẽne, wăh ò gbàn sah te pé yõ, à yal nénpó.

Tahri tyí yónóle

16 Képah tǝne, kètǝnpìkì yó nɔ de Yesule té à piki yah ne, kwó-ò dí, tir nê sé pé yǝne pé pɪ tyípépǝyne pé mó tyé-ńkǝ min we ni?

17 Yesu me yo ñ tyí ne: «Sǝ pɪ té á ńne n piki n yah pèpɛy tyí yǝ? Pèpɛy núkú ó me. Wáh kɪ me ké tyí ne á min we, Liyel tyi kǝnsàhnó wǎlle n kɔ.»

18 Á me ne Liyel tyi kǝnsàhnó nónó tǎn se ni? Yesu me yo ñ tyí ne: «Káh ńékókè mɔ, káh fǝfíkì pɪ, káh yǝbe yǝ, káh mìnì sah ney yǝ.

19 Yǝyǝnne n sah á sú ànê á yú yǝ. Ye á ní-ò tyí nɔ á tyí á gblǝy tyí kǝle.»

20 Képah tǝne, kéne kètǝnpìkì me yo ñ tyí ne, páh me sépi tǝ pǝlle n pɪ dǝ, kèyǎh se tǝ me wǎ pé tyí pɪ pɪ tǝne ni?

21 Yesu me yo ñ tyí ne: «Wáh kɪ me ké tyí ne á tyi pól tǔ, gbǎn yǝ nónó-á me á tyí, kyɪ sè yǎm ñ té sé pó dibi yǎm tǎn kǝ. Képah sɔkɔ, á kɪ tahrɪ we Liyel fǝ sɔkɔ. Képah-à pɪ, ñ pɔ ńmɔ sǝ tǝ.»

22 Wǎh képah tǝ noh sǝ, à sɔkɔ yahle yíkínsàhnóle. Kwâh nètǝ ñgbǝ ye sǝ ñne képah ye.

23 Képah sɔkɔ, Yesu me yo ñ tǝ sǎhpú tyí ne: «Kègbɪ yǝ mé kéle n yo yé tyí, tǎh Liyel tǝrí nɔli wényǝnɔle, kè kɪ tah dé.

24 Mé kéle n tǝ n yo yé tyí, yǎhmíkì dénwǎlnóle sèndi pwǎh sɔkɔ, képah ńtǝ kɪ dǝdǝ kal tǎh Liyel tǝrí nɔli wényǝnɔle.»

25 Yesu tǝ sǎhpú-á képah noh sǝ, pé gbǎn kah du. Pè me ne, ñte nê wɔ se kɪ mó fǝ pwah ni?

²⁶ Yesu me yõ pè yah, té yo pé tyí ne: «Névye tẽ wole, pè náh fẽ kè pi n pi. Nte Liyel ki fẽ tyi pól pi.»

²⁷ Képah soko, Pyeri me yo ò tyí ne, à yah, pépi-á pé tyi pól sah té òmò sò tẽ. Pépi tyí se ki n pi n pi sò ni?

²⁸ A me yo pé tyí ne: «Kègbi yõ mé kéle n yo yé tyí, Névi Pídí-à pò kò tẽ ò tǒrí kò yõ kèkōyó késán soko gbí nêne, yépi nónó-á òmò sò tẽ, yé tò ki kò tẽ tǒrí klò gbõninó yõ ki Yisrayel no yikíninó gbõninó yah tẽ n pi.

²⁹ Nmò yin yõ, névi nê tẽ-à fyò me yal ò gbô soko ò, ò yúnpyé tnô ò, ò dósýó tnô ò, ò sú tnô ò, ò yú tnô ò, ò wěnpì tnô ò, ò swěy tnô ò, tẽ ki sěnknono lèkwě wé, té ki se tó tyé-ńkê min wé.

³⁰ Nte négbro náhnáh ki n pi n pi nétélóle, té nétélóle náhnáh ki n pi n pi négbrole.»

20

Sèmìrkì nê-á yãh sètẽ yó ànê ò tǒnpìbi sar dùkù tyí yõ

¹ «Yé yah, Liyel tǒrí-á ki fẽ tókò sãh sèmìrkì nêne, kè wé yò: Sètẽ dí yó lésò wil séngbõ púpúle ne pé tǒnpìbi yah n tókò n tekì mò pé yèresẽ swãh soko.

² Wãh nónó wé, à yo sah núkú yõ péle ne, nénúkú gbìyìkì núkú tò pínó sãrle, deniye* pò

* **20:2** 12.5 - Légbíne sò, wãh gbìyìkì núkú tò pi névi tyí, deniye pò pò núkú ye tẽ n sar ále.

pó núkú-á. Képah sɔkɔ, té pè tekɪ mɔ ò swāh sɔkɔ.

³ Pōy tō gbíne, à tō wil té kyɪ nósýó we tēnóle tówû tükè-nsah sɔkɔ tō kēne pé tyí.

⁴ Α με yo pé tyí ne, pépi tɔ sɔkɔ péwɔ swāh sɔkɔ, pāh kɪ pè sar ké yah yō.

⁵ Pè me sɔkɔ. Gbī-á me yòtah sírr sɔkɔ, à tō wil à sēntē pi. Gbèkām gbī-á nɔ, à tō wil à képah núkú ó pi.

⁶ Nv́ lésyile, à tō wil té kyɪ nósýó we ntō kéne tówû tükè-nsah sɔkɔ. Α με pè piki yah ne, sō se pi té péle ásò gbìyìkìle tótó tō pí-ńkēne ni?

⁷ Pè me yo ò tyí ne, ney nāh pé tɔkɔ képah-á. Α με ne pépi tɔ sɔkɔ péwɔ swāh sɔkɔ.

⁸ Tò-á tiki nv́ne, sètē dí yo ò pó yah wàh-ò dí tyí ne, à tònpi bi nópi ye n pɔ pè dyah pé póle. Nkē nónó-á kyɪ swāh sɔkɔ nétélóle, à kè tyah pépi tyí à pɔ n dal n mɔ négbro tyí.

⁹ Nónó-á télóle, pāh pɔ, à pè kō deniye pó pó núkú núkúle.

¹⁰ Kāh syɪ négbro tyí, pépi tē sō me n sō ne wān-á kɪ we pépi tyí yō. Nte deniye pó pó núkú núkú ye pépi tɔ we.

¹¹ Pāh pó nópìle n syi gbí nēne, pè tyah sètē dí sèyòkèle n yo

¹² ne nkē, nónó-á à tɔkɔ pɔ télóle, lérí núkú ó sɔkɔ-á pè we pi tōle. Nte kè se pi sō té à pɔ péle n sar núkúle pépile, pépi nónó-á kwlónó fē syi à tō pi kwlo gbìyìkìle tótó gbì syòkì yah sɔkɔ ni?

¹³ Sètē dí me yo pé sɔkɔ yó tyí ne: <N kódí, mé

náh syúkí á yõ sòkò dé. Nmò ànê áwò náh sò wèkí sah nùkú yõ ne, á gbìyìkì nùkú tò pínó sǎr-á kɪ pɪ deniye pó pó nùkúle di?

¹⁴ Ne n yuku á pólé. Mé kɪ nétéy mè kǒ dan nùkúle áwòle ní dyò ó.

¹⁵ Ké wěkì náh me ímò tyí, kɪ fě ní dyò dyò tyi pɪ ní pólé di? Tí, ní nɪ nónó se n yo ále?»

¹⁶ Képah yáhntenò náh, Yesu tǒ yo pé tyí ne: «Sě ó ye, nétéló kɪ pɪ négbrole, té négbro kɪ pɪ nétélólé.»

Yesu me ò kúnó ànê ò lékó yìlkinmòno tyíle n yo ke tǒ-òle

¹⁷ Yesupi-á n sòkò Yerusalemɪ kwil, pǎh me wěkì yõ sòkò, à ò tò sǎhpú ye pé yahle, té yo pé tyí ne:

¹⁸ «Á we wěkì yõ à n dokò n yuku Yerusalemɪ sòkò yò. Névi Pídí kɪ tě n dahbɪ n pi sárká syínwìlkìpu yòtām ànê Liyel tyi kònsàhnó kwópú gbò nénpó. Pè kɪ kè yah tòkò ne wǎh yìne kònmònole,

¹⁹ té kɪ à dahbɪ névye gbò nónó náh pɪ Nsyifunòle, pè kɪ kóle à ko, té kɪ à ko yèfòhle, té kɪ à syɪ dahnɪ yõ. Nte ké sèpìn tǒ-ò sòle, ò lékó kɪ yilki mò.»

Nsyakɪ ànê Nsyõ yú-á nê yah kǒ Yesu tyí

²⁰ Képah sòkò, Nsebede kyɪ me ò dínpi tě nò de Yesule, té kò kwĩnki ò yah ne pé yáhnkòno yó pɪ ò tyí.

21 Yesu me à piki yah ne, à se me kwâh nê tyí ni? Pi me yo n tyí ne, pé dínpi nónó-á yò, à n vyãhle péwɔ kɔ ne wàh pɔ dɔkɔ n yòtɔrí yò, pé sɔkɔ núkú kɔ tɛ n gbòyò sòle, ní-ò mó kɔ tɛ n gběyìnè sòle.

22 Yesu me yo n tyí ne: «Npì-nkê sɔkɔ ye yé n ni kéle. Máh kɔ n de n pi yèvyãhrɔ nê sɔkɔ, yé tɔ se kɔ fɛ de ké sɔkɔ?» Pè me à syah ne páh kɔ fɛ de ké sɔkɔ.

23 Yesu me yo pé tyí ne: «Máh kɔ n de n pi yèvyãhrɔ nê sɔkɔ, yé tɔ kɔ de képah wɔ sɔkɔ ó, nte ní gbòyò sò ànê ní gběyìnè sò tɛnó tɛ wɔle, nmo tyí náh képah wɛkì kɔnóle. N Sú Liyel-á kè yah sah nónó yinne, pépi ye à kɔ kɔ kéle.»

24 Yesu tò sáhpú népì gbãm nópi téló-á képah noh sɛ, pé fɔkɔ vyãh ní mí nópile.

25 Képah sɔkɔ, Yesu me pé pól ye yah té yo pé tyí ne: «Tir nê-á me n pi kwlo kwlo sɔkɔ, yé kè pì ó. Yòtãm náh nkêne pé kwlo névyele ne n fne, té né-ngbnɔ tɔ n mó ne n fyãh pé yò pé tɛnwɛnɔ yinne di?

26 Nte kè náh yine kè ne n pi sɛ yépi wró. Gbɛntɛnáhle, yépi sɔkɔ nê-à me ké tyí ne pé yín-nsah ngbɛ we, tɛ yine à pi tɔnplɛ téló tyí.

27 Té nê-à me ké tyí ne pé pi yah névile yé sɔkɔ, tɛ yine à pi yé yòle.

28 Sɛ ó ye, Névi Pídí náh pɔ ne névyé tòle n pi péwɔ tyí dé. Nmo ye pɔ tò pi yinne névyé tyí, té kɔ n min kɔ névyé náhnáh yò dwe yinne.

Nsyeriko kwil yítũbi népî nîmî yí yíkínmɔnɔle

²⁹ Yesu ànê ò tò sáhpú-á n wil Nsyeriko kwil sɔkɔ gbí nêne, tówû ñgbě yó me ñ sò tẽ.

³⁰ Tẽ yítũbi népî nîmî yísyó sò me tẽnóle wěgbalı sɔkɔ. Páh noh ne Yesu-á pɔ n sɔkɔ, pé tyah n yo n mɔ yínpɔ ñgběne ne, pé Tẽ ñgbě, ñmɔ nê-á Davidi Pídíne, ñkě à pé yãm yah.

³¹ Képah tẽnne, tówû dírí kò pé yõ ne pè pé vyěy vike. Nte pè tɔ wãn mɔ pé yónmɔnɔ yõ ne ñkě, pé Tẽ ñgbě, ñmɔ nê-á Davidi Pídíne, ñkě à pé yãm yah.

³² Yesu me yín té pè ye yah, té yo pé tyí ne: «Kwâh nê me yé me ké tyí ne mé pi yé tyí?»

³³ Pè me yo ñ tyí ne, pé Tẽ ñgbě, à pé yí yíkí mɔ.

³⁴ Képah tẽnne, pé yãm Yesu tẽ. A me tũ pé yí tyí. Nénpɔ swɔ, pé yí núkú yíkí mɔ. Pè me ñ sò tẽ.

21

Yesu dénóle Yerusalemí kwil sɔkɔ

¹ Yesu ànê ò tò sáhpú sò me fíí kwéy Yerusalemí kwille. Pè sò me yúkey Betifasyí kwille, képah nê-á me Wólívyê yèh yõlí yõ. Képah sɔkɔ, à me ñ tò sáhpú népî nîmî tɔ

² ne ñkě: «Kwil nê-á yé yah tinnne yò, yé kyí ké sɔkɔ. Yé kí núkú ñkwěndyíyũkí yó we tóhnmɔnsàhnóle ñkwěndyípíkí yóle ñ tnô. Yé à de, yè pɔ séle í kò.

³ Nê-à kɪ nɛ pé yo, yè yo tɛ tyí nɛ, sé yétô-á me Tɛ ñgbɛ tyí. Képah sɔkɔ, tɛ kɪ yɛ yé kɔ yé kɪ sɔkɔ séle nénpó swɔ.»

⁴ Yesu képah yo sɛ, Liyel tɛntò syínyo-ò wɛy yónsàhnó mè wil yinne. Liyel tɛntò syínyo-ò lésò nɛ ñkɛ:

⁵ «Yé yo Yerusalem! * kwil tãn tyí nɛ, pè yah, pé yòtɛ-á me n pi pé òinne. Gblɔy tíkínmɔnɔ-á me ñ sɔkɔ. Wãh me dókónkòntɛnóle ñkwɛndyíkì yò, nê-á ñkwɛndyíkìlɛ.» †

⁶ Képah sɔkɔ, Yesu tò sáhpú me kyɪ tyi nópi pi ñ yóré yò.

⁷ Pè ñkwɛndyíyũkì ànê ñkwɛndyíkì mè tɛ pɔ, té pé flɔ mɔ sé yò Yesu kɔ à dɔkɔ kɔ tɛ.

⁸ Nékwínkí sò me pé flɔle n mɔ n yuku wɛkì yò, tókù mó me pɛmìle n kwɔkɪ n mɔ n yuku.

⁹ Tówú nê-á sò me mɔ ñ yah òinne pè n yuku, ànê nónó-á sò me ñ sò tɛ, pé pól sò me yo tũ yínpɔ ñgbɛnɛ nɛ: «Gbílkinó nɛ n sah Davidi Pídí yò. Névi nê-á n pi Tɛ ñgbɛ yín yò, Liyel sãm mɔ ñ sɔkɔ. Gbílkinó nɛ n sah Liyel yò, ñmɔ nê-á me yínyò.»

¹⁰ Yesu-á pɔ n de Yerusalem kwil sɔkɔ, nénpó tãn pól yuku kwille n yike wùù. Pè sò me piki yah tũ nɛ, nê se dí mènɛ nɪ?

¹¹ Tówú me yo pé tyí nɛ, Liyel tɛntò syínyo-ò Yesu-á, nê-á n wil Nasaretɪ kwil sɔkɔ, Kalile sétáh yò.

* 21:5 21.5 - Yerusalem yín yó ye sò Siyõnɛ. † 21:5 21.5 - Yah n te Nsakari 9.9.

Gbòyìbí yíninwìlkinóle Liyel ní-ńsah gbô soko

¹² Yesu-á de Liyel ní-ńsah gbô soko, à yíyǎm yǎmpu ànê yídwenè dwépu pól yíni wilki ké soko. A pó sàhtùpu tàbálnó tu wilki mo, ànê kèpíkípíkínó yǎmpu klóle.

¹³ Té yo pé tyí ne: «Kè me wárkínsàhnóle Liyel wey sébéy soko ne: <N gbô kí n ye nírí pí-ńsah gbôle.>‡ Nte yépi kè toko pi yípu wǒbìntě-ńsahle kè?»§

¹⁴ Képah náh, yítùbi ànê gbáhkì nùkú névye me no de Yesule Liyel ní-ńsah gbô soko. A me pè de mo.

¹⁵ Sárká syínwìlkípu yótám ànê Liyel tyi kònsàhnó kwópú-á gbìl nópi pínó we sě, té wěnpì tǒ me gbo mo tũ ne nkě, gbílkinó ne n sah Davidi Pídí yǒ, pé foko vyāh.

¹⁶ Képah tēne, pè me yo Yesu tyí ne, wěnpì nópi-á me nēne n yo, à kó me kéle n nohní n? A me yo pé tyí ne: «Àwe mé me kéle n nohní. Té wey nê-á wárkínsàhnóle Liyel wey sébéy soko ne: <Á kè pi á gbilki gbilki welo n nohní wěnpì ànê wěnpì yrǒ vyěy soko.>* Yé se kí ne yé náh kè kar yah?

¹⁷ Képah yóntenó náh, à yal pé tnô, té wil kwil soko à kyí sǒ Betani kwil soko.

Yesu vyāh yénmɔnɔle sènsóké séswô yǒ

‡ **21:13** 21.13 - Yah n te Yesayi 56.7. § **21:13** 21.13 - Yah n te Nsyeremi 7.11. * **21:16** 21.16 - Yah n te Gbálnó 8.3.

18 Dĩndal séngbõle, Yesu-á n syi n pi Yerusalemi kwil soko, kweki à tẽ.

19 Wãh sènsóké séswô yó we yúkey wẽkìle, à me no de ké tnô. Nte à nãh kwãh yó we ké soko. Kè sò me mɔri ó kókóle. Kãh pi sã, à me yo ké tyí ne, tó-á sã yò, képah tẽ nãh tó n syi n yah n pi pólle. Nénpó swo, séswô mènúkú kòkò.

20 N tò sáhpú-á képah we sã, pé gbàn du. Pè me Yesu piki yah ne nkẽ, kè se pi sò té sènsóké mènúkú kòkò nénpó swo ni?

21 A me yo pé tyí ne: «Kègbi yò mé kéle n yo yé tyí, Liyel yò sɛnó-à me yé soko, té yé nãh me n sò tótò, mäh nê pi sènsóké séswô mènoko, yé to ki fẽ sɛnkõ pi. Tè kè nãh n yin n pi képah ó tyí dé, yé ki tó fẽ yo yõh mèn tyí ne, kè yuku n yal ásò kè kyi n syki n de pne yo soko, té kè ki mó tó pi.

22 Liyel yò sɛnó-à me yé soko, té yé kwáhdúkú nê yah kô Liyel tyí níri soko, yé ki kè we.

Pè me Yesule n piki n yah n tɛnwɛnɔ wìl-nsah tyíle

23 Yesu kyi Liyel ní-nsah gbô soko. Wãh me névyele n kwô gbí nêne, sárká syínwìkìpu yòtãm ànê kwil yèwàhnì no de n tnô té à syah ne, nê gbô yò se à n pi tyi nópìle, ànê nê se kô nne kéne tɛnwɛnɔle ni?

24 A me yo pé tyí ne, péwô to-á ki pé piki yah tir núkú ó kókóle. Pàh ki ké yah yo pé syah, pé to-á ki mó yo pé syah nê gbô yò-á pé n pi tyi nópìle.

25 Pépi tẽ tyí à; nê se tã Nsyõne à pɔ wèlnwìlkìnólɛ n pɪ nɪ? Liyel se, tũ névye se nɪ?» Képah sɔkɔ, pè tyah n yo wẽ tyí ne, páh kɪ ne Liyel-á tã ònɛ, wǎh kɪ pé syah ne, té kwǎh nê se pɪ té pé nǎh sã ò yõ nɪ?

26 Nte páh kɪ se mó tã ne névye-á tã ònɛ, tówú tiki-á me pé tẽ pé pól-á sǎnpíle me Nsyõne n tɔkɔ n pɪ Liyel tẽntõ syínyo-òle.

27 Kǎh pɪ sã, pè Yesu syah ne pé nǎh pĩ. N to mó yo pé tyí ne, pé to nǎh kè yo pè syah n pɪ, nê gbõ yõ-á pé n pɪ tyi nópilɛ.

Sèmìrkì nê-á yǎh dínpi nêpî nímí yísyó tyí yõ

28 Képah sɔkɔ, Yesu tã yo pé tyí ne: «Mé kɪ sèmìrkì yó yǎh yé tyí, yè mó yé sǎnɔ yo ní tyí ké tyí sɔkɔ. Dínpi nêpî nímí lésõ me dí yó tyí. A me nɔ de gben tẽne, té yo ò tyí ne, pé pídí, nǎkẽ à kyɪ tã pɪ pé tyí yèrɛsẽ swǎh sɔkɔ kweyne.

29 A me ò sú syah ne kyɪ dékè nǎh me pé tẽ. Té dõ kwéy, à kè wɛ ké yah nǎh. A me yuku sɔkɔ swǎh sɔkɔ.

30 Sú mè me tã nɔ de ò pídí ní-òle, à wey núkú mè ó yo ò to tyí. Nmɔ me yo ò tyí ne, páh kɪ kyɪ, pé bõ. Té à nǎh pɔ kyɪ.

31 Nêpî nímí nópi sɔkɔ, nê tẽ pé sú nìvìnì pɪ?» Sárká syínwìlkìpu yõtã ànê kwil yèwàhnì nópi me ne gben tẽ-á. Képah sɔkɔ, Yesu me yo pé tyí ne: «Kègbì yõ mé kéle n yo yé tyí, mórí syípú ànê syó fòfìnpɪbì kɪ yé dyàh tẽ Liyel tǔrí nɔh yõ.

32 Yé náh we di, Nsyõ Ɔo yé tyí à Ɔo gbi wě̀kìlè yé wě̀kì, té yé náh sě̀ n̄ yõ. Nte mórí syípú ànê syó fòfínɔ̀bɔ̀ wɔ̀ pyè sě̀ n̄ yõ. Yé mó t̄õ kè we yíne, té kèpah fyé yõ, yé náh yé nno vi mo à sě̀ n̄ yõ.»

Sèmìrkì nê-á yāh yèrēsē swāh tópu népêl tyí yõ

33 Yesu t̄õ yo pé tyí ne: «Yé yé ní sah noh n̄ tyí sèmìrkì yóle n̄t̄õ yò: Sètē d̄í yó lésõ yèrēsē swāh kō, té kēkì mo kè kore vi, té swo yó t̄ũ tédáhkì yõ ké sɔkɔ, à ɔ̀ yèrēsē pye yíkí-ńsahle. Té ké syíkípú dókóntē-ńsah mo kèyy ké sɔkɔ. Kèpah náh, à yèrēsē swāh tópu yísyó tɔkɔ Ɔo sah ké yõ, p̄índibinɔ̀ yõ, té sɔkɔ kóló sɔkɔ.

34 Sé pye gbɛ gbí-á Ɔo n nɔ, sètē d̄í n̄ t̄õnɔ̀bɔ̀ t̄õ yèrēsē swāh tópu nópi tyí ne, pè pé we we t̄ēne pè k̄õ pè Ɔo pé k̄õ.

35 Nte yèrēsē swāh tópu nópi yuku pè t̄ē, té núkú ko kèpékèyô, té kèyāh ko mo, té kèyāh minki ko dyēhle.

36 Sètē d̄í t̄õ n̄ t̄õnɔ̀bɔ̀ yísyó tɛkì mo, nónó-á dò kal gbɔ t̄anne. Pè t̄õ pépi tɔ ɔ̀ s̄entē óle.

37 Kāh ɔ̀ s̄ē, à t̄õ n̄ pídí t̄õ pé tyí t̄éyne, té me n s̄õ ne, p̄āh kɔ̀ n̄mo wɔ̀ yah sen ku.

38 Nte yèrēsē swāh tópu nópi-á fyò n̄ pídí we, pè núkú yo w̄ē tyí ne, n̄ gb̄yō-á yò. Pè Ɔo pé à ko mo, gb̄kì mó ɔ̀ pépi tyíle.

39 Kèpah t̄ēne, pè núkú à fyāh t̄ē, té à wilki mo swāh kahn̄ne, té à ko mo.

40 Yé tɔkɔ nɛ n yah kè; sètě dí-à pɔ pɔ, sɔ̃ mɛ à kɪ pɪ péle?»

41 Pè mɛ nɛ, wǎh kɪ kéne nɛpɛl ko mɔ pélpɛl, té kɪ yèrɛsɛ swǎh tɔ́pú yísyó tɔkɔ pɔ sah ò swǎh mɛ yó, píndibinɔ yó. Pépi wɔ-á kɪ ò wɛ wɛ tɛnɛ ònɛ n kɔ́ ké gbí sɔkɔ.

42 Képah sɔkɔ, Yesu mɛ yo pé tyí nɛ: «Yé se kɪ nɛ yé náh wɛy mɛ kar yah pólle, nê-á yo Liyel wɛy sébéy sɔkɔ nɛ òkɛ:

«Wòkò mópú-á dáhkì nê yahle,

képah yétò pɔ kal.

Tě ògbě tò vyǎh ye képahle.

Gbëndùní tir ye kéle ápi yah sɔkɔ yò dé!»†

43 Képah yóntɛnɔ náh, Yesu tɔ̃ yo pé tyí nɛ: «Mé kéle n yo yé tyí tɔle nɛ, Liyel tɔ́rí sɔkɔ tɛnó kɪ syi yépi Nsyifunɔ tyí kɪ yìkì yó névye kɔ́, nónó-á kɪ tyípéplɔle n pɪ ké sɔkɔ Liyel-á mɛ nónó tyí. [

44 Wòkò mópú-á dáhkì nê yahle, névi nê-à wil syikɪ képah yó, tɛ kɪ kwɔkɪ. Té káh se mó tɔ̃ syikɪ nê yó, kè kɪ tɛ pyǎhrɪ.]»

45 Sárká syínwìlkɪpu yòtām ànê Farisi wɛkì kópú-á fyò sèmirn nópi noh, pè pĩ nɛ pépi yó-á Yesu mɪ séle.

46 Képah tɛnɛ, pè sò mɛ ké tyí nɛ pé à tɛ, té tówú tíkì pè tɛ. Tówú sò mɛ Yesule n tɔkɔ n pɪ Liyel tɛntò syínyo-òle képah ye.

† 21:42 21.42 - Yah n tɛ Gbálnó 118.22-23; Tyípìnì 4.11.

22

Sèmìrkì nê-á yāh fúr yōke yónó tyí yō

¹ Yesu tō tyah sèmìrkì yóle n yāh pé tyí ne:

² «Liyel tōrí-á kɪ fě tɔkɔ sāh sèmìrkì nēne, kè we yò: Yòtē dí yó lésō ò pídí fúr fèn pɪ.

³ Té me ò tònɔɔbɪ wilki tō ne, pè kyɪ néyénó ye n pɔ fúr yōke yó-ńsah. Nte néyénó nópi náh sò me ké tyí ne pé pɔ.

⁴ Képah tēne, à tō tònɔɔbɪ yísyó wilki tō pé tyí ne, pín-á pɪ te. Páh nyéhpyénì ànê yípêy ko te nɪrɪ-á me nónó sɔkɔ. Tyí pól-á pɪ te, pè pɔ fúr sɔkɔ.

⁵ Nte néyénó nópi náh kè mɔ kō pólle. Nyɔ-à yuku à n sɔkɔ ò swāh, nyɔ-à yuku à n sɔkɔ ò gbò yí-ńsah.

⁶ Pé tókù me yuku mɪ yòtē dí tònɔɔbɪ sɔkɔ, à pè fōh pélpèl, té pè ko mɔ.

⁷ Képah sɔkɔ, yòtē dí fɔkɔ kah vyāh. A me ò sràsyíbí tekɪ mɔ pè kyɪ kéné nékókè mópú ko mɔ, té pé kwil suke.

⁸ Képah náh, té yo ò tònɔɔbɪ tyí ne, fúr yōke-á pɪ te. Nte néyénó nópi náh sò yīne yōke mē yónóle.

⁹ Nkě pè kyɪ wětlo yey sɔkɔ, pàh kɪ fyò névye nónó we, pè pé pól ye n pɔ fúr yōke yó-ńsah.

¹⁰ Tònɔɔbɪ nópi me sɔkɔ wāl yey sɔkɔ. Páh kyɪ té névye nónó we, nétúkúni tɔkɔ dohnɪ népéplɔ yō, pè pé pól ye pɔ tuke mɔ, fós fúr pí-ńsah wòkò pól yuku yōke yópúle.

11 Yòtḗ dí-á de yuku yáh-ńsah pé tyí, à kyɪ dí yó we pé sɔkɔ nê náh sò me fúr flo mɔ.

12 A me yo kéné dí tyí ne, pé kódí, ñmɔ se de sɔ ásò sɔkɔ fúr flo kĕne ñ wil sɔkɔ ni? Nte yó-ńsah náh we dí tyí.

13 Képah sɔkɔ, yòtḗ dí yo tɔnpɪbɪ tyí ne pé ñ gbyêh ànê ñ gbàn pukubi, pé mó à min mɔ kégbó fĕntú sɔkɔ, ńyāh sɔkɔ-á gbní ànê yni táhnó kɪ me.

14 Yé náh we di, névyé nahnáh me yénóle. Nte nónó-á yah wilki pé sɔkɔ, pé náh me fwóɔ.»

Pó mórí mónóle Wrome kwiltām yòtḗ ñgbĕ Sesar tyí

15 Képah sɔkɔ, Farisi wĕkì kópú kyɪ wĕ we à yo sah núkú yò, sɔ-á pé kɪ pɪ té kɪ Yesu we n tĕ n pi ñ vyāh wey sɔkɔ.

16 Té me pé tò sáhpú yísyó ànê yòtḗ dí Yerɔdɪ náh névyé tókù wilki tó Yesu tyí ne pé kyɪ yo ñ tyí ne, pé kwó-ò dí, páh pĭ ne gbɪ yó-ò-á ñne, ànê wāh Liyel wĕkìle névyele n kwɔ gbɪ wĕkì yò. A náh névyé yah tíkile n pɪ. A náh névyele n wah.

17 Nte à ñ sɔnɔ yo pé syah. Nkĕ ké wĕkì se me kǔnóle ne pé mórile n mɔ Wrome kwiltām yòtḗ ñgbĕ Sesar tyí, tĭ ké wĕkì náh me kǔnóle?

18 Nte Yesu-á pé fɔkɔ sɔnɔ tókúnì pĭ sĕ, à me yo pé tyí ne, fòkòpĭl ànê vyāhsesyírí névyé nòpì, sɔ se pɪ té pé pé pĭlkintĕ-ńsahle n yah n kò ni?

19 Pé pɔ mórí mɔ mɔ pó pó núkúle pé yah ätre. Pé me pɔ ké núkúle à kò.

20 Yesu me pè piki yah ne, nê yah mîrkí ànê n yĩn se wárkínmɔnɔle ké yõ yò nɪ?

21 Pè me yo n tyí ne, Sesar tyí-á. Képah sɔkɔ, Yesu me yo pé tyí ne, pè Sesar tyíle Sesarle n kɔ́, pè mó Liyel tyíle Liyelle n kɔ́.

22 Páh képah tẽ noh sɛ́, pé gbàn du. Pè me yal n tnô à sɔkɔ.

Lékyî yílkínmɔnɔ tyí yónóle

23 Lésõ mè óle, Sadusi wěkì kópú nónó-á nkěne ne n yo ne lékyî yílkínmɔnɔ náh me, pé tókù nɔ de Yesu tnô té à piki yah ne,

24 kwó-ò dí, Moyisi-á kè yo n tyi kònsàhnó sɔkɔ ne, dí nê-à ku pi kěne n tyí, n gběndí-á yĩne à n kyɪ pékúsè mè tɔkɔ, à pi dubi à kɔ́, nê-á kɪ pɔ n pɪ n pi n nénkyí dí lékókè náhne.*

25 Nte sú núkú dínpi népi kwǎrnimi yísyó-á lésõ me pépi wró sɔkɔ. Gben tẽ me pɔ sê tɔkɔ, té pɔ ku pi wé-nkěne té n kyɪ sah n sò syɪ kɔ́.

26 Nte ñmɔ tɔ tyí tɔ pɔ pɪ sɛ́, tɔ-ò tɔ tyí pɔ pɪ képah núkú óle, fók à pɔ syɪ kwǎrní-ò tyí.

27 Pépi pól tyí náh, pi mè tɔ-á pɔ ku.

28 Nte pi mè-á de yah pé pól tyí sɛ́ à, lékyî yilki n mɔ sòle, à se kɪ n pɪ n pi pé népi kwǎrnimi nópi sɔkɔ nê tẽ tyíle nɪ?

29 Képah sɔkɔ, Yesu yo pé tyí ne: «Liyel wey sébéy pí-ńkě ànê Liyel tɛnwɛnɔ pí-ńkě ye mɔ sah yéle pílkínó sɔkɔ.

* **22:24** 22.24 - Nsyifuno tyí sò, pékúsè yĩne à de n pe tyí névi yó tyí. Yah n te Tõnyonɔ 25.5-6; Yenesɪ 38; Wruti 1-4.

³⁰ Yé yah, lékyî-à pɔ yilki mɔ, pédékè náh kɪ n me n pi, sétókókì tɔ náh kɪ n me n pi. Nte névye kɪ me yinyõ tɔnpɪbɪ tyí kɔ̃lɛ yinyõ.

³¹ Té à yuku lékyî yílkínmɔnɔ wɔ tyí sɔkɔ, Liyel-á nê yo yé tyí, yé náh kè kar yah di? A lésõ ne:

³² <Nmɔ ye Abrahmɪ Liyelle, ànê Yisakɪ Liyelle, ànê Nsyakɔbɪ Liyelle.>† Liyelle, lékyî Liyel náh nne dò, vye Liyel ye. Képah n wěkɪ ne á náh tãn Abrahmɪpi lékyî-á yilki mɔ.>

³³ Képah tẽnɛ, tówû nê-á sɔ̃ me ñ weyne n nohnɪ, pé gbãn du ñ névye kwɔ dukù tyíle.

Liyel tir kònsàhnó nê tyí-á tah kal

³⁴ Farisi wěkì kópú-á noh ne Yesu-á weyne Sadusi wěkì kópú tẽ, pè wẽ ye tuke mɔ.

³⁵ Té pé Liyel tyi kònsàhnó pípú sɔkɔ yó me píkinyahnɔ yó pɪ Yesu tyí ñ pilki n tẽ yinne ne,

³⁶ kwɔ-ò dí, Liyel tir kònsàhnó nê tẽ tyí se tah kal sé télólɛ nɪ?

³⁷ Yesu me yo ñ tyí ne: «Á Tẽ ñgbẽ Liyel tyí yĩne kɪ nɔ á tyí á nɪ póllɛ, ànê á min póllɛ, ànê á sɔnɔ póllɛ.>‡

³⁸ Képah ye tir kònsàhnó gbenne, ànê nê tyí-á tah kal.

³⁹ Ké ní-ò nê-á tɔ̃ me ké tyí kɔ̃lɛ, képah ye yò ne: <Ye á ní-ò tyí nɔ á tyí á gblɔy tyí kɔ̃lɛ.>§

† **22:32** 22.32 - Yah n te Yálnó 3.6. ‡ **22:37** 22.37 - Yah n te Tõnyonɔ 6.5. § **22:39** 22.39 - Yah n te Levitiki 19.18.

40 Moyisi tyi kònsàhnó ànê Liyel tǝntǝ syínyopu sébéynó sǝkǝ tyi pól me tyi kònsàhnónǝ nínó nópi sǝkǝ.»

Krista ye Davidi Tǝ ñgbǝne té tǝ pi ñ Pídǝne

41 Farisi wǝkǝ kópú-á sǝ me tǝkǝnmǝnǝle, Yesu me píkinyahnǝ yó pi pé tyí ne:

42 «Yépi tǝ sǝnǝ nǝne Krista tyí sǝkǝ, nê-á Liyel ney yáhntǝkǝnǝle? Nê pídǝ me ñne?» Pè me yo ñ tyí ne, Davidi Pídǝ-á.

43 Képah sǝkǝ, à me yo pé tyí ne: «Ñte kwâh nê pi té Liyel Mirki-á Davidi yah tǝ, Davidi me Krista ye Tǝ ñgbǝne? Yé nâh we di, à lésǝ ne ñkǝ,

44 nê-á péwǝ Tǝ NGBǝNE
Tǝ ñgbǝ Liyel-á kè yo ñ tyí ne ñkǝ,
à pǝ n kǝ n tǝ pé gbǝyǝ sǝle,
fóó kè pǝ nǝ gbǝ nê-á
pé kǝ ñ sépébi pi ñ gbáhkǝ súnsâh-ñsahle.*

45 Nte Davidi-á Krista ye Tǝ NGBǝNE à kǝ tǝ pi sǝ té kǝ pǝ n pi ñ Pídǝne?»

46 Yesu-á sépi yo, tyíyóné nâh tǝ fǝ we pé sǝkǝ yó ntǝ tyí. Té à tokǝ lésǝ tyí, ñnî yó ntǝ nâh tǝ ñ nǝ syâh à piki yah yah tir yó ntǝne.

23

Yesu-á nê yo à yuku Liyel tyi kònsàhnó kwópú ànê Farisi wǝkǝ kópú tyí tǝnne

* 22:44 22.44 - Yah n te Gbálnó 110.1.

1 Yesu yo ò tǒ sáhpú ànê tówû tyí ne:

2 «Liyel tyi kònsàhnó kwópú ànê Farisi wěkì kópú ye n kwɔ névyele Moyisi tyi kònsàhnóle.

3 Yé ne n nohni pé tyí, yè mó ne n kɔ pé yóré yǒ. Nte pǎh kwónó nónóne n pi, pè náh me n kɔ sé wǎl yǒ. Képah ye, yé káh pé pi dùkù tǔ wɔle n yah n pi.

4 Pǎh nkěne névyele n kwɔ tyi nónóne, sè me á ki ne tókópêl sǒ pè pukubi pè twah mɔ, té pè náh n fě n syi n so n mɔ pé tyí kèngbo núkú fyéle.

5 Pě pé gblǒyne n wěki pé tyípínì pól sɔko. Képah ye, kyésúpî nónó-á Liyel weyne sé sɔko yèwetyèh yey toh n mɔ mɔ tǔne, képah náh pi gbǎn tyí toh n mɔ mɔ tǔne, pépi pé tyínɔ pi gblò gblò, ò té pé flo vyěy dro pi flèyflèy.

6 Tǔ-ntàn gbroy tyí nɔ pé tyí yéno yó-ntàn sɔko ànê Liyel ní-ntàn vì sɔko.

7 Pè n ne n me ké tyí ne, névyé ne n tǒ n sah n weki n pɔ pé tyí tówû tükè-ntàn sɔko, pè mó péle n ye Kwópúle.

8 Nte yépi tyí kwó-ò núkú ó ye me, té yé tǔlò pólle núkú ye. Képah ye, yépi tǔ wɔ káh ne pè yéle n ye Kwópúle.

9 Sú núkú ó ye me yé tyí, nê-á me yínyǒ. Képah ye, yé káh ònî yó ntǔne n ye Súle sétáh mǔ yǒ sɔko ò Liyel wěkì kóló yinne.

10 Yah tǔ-ò núkú ó ye me yé tyí. Krista ye, nê-á Liyel ney yáhtokonole. Képah ye, yé káh ne pè yéle n ye Yah tǔpúle.

11 Yín-ńsah ñgbě-á me névi nê tyí yé soko, tẽ wo yĩne à pi yé tǒnpile.

12 Névi nê-à ñ gblǒy doko sah, tẽ ki tiki mo. Té nê-à ñ gblǒy tiki mo, tẽ ki doko mo.

13 Yépi Liyel tyi kònsàhnó kwópú ànê Farisi wèkì kópúle, pèkè me yé yõ. Vyěnníni wékípú ye yéle. Yě Liyel tǒrí noli yónó yah kò névye tyí. Yé náh me ké tyí ne yé ké noli yõ, té nónó-à se mó tǒ ne pé ké noli yõ, yě pé yah kò. [

14 Yépi Liyel tyi kònsàhnó kwópú ànê Farisi wèkì kópúle, pèkè me yé yõ. Vyěnníni wékípú ye yéle. Yě pékúsyole n vi n tẽ pé gbǎn yĩle n syi pé tyí, ñ té níri le n pi yòèkile ne névye pé we. Kǎh pi sě, yé tukey ki n pi n pi kèpékèyô kal no téló tyíle.]

15 Yépi Liyel tyi kònsàhnó kwópú ànê Farisi wèkì kópúle, pèkè me yé yõ. Vyěnníni wékípú ye yéle. Yě yrey ànê sétáh yõ pól ko n kò nénúkù fyé yáhnkòno soko Nsyifunó wèkì tẽ yĩnne. Té nê-à se we fě syi, yè n tǒ ñmo pi à kò à n yĩne dénóle ní-ńkě nyàhnpèkè soko à kal yépile ke nínó.

16 Pèkè me yé yõ, yépi nónó-á yah tǔpú yítũbile. Yè n ne n yo ne ńkě, névi-à n wo Liyel ní-ńsah wòkò kètǎrle, kèpah náh n mo n kò n pi. Té nê-à n wo Liyel ní-ńsah wòkò kètǎr soko sǎnne, kèpah-á ki mo kò.

17 Lékám kě névye, yítũbi nópi, sǎn wo se fónfó Liyel ní-ńsah wòkò kètǎr yõ soko, kèpah nê gbò yõ-á sǎn n mo n kò Liyel tyí yõ?

18 Yè n ne n yo tɔle ne níkě, névi-à n wo sárká súkénkõ-ńsahle, képah náh n mo n kō n pi. Té nê-à n wo sárká kwâhle, nê-á me sárká súkénkõ-ńsah yõ sɔkɔ, képah-á kɪ mo kō.

19 Yítūbi nópi, sárká wilki wilki kwâh wo se fónfó sárká súkénkõ-ńsah yõ, képah nê gbõ yõ-á sárká n mo n kō Liyel tyí yõ?

20 Névi nê-à fyò n wo sárká súkénkõ-ńsahle, tẽ ye ñ wo te ké yõ sárká yí tɔle.

21 Névi nê-à fyò n wo Liyel ní-ńsah wòkò kètãrle, tẽ ye ñ wo te Liyel tɔle, ñmo nê-á me ké sɔkɔ.

22 Névi nê-à fyò n wo yínyõle, tẽ ye ñ wo te Liyel tǒrí kō tɔle ànê ké yõ kǒntě-òle.

23 Yépi Liyel tyi kǒnsàhnó kwópú ànê Farisi wěkì kópúle, pèkè me yé yõ. Vyěnnínì wékípú ye yéle. Yě nànyè ànê pěnfěné pól gbãm-òbólè Liyelle n kō. Nte gbi wěkì kóló, ànê névye yãm yáhnó, ànê tyi pínólè sé wǎl yõ, sépi nónó tyí-á tah kal Liyel tyi kǒnsàhnó sɔkɔ, yè n pyě sépi wo yahle; sépi nónó-á yé yĩne yè ne n pi gbõnwòkò kěne, à tahlɪ yáh me nónónè n pi.

24 Névye yah tǔpú yítūbi nópi. Yáh nêne n pi yò, kè me á kɪ ne yé wo wo ní sǒ yé n syi à sèswõle n wilki ké sɔkɔ, té pyě yàhmínì wòle n wo n mo n yo sǒ.

25 Yépi Liyel tyi kǒnsàhnó kwópú ànê Farisi wěkì kópúle, pèkè me yé yõ. Vyěnnínì wékípú ye yéle. Yě wóhló ànê yěyóvyɔ náhló wu n tǒ n sah, té sé sɔkɔ táhló n ne me yúkúnólè yé yĩbe

yīle ànê yī nónó dékè kérékè-á me yé soko.

²⁶ Farisi wěkì kópú yítūbi nópi. Yé vyó soko táhló ògbò tǒ n sah. Képah soko, sé náhló tǒ kɩ pi yályál.

²⁷ Yépi Liyel tyi kònsàhnó kwópú ànê Farisi wěkì kópúle, pèkè me yé yǒ. Vyěnnínì wékípú ye yéle. Yé me á kɩ ne léyál pikínsàhnó sǒ. Sé kégbó n ne n me palle, té sé soko táhló n ne n me lékyî kègbèl ó ànê yípyáhnì duke duke pólle.

²⁸ Sě ye yépi tǒle. Kégbó soko, yè n pi n tē néglóle, té yé foko táhló mó tǒ me yúkúnóle fòkòpìl tyi ànê tyítúkúnìne.

²⁹ Yépi Liyel tyi kònsàhnó kwópú ànê Farisi wěkì kópúle, pèkè me yé yǒ. Vyěnnínì wékípú ye yéle. Yě Liyel tēntǒ syínyopu léyǎlle n tǒ n sah n mǒ. Névyé nónó-á pi soko néglóle Liyel yah, yě pépi tyínóle n koh n mǒ yípeplǒle,

³⁰ ò té ne n yo ne, yé tǒ-à sǒ me yé súbí me gbíne, yé náh náhkɩ n so n mǒ n pi pé tyí Liyel tēntǒ syínyopu kònmǒnǒ soko.

³¹ Nte yah, yé me kéle n wěkɩ yé gblǒy ne, Liyel tēntǒ syínyopu kònmǒpu pye-á yéle.

³² Ǫǒ, yé súbí-á nê tyah mǒ sah, yé gbah n tē kè syi kè.

³³ Vyeh nópi, wáhnmíró yísyóle n yah dé. Yé n to n pwah sǒ ní-ńkě nyàhnpekè yah soko?

³⁴ Képah ye, ńmǒ kɩ Liyel tēntǒ syínyopu, ànê yī pípú, ànê kwópú kègblo tekɩ mǒ yé kǒ. Nte yé kɩ pé tókù ko mǒ, té kɩ tókù syi dahlo yǒ, té

kɪ túkù ko yèfòhle yé Liyel ní-ńtân vî sɔkɔ, té kɪ kɔ pé náh péle n yĩni n kɔ kwlo kwlo sɔkɔ.

³⁵ Képah sɔkɔ ye lékàh kěpú pól kònṁṁṁ plo kɪ we sykɪ yé yǒ, pépi nónó-á ko mɔ à tɔkɔ Abeli kònṁṁṁ tyí, ñmɔ nê-á négbíle Liyel yah, pópó à pɔ syɪ Barakɪ pídí Nsakari tyí tyí, nê-á yé ko mɔ sárká súkénkɔ-ńsah ànê Liyel ní-ńsah wòkò kètār wró.

³⁶ Kègbɪ yǒ mé kéle n yo yé tyí, nékókè mónó nópi pól plo kɪ n sykɪ n pi kwey gbí névye yǒ.»

Yesu yah kwónóle Yerusalemɪ tyí sɔkɔ

³⁷ Yesu tǒ yo ne ńkě: «Yerusalemɪ tǎn, Yerusalemɪ tǎn, yépi nónó-á Liyel tǎntò syínyopule n ko n mɔ, té Liyel-á nónó tɛkɪ mɔ yé kɔ, yé pépile n minki n ko dyêhle, gbáhyí sǒ pól me mé kè yah kɔ ne, mé yé tuke n mɔ sǒ-á šin n tuke n mɔ ñ pyele ñ kám sò sɔkɔ, té yé náh fě syi?

³⁸ Káh pɪ sě, Liyel kɪ ñ náh vi yé kwil kɔ pnépné, kè kɔ kè kɪ pɪ kéntíkinine.

³⁹ Té mé kéle n yo yé tyí, yé náh tǒ ńmɔ we n yah n pi, fók kɪ pɔ nɔ gbí nê-á yé kɪ n yo ne ńkě, névi nê-á n pi Tě ñgbě yin yǒ, Liyel sǎm mɔ ñ sɔkɔ.»

24

Yesu me Liyel ní-ńsah gbô sónó ànê kèkǒyó tyénó tyíle n yo n sah

¹ Yesu-á wil Liyel ní-rísah gbô sòkò té n sòkò gbí nêne, ò tò sáhpú me nò de ò tnô à Liyel ní-rísah gbô mò òkùle n sò ò tyí.

² Nte à me pè syah ne, káh pè n yah yò kè; kègbi yò páh kéle n yo pé tyí, ké pól-á ki pò sò. Dáhkì núkú yó ntě náh tǒ n wũ n pi ké ní-ò yò.

³ Wáh kyi kǒ tǐ gbí nêne Wólívyê yèh yǒli yò, ò tò sáhpú me nò de òne pé yahle, té à piki yah ne, à yo pé syah, gbí nê se képah ki n pi n pi ni? Tir nê pínó se ki ò syínponò ànê kèkǒyó tyénó wèki n pi ni?

⁴⁻⁵ A me yo pé tyí ne: «Yé yah, névye náhnáh ki pò nímò yín tókò n pi pé yah yíne, té ki ne pépi-á nímòle, nê-á Liyel ney yáhnatòkòle. Pè ki névye náhnáh mò n pi pílkinó sòkò. Nte yépi tǐ wò yé gblǒyne n kyòmì, ney káh n fě yé pilki.

⁶ Yé ki mál pínó tyí yónó noh n pi, ànê mál tyí díri wónsàhnóle. Nte yé káh n ye tíki yé tǐ. Kè yíne kè pi sǐ. Nte képah náh tǒnì n pi n pi kèkǒyó tyénóle.

⁷ Yé náh we di, kwil yó ki pò yuku kwil yóle n fwo, tǒrí yó ki pò yuku tǒrí yóle n fwo. Té kwèki ànê sétáh syahrì ki n we n pi tàntàn náhnáh sòkò.

⁸ Nte sépi pól ki me á ki ne kúrkì tǐ gbí yónó sò tyàhnó sǐ.

⁹ Pè ki yéle n tǐ pè kǒ pè ki n fǒh, té ki yéle n ko mò. Kèkǒyó névye pól ki yé we mò nímò yíne.

10 Képah tẽ sɔkɔ, névye náhnáh kɪ Liyel wěkì fin mɔ. Pè kɪ n wil wě náh, té kɪ wě dyɔle n yɔ.

11 Té Liyel yĩn yõ mĩnyobe kɪ wil mɔ pí, kɪ névye náhnáh mɔ pĩkínó sɔkɔ.

12 Pèkè pínó kɪ yah syi, f́ó tyínɔnɔ náh t̃ n we n pi fwóó névye náhnáh sɔkɔ.

13 Nte nê-à ò tah sah à pɔ nɔ ké tyénó tyí, tẽ kɪ pwáhnɔnɔ we.

14 Képah sɔkɔ, Nìvìnì tir kɪ yo Liyel t̃rì tyí yõ kèk̃yó pól sɔkɔ, névye pól k̃ pè kɪ noh. Képah náh, kèk̃yó kɪ pyě tyɛ.»

Yevyãhrì nê-á kɪ pɔ n we n pi kèk̃yó

15 Képah sɔkɔ, Yesu t̃ nɛ: «Liyel t̃nt̃ò syĩnyo-ò Danyel-á lésõ yíkínó pɪ pɪ kwâh kèpèkè nê tyí yo sah,* yé kɪ kè we n pi Liyel ní-ńsah gbô tyah kètár sɔkɔ.» — Nónó-à kɪ wey mènɛ n kar, pè gbah n tẽ ké dùkù pĩ. —

16 Yesu t̃ yõ sɔkɔ ò weyne nɛ ñk̃: «Yâh kèpah we gbí nêne, nónó-à kɪ me Nsyude mara sɔkɔ, pè to sɔkɔ ymɔ yõ.

17 Névi nê-à kɪ me gběnt̃in yõ, tẽ káh nɛ páh n tiki pé vyóle n tokɔ pé wòkò sɔkɔ.

18 Nê-à kɪ se mó me ò swãh sɔkɔ, tẽ káh nɛ páh péle n syi n yuku pé fwómò-ñgbě tókó-ńsah.

19 Kéne sèp̃in-à pɔ syó nónó we kũrn nátãne, ànê nónó-à me yõkɪ syóle, kè kɪ pɪ yèwàhtàhpole pé tyí.

* 24:15 24.15 Yah n te Danyel 9.27 ; 11.31 ; 12.11.

20 Képah ye, yé yĩne yè Liyelle n ni ne tóló mè káh n pi vuri gbĩne, képah náh pi mi mi yòh sòle.

21 Kè ki pi yèvyährı ñgbēne, nê kénkõ náh we yah kèkõyó mómónì à pɔ syi kwey tyí, ànê nê kénkõ náh tō n we n yah n pi pólle.

22 Liyel-à náhki sò wĩkĩnó pí-ńkēne kéne sèpìn sɔkɔ, ñnî yó ñtē yō náh náhki pɔ n wil n pi ké sɔkɔ. Nte wǎh nónó yah wilki pi ñ tyíle, pépi yĩnne, à wĩkĩnó pi sé sɔkɔ.

23 Névi nê-à yé syah ne, Liyel ney yáhntɔkɔnɔ-á me ásô, képah náh pi wǎh me yàhàh, yé káh sē tē yō.

24 Yé yah, m̀nyobe ki pɔ wil mɔ pí. Pé tókù ki ne Liyel ney yáhntɔkɔnɔ-á pépile, tókù ki mó ne Liyel tēntō syinyopu-á pépile. Pè ki gbĩgbĩ tyi ñgbnɔle n pi, fók ki n yah n kō Liyel névyé yáhnwĩkĩnó ñtē tɔ yō yíkí-ńsahle káh sò fē n pi n pi.

25 Tyi nópi ye mé kwǎh tē yo sah yé tyí yò.

26 Képah sɔkɔ, névi nê-à yé syah ne Névi Pídí-á me gbēnni sɔkɔ, yé káh ne yáh ñ nyáhle n sò. Nê-à se ne wǎh me wǒb̀ntēnóle, yé káh sē tē yō.

27 Sǒ-á pũ n yĩkiri yǎl yè n we, à tɔkɔ gb̀ngboke tyí, fók n kyi n dal n mɔ gb̀nyiki tyí, sē ye Névi Pídí syínɔnɔ tɔ ki n we n pi.

28 Kwáhkókè se ki fē wǒb̀ ñkyònkýònì yah?»

Névi Pídí pónóle

29 «Kéne sèpìn nópi yèvyährı-à fyò sokò n te òsò, gbí kɪ pɪ syì, òwò nàh tɔ n piki n pi, òwò kèpye kɪ wil yînyô kɪ kwɛ, té yînyô yíyìn pól kɪ yike.

30 Légbíne, Névi Pídí syínpono kwní kɪ yô mɔ yînyô. Képah tɛne, sétáh yô yìkinì pól névyé kɪ n gbo kɪ yám yám tyile n pɪ. Té pè kɪ Névi Pídí wɛ à kɪ mɛ n pi nýîrn sokò, tãhkì ó ò tôó ànê tɔ́rile.

31 Kèpò ògbè yó kɪ fìbɪ, té à kɪ ò yînyô tònpuɓɪ tɛkɪ mɔ ywò ywò pól sokò, à tɔkò kèkòyó yah mè tyí, à kyɪ sah ké yah mè tyí. Pè kɪ kyɪ névyé tuke mɔ, Liyel-á nónó yah wilki.

32 Yé yah sènsóké kèdùkù-á nêne ále n wèkɪ. Yáh fyò ké yìngbàn wɛ sè n gboke n wil à mìsnole n pɪ gbí nêne, yè n pĩ ne ki de gbí-á me yúkey.

33 Sè ó ye, yépi tɔ-à pópó kéne tyi wɛ sè tyah n pɪ gbí nêne, yé pĩ ne Névi Pídí syínpono-á me yúkey. Wãh kɪ pɔ sè yò sè yò.

34 Kègbɪ yô mé kéle n yo yé tyí, kwɛy gbí névyé pól nàh n ku n te n pi, té kéne tyi nópi kɪ mɛ n pi.

35 Yînyô ànê sétáh kɪ pɔ tyɛ, òte òmɔ wɛlɔ tɛ wɔ nàh n tyɛ n yah n pi pólle.

36 Nte ké lésò ànê ké gbí tɛ wɛle, ònî yó òtɛ nàh sèpile n pne. Yînyô tònpuɓɪ nàh séle n pne, Liyel Pídí tɔ nàh séle n pne. Nnî yó òtɛ nàh séle n pne à wil Sú Liyel tyí sokò. Nmɔ ó ye n pne séle.

37 Nê-á pi sɔkɔ Nowe gbí sɔkɔ, sɛnkɔ ye kɪ n pi n pi Névi Pídí syínɔnɔ sɔkɔ.

38 Yé náh we di, gbí nê-á lésɔ púnphákì náh tɔ̀nì me pi à nine kèkòyó pól yó, névye lésɔ me n yó, té me n wɔ, té me syóle n tɔkɔ, képah náh pi me pé pyele pɛbɪle n kɔ́, pópó à pɔ syi Nowe de sɔ tyí krótó-̀ngbɛ sɔkɔ.

39 Pè náh sɔ me n sɔ tir yó nítɛ tyí sɔkɔ, fókó à pɔ nɔ púnphákì pi sɔ tyí, ni kɔ́ kè pɔ pé pól yó. Sɛnkɔ ye kɪ n pi n pi Névi Pídí syínɔnɔ sɔkɔ.

40 Díbí népí ní mí kɪ me swáh sɔkɔ, núkú kɪ tɛ sɔkɔ, té n̄ ní-ò kɪ wũ.

41 Syó népí ní mí kɪ me nanne n nɔ, núkú kɪ tɛ sɔkɔ, té n̄ ní-ò kɪ wũ.

42 Yé Tɛ̀ ̀ngbɛ-á n̄ syi n pɔ n pi sɔ n̄ne, yé náh me kè pĩ. Képah ye, yé káh yé dyɔ mɔ n fwɔ n tɛ̀.

43 Yépi nítɛ pĩ ne, gbóntɛ dí-à me pĩ gbí nê-á yɛnwó kɪ n pɔ n pi lékâhne, à kɪ yah sɔ, à náh ye à kɔ́ à we kwɔ n de n pi n̄ gbô sɔkɔ.

44 Képah ye, yépi tɔ ne me yé vi sah. Ngbõ yé náh me gbí nê tyíle n sɔ, légbí ye Névi Pídí kɪ n̄ syi n pɔ n pi dé.»

Tõnpɪ-á yĩne à ne me sɔ

45 «Tõnpɪ négbí ànê lékám névi nê me yòtɛ dí kɪ tɔkɔ sah n̄ tɔnpɪbɪ téló yó, à kɔ́ à kɪ yòkele péle n kɔ́ ké gbí pèpey sɔkɔ, té kɪ sɔkɔ kóló sɔkɔ?

46 Yòtě dí-à ò syi pɔ à wɛ à mɛ kéne tòlɛ n pi ké yah yõ, tònpi mè tyí nɔ.

47 Kègbi yõ mé kéle n yo yé tyí, yòtě dí ki à pi ò gbàn yi pól kyòmì-òlɛ.

48 Nte kàh pi tònpi tókùlɛ, té à tyah n sò ne pé yòtě dí-á mɛ mo ò syínpɔ-ńsah,

49 té tyah pé no tònpi télólɛ n ko, té n yõ té n wɔ sètɛnì pípùlɛ wě tyí,

50 ò yòtě dí ki ò syi pɔ ò yõ dɔkɔ sò yólɛ, ànê wô yó sɔkɔ, à nàh mɛ nê tyíle n sò.

51 A ki tònpi mè yini, té ki à tekɔ mo yínvɛnpi mé-ńsah sɔkɔ, ńyàh sɔkɔ-á gbní ànê yní táhnó ki mɛ.»

25

Sèmirkì nê-á yàh syónpi népî gbām tyí yõ

1 Yesu tō yo ò tò sáhpú tyí ne: «Névi Pídí syi n pɔ gbíne, Liyel tǒrí ki fě tɔkɔ sàh syónpi népî gbām yísyó sèmirkìlɛ, nónó-á pé fòtnònó tɔkɔ sɔkɔ pɛ yòhnì-ńsah.

2 Syónpi nópi sɔkɔ, népî kwâl sò mɛ lékám kěpùlɛ, té kwló mó mɛ lékámputɛ.

3 Nónó-á lékám kěpùlɛ, pépi-á sò pé fòtnònó tɔkɔ n sɔkɔ, pè nàh niri wàn tɔkɔ.

4 Nte lékámputɛ nópi wɔ mó pé fòtnònó tɔkɔ, té niri mɔ sɔkɔ sonó sɔkɔ.

5 Pɛ-á mo pó-ńsah, dɔy mi pé sɔkɔ, pè dɔ sɔkɔ.

6 Lénú wérrlɛ, yínpɔ yó n dɔkɔ ne ńkě, pɛ-á oo, pè wil à yohnú.

⁷ Képah tẽne, syónpì nópi pól do yuku, té yah dah mo pé fòtnònó tyí soko.

⁸ Nónó-á lékám kěpúle, pépi me lékampu nópi syah ne, pé yĩ pé kō nɪrɪle, nkě pé fòtnònó-á me tẽ syi n ni pé tyí.

⁹ Pè me yo pé tyí ne, sè náh fẽ n yĩne n pi pépi tyínole té pé tō n yĩ n kō n pi. Nkě pé kyɪ n yah dwe yãmpu tyí pé mo pé tyínɔ soko.

¹⁰ Pãh soko yáhndwe-ńsah, pe po de. Syónpì nónó-á sò me pé vi sah, pépi me de ñne fúr yòke yó-ńsah wòkò soko, té pé me wùkah vike.

¹¹ Syónpì nópi téló-á pópó pé syɪ po, pé po wùkahle n mu té me yo mo tũ ne nkě, pé yòtẽ, pé yòtẽ, à yɪkɪ mo pé kō.

¹² Nte à me yo pé tyí ne, kègbɪ yò páh kéle n yo pé tyí, pé náh péle n pne.

¹³ Képah ye, yépi káh yé dyo mo n fwo n tẽ dé. Yé náh se yó lésò ànê ké gbíne n pne té.»

Sèmìrkì nê-á yãh tònɪbɪ népî tǒmí yísyó tyí yò

¹⁴ «Liyel tǒrí-á me sèmìrkì nê kètòle, kè we yò: Dí yó lésò n soko kóló soko, té n tònɪbɪ ye po n tahrɪle pé kō sah,

¹⁵ à yĩne pé nénúkù núkú pól-á fẽ nê pi n pi. A talã* pó pló kwlóle ñnî kō, té nínóle ñnî kō, té me núkúle ñnî kō. Képah náh, té soko n kóló soko.

¹⁶ Nê-á we talã pó pló kwlóle, ñmo núkú kyɪ n gbò vi n tyíle à kwló yísyó we dohnɪ sé yò.

* 25:15 25.15 - Yah n te Matye 18.24 yah yónó soko.

17 SĚ-ó ye nê-á we talã pó pló nínóle, ò to me nínó we dohnı sé yõ.

18 Nte nê-á we talã pó pó núkúle, òmò me sokò kyı swò tũ à ò yòtĕ dí pó wõbı.

19 Ké di-á mo náhnáh, pé yòtĕ dí ò syı pò. Wǎh pò, à pè ye ne pè pò pé tahrı tyı dükù yo pé noh.

20 Képah tĕne, nê-á sò we talã pó pló kwlóle, òmò me ò tyı tókò nò de ò yòtĕ díne té kwló yısyó tóle à wĕkı, té yo ò tyı ne, pé yòtĕ, talã pó pló kwló-á sò à pé kò sah, òte à yah, páh kwló yısyó we dohnı sé yõ ò tyı.

21 N yòtĕ dí me yo ò tyı ne, kǎh ple, tònpi pèpey ànê négbı-á òne. Wǎh fyò pi négbıle tir tyı̃ sokò, páh ki tyı-ògbnò dahbı ò gbò. A pò pé nìvìnìne n pi wĕ tyı. / N yòtĕ dí me yo ò tyı ne, kǎh ple, tònpi pèpey-á òne nê-á tyile n pi sé wǎl yõ. Wǎh fyò tir tyı̃ pi ké wĕkì yõ, páh ki tyı-ògbnò dahbı ò gbò. A pò pé nìvìnìne n pi wĕ tyı.

22 Nê-á sò we talã pó pló nínóle, òmò to me ò tyı tókò nò de ò yòtĕ díne té yo ò tyı ne, pé yòtĕ, talã pó pló nínó-á sò à pé kò sah, òte à yah, páh nínó yısyó we dohnı sé yõ ò tyı.

23 N yòtĕ dí me yo ò tyı ne, kǎh ple, tònpi pèpey ànê négbı-á òne. Wǎh fyò pi négbıle tir tyı̃ sokò, páh ki tyı-ògbnò dahbı ò gbò. A pò pé nìvìnìne n pi wĕ tyı.

24 Képah náh, nê-á sò we talã pó pó núkúle,

ñmɔ-á nɔ de, à n yòtě dí syah ne ñkě, pé yòtě,
páh pĩ ne ñkě n tò-á tah. A náh sèmukɔ nê
duku mɔ, ă kè tɔkɔ. A náh nê mir mɔ, ă kè kō.

²⁵ Képah-á tíkí pé tě, pé me kyɪ n pó wõbɪ
sétáh sɔkɔ. Kăh yò, à tɔkɔ n póle.

²⁶ N yòtě dí me yo n tyí ne, tǒnpɪ nétúkù,
gbãndal névi-á ñne. Wăh sò pĩ ne ñkě, pé náh
sèmukɔ nê duku mɔ, pě kè tɔkɔ, pé náh nê mir
mɔ, pě kè kō.

²⁷ Kăh pɪ sě, wăh nâhkɪ mó sò me kyɪ pé pó
dah mɔ sah pó sâh-ñsah wòkò sɔkɔ kè. Páh pé
syɪ pɔ sǒ yò, páh nâhkɪ mó sè we wilki
dòhnìnóle sé yò kè.

²⁸ Nkě pé n tyí mè tě syɪ n tyí, pè kéle talã pó
pló gbãm nétě kō.

²⁹ Pè kó we nɪ, névi nê tyí kwâh-á me,
dòhnìnó-á kɪ n pɪ ñmɔ tyí yò yrõyrõ. Té névi nê
tyí kwâh náh me, kwéy nê ñtě-á me n tyí, kăh
kɪ tě syɪ n tyí.

³⁰ Yõre kě tǒnpɪ mè tě wɔle, ñkě pè à wilki mɔ
kégbó fěntũ sɔkɔ, ñyăh sɔkɔ-á gbñí ànê yní
táhnó kɪ me.»

Tukey nê-á kɪ n pɪ n pi Névi Pídí syɪnpɔnɔ sɔkɔ

³¹ «Névi Pídí-à n syɪ pɔ n tǒrí sɔkɔ ànê yínyõ
tǒnpɪbɪ pólle gbí ñne, à kɪ kō tě n tǒrí kǒ yõ.

³² Kwlo kwlo pól névyɛ kɪ pɔ tuke mɔ n yah
sɔkɔ. Té à kɪ névyɛ wah wilki wě sɔkɔ, sǒ-á
yípénfě n wah n wilki képyénì ànê perle wě
sɔkɔ.

33 A ki négblo sah n gbòyò sòle, té ki népêl sah n gběyìnè sòle.

34 Képah soko, nónó-à ki me n gbòyò sòle, à ki yo pé tyí ne: <Ní Sú Liyel-á sãm mọ yépi nónó soko, té tǒrí nê yah sah yé kǒ kèkǒyó mọ gbí dükùle, yé pọ ké nǎlule n yǒ.

35 Yé náh we di, kweki-á sò ní tǎ, yé yǒkele ní kǒ mé yǒ. Níkí-à sò ní tǎ, yé nine ní kǒ mé wọ. Máh sǒ me népôle, yé ní kǒ mé twah yé tyí.

36 Máh sǒ me flo kǎne, yé flole ní kǒ mé mọ. Máh sǒ me n yo, yé yah dah mọ ní tyí soko. Máh sǒ me wòkònpèkè soko, yé pọ yah ní tyí.>

37 Képah soko, négblo nǒpi ki à piki yah ne, Tǎ ngbǎ, gbí nê se pé we òne kweki soko, té à kǒ à yǒ ni? Anê gbí nê se pé we òne níki soko, té à kǒ à wọ ni?

38 Gbí nê se pé we òne népôle, té à kǒ à twah pé tyí ni? Anê gbí nê se pé we òne flo kǎne, té flole à kǒ à mọ ni?

39 Gbí nê se pé we òne à me n yo, képah náh pi à me wòkònpèkè soko, té pọ yah n tyí ni?

40 Képah soko, yǒtǎ dí ki yo pé tyí ne: <Kègbi yǒ mé kéle n yo yé tyí, ní yúnpyé nónó-á yò kè, yáh níkǎne sǎnknole n pi pé soko tyítyí nónó fyé tyí, nímọ tyí ye níkǎne yè n ne n pi séle.>

41 Képah náh, nónó-à ki me n gběyìnè sòle à ki yo pépi tyí ne: <Yé to ní tnô, yépi nónó tyí-á yiki. Yé ne n yuku ní-níkǎ nyàhnpèkè soko, képah nê-á me mónsàhnóle sétàn ànê sé yǒtǎ

yīnne.

⁴² Yé náh we di, kweki-á sò ní tẽ, yé náh ní kō mé yō. Níkì-á sò ní tẽ, yé náh ní kō mé wɔ.

⁴³ Mé sò me népôle, té yé náh fẽ syi ní kō mé twah yé tyí. Mé sò me flo kěne, té yé náh flole ní kō mé mɔ. Mé sò me n yo, té me wòkònpèkè sòkɔ, té yé náh pɔ yah ní tyí.>

⁴⁴ Pépi to kɪ à piki yah ne, Tẽ ògbě, gbí nê se pé we ònne kweki sòkɔ, képah náh pi níkì sòkɔ, képah náh pi népôle, képah náh pi flo kěne, képah náh pi me n yo, képah náh pi me wòkònpèkè sòkɔ, té pé náh à yohnu mɔ nu?

⁴⁵ Képah sòkɔ, à kɪ yo pé tyí ne: <Kègbí yō mé kéle n yo yé tyí, ní yúnpyé nónó-á yò kè, yáh òkěne n yahle sɛnkno pínóle pé sòkɔ tyítyí nónó fyé tyí, òmɔ tyí ye òkěne ye n yahle pínóle séle.>

⁴⁶ Tyé-òkě yèvyährɪ sòkɔ ye nètúkúnì nòpi kɪ kyɪ n de n pi, té négló nòpi wɔ kɪ kyɪ tyé-òkě min we.

26

Pè me Yesu tẽ-òsahle n yah n kō lékámkām sòkɔ

¹ Yesu-á tyi nòpi pól yah yo te gbí nêne, à yo ò tò sáhpú tyí ne:

² «Yé pĩ ne òkě sèpìn níni-á wũ, té Pakɪ syáh kɪ syah. Névi Pídí kɪ tẽ pè kō pè kɪ à syɪ dahnu yō.»

³ Légbíne, sárká syínwìkìpu yòtãm ànê kwil yèwàhnì wě tuke mɔ sárká syínwìkìpu yòtě ñgbě tinnɛ, nê-á pè n ye Kayifile.

⁴ Té yo sah núkú yõ ne pé ye Yesu tẽ lékámkãm sɔkɔ, pé mó à ko mɔ.

⁵ Pè sò me yo tũ wě tyí tɔle ne, tir mè náh yĩne kè pi syáh syáhnó sèpìn sɔkɔ dé. Páh kɪ kèpah pi, névyɛ-á kɪ tyah fěkɪ.

Sê yó pèpɔri pi Yesu tyí

⁶ Sõ yóle, Yesu lésõ me tótě dí Simo gbô, Betani kwil sɔkɔ.

⁷ Wãh me yõke yónó sɔkɔ gbí nêne, sê yó me nɔ de ñ tnô nuri so pèpey yóle ñ tyí làsèkwě̀l dénkókòle ké sɔkɔ. Kèpah tẽne, té làsèkwě̀l mè mɔ Yesu yõ yõ.

⁸ Yesu tò sáhpú-á kèpah tẽ we sě, pé fɔkɔ vyãh. Pè ne kwãh nê se pi té à làsèkwě̀l mè yɪkɪ sě yò nɪ?

⁹ Kãh nãhkɪ sò fě yãm dántãhle, à ké pó dibi yãm tãn kã.

¹⁰ Yesu-á kèpah we sě, à me yo pé tyí ne: «Sõ pi té yé pi mè yahle n vyãh sě? Tyípépěy ye à pi ñmɔ tyí.

¹¹ Yé yah, yãm tãn kɪ me yé wró sɔkɔ gbíme gbí. Nte ñmɔ wɔ náh kɪ me n pi yé wró sɔkɔ gbíme gbí.

¹² Nê-á pi mè pi yò, ñmɔ lékó yĩ sò yĩn ye à pi sah kéle.

13 Kègbi yõ mé kéle n yo yé tyí, kèkõyó pól sòkò, Nìvìnì tir mè-à n yo fí nê sòkò, pi mè tyípíkì mè tò kì yo, névye dyò kã kè kì n kwne ò tyíle.»

Nsyudasì me ké tyí ne pé Yesule ò tẽpú wẽkì

14 Yesu tò sáhpú népî gbõnimí sòkò, nê-á pè n ye Nsyudasì Yisikariyõtìle, òmò me kyì wil sárká syínwìlkìpu yõtãm tyí,

15 té pè syah ne, pè se kì pé kã kwâh nêne pé mó kè pì pè kã pè Yesu we tẽ nì? Pè me pò pló yõgbãmne à kã.

16 A tókò légbí tyí, à tyah n yah n kã wãh ne pì sã té pè Yesu we n tẽ n pì.

Pakì syáh yõke pínóle

17 Kókónó kân búrn syáh tyah sòle, Yesu tò sáhpú pò à piki yah ne, nýãh sòkò se à me ké tyí ne pé kyì Pakì syáh yõke pì ò tyí nì?

18 A me yo pé tyí ne: «Yé kyì n yo yãhnkõ tyí kwil sòkò ne, kwó-ò dí-á yo ne níkẽ pé gbì-á me se n te, níkẽ òmò tìn-á péwò ànê pé tò sáhpú kì pò n yò n pì Pakì syáh yõkele.»

19 Wãh kè yo sã ò tò sáhpú tyí, pè me sòkò ò yóré yõ, à kyì yõke mè pì.

20 Lékâh-á pò mò, òmò ànê ò tò sáhpú népî gbõnimí me kã tẽ yõke sò.

21 Té pãh me yónó sòkò, à yo pé tyí ne: «Kègbi yõ mé kéle n yo yé tyí, yé sòkò yó kì pì pè kã pè kì n tẽ n pì.»

22 N tò sáhpú-á képah noh, pé yey kwo kègbule. Képah tēne, nê mè nê mè, tē à piki n yah ne, Tē ñgbē, péwɔ se à n ye ni?

23 A me yo pé tyí ne: «Nê-á me n di nímole dú núkú sɔkɔ yò, tē wɔ ye kɪ pɪ pè kɔ pè kɪ ní tē n pi.

24 Névi Pídí kɪ n ku n pi à yīne kǎh wǎrkɪ sah Liyel wey sébéy sɔkɔ sɔ̀ ñ tyí sɔkɔ. Nte névi nê-á kɪ pɪ pè kɔ pè kɪ à tē n pi, pèkè kɪ pɪ tē tyíle. Tē-à sò me dúbí-ńkēne, képah náhkɪ fónfó ñne.»

25 Nsyudasi nê-á sò me ké tyí ne pé pɪ pè kɔ pè à tē, ñ tɔ me à syah ne, kwó-ò dí, péwɔ se à n ye ni? A me yo ñ tyí ne: «Áwɔ ye yo kéle.»

26 Té pǎh me yónó sɔkɔ, Yesu búrn tɔkɔ té wekɪ Liyel tyí, té kè kwɔkɪ à ñ tò sáhpúle n kɔ, té yo pé tyí ne: «Yé syi n tah kéle. Nyole, nímɔ wil ye.»

27 Képah náh, à tǔ wóh tɔkɔ ðivēne ké sɔkɔ té wekɪ Liyel tyí, té kéle pè kɔ té yo pé tyí ne: «Yé pólle, yé kè wɔ.

28 Yé náh we di, nyole, nímɔ tǔ ye, nê-á kɪ névye yégbékè kwɔ mɔ ànê Liyelle. Kè kɪ n kwe n pi nékwínkí yīnne, kɪ pé tyípél yǔ mɔ.

29 Mé kéle n yo yé tyí, à tɔkɔ núkúnúkú tyí, mé náh tǔ ðivē wɔ n yah n pi, pópó kɪ pɔ nɔ sò nê-á mé kɪ tǔ ðivē sǎn yó wɔ yéle ní Sú Liyel tǔrí sɔkɔ.»

30 Képah náh, pè syáh yì gbɪ, té wil à n yuku Wólívyè yèh yǔlɪ yǔ.

Yesu ne Pyeri-á kɪ ñ vyǎh kǔlɪ ne pé náh pé pǐ

31 Képah sɔkɔ, Yesu yo n tò sáhpú tyí ne: «Kwey lékâh mē ntě óle, nímɔ tyí kɪ yé pól kɔ yé kɪ yal mɔ n sò tẽnóle. Yé nâh we di, kè me wárkínsàhnóle Liyel wey sébéy sɔkɔ ne: «Mé kɪ yípenfě ko mɔ, té képyénì tũ pól kɪ karkɪ.»*

32 Yesu tǔ ne: «Nte n lékó yílkínmɔntenɔ nâh, mé kɪ mɔ yé yahle Kalile mara sɔkɔ.»

33 Képah tẽnɛ, Pyeri me yo n tyí ne, no téló pól-à kɪ sǔ yal mɔ n sò tẽnóle, péwɔ tẽ wɔ nâh n yal n mɔ n pi pólle.

34 Yesu me yo n tyí ne: «Kègbɪ yǔ mé kéle n yo á tyí, kwey lékâh mē ntě sɔkɔ, sénpe-à kɪ pópó n gbo, á kɪ me á vyãh kǔlɪ te ke tǔnó ne á nâh nímɔ pĩ.»

35 Pyeri me yo n tyí ne, kâh kɪ sǔ nɔ pé kúnó tyí ñne wě tyí, pé nâh pé vyãh kǔlɪ yah n pi pólle ne pé nâh à pĩ. Yesu tò sáhpú téló tɔ me képah ó yo.

Yesu Liyel nínóle Ketisemanɪ sɔkɔ

36 Képah sɔkɔ, Yesu ànê n tò sáhpú kyɪ yĩni tẽ fí yó sɔkɔ, pé n ye Ketisemanɪne. A me yo n tò sáhpú tyí ne, pé kɔ tẽ ásô pé kyɪ Liyel ni n pɔ yàhàh.

37 Wãh n sɔkɔ, à Pyeri ànê Nsebede dínpi népí ními tẽ sɔkɔ. Yèkwɔri ànê tíkí kápékè sò me tyah n mɪ n sɔkɔ.

38 Kãh pi sě, à me yo pé tyí ne: «Yèkwɔri me n sɔkɔ, me n pi n ko ko tẽnɛ. Yé tẽ ásô, yépi tɔ

* 26:31 26.31 - Yah n te Nsakarɪ 13.7.

káh yé dyo mo n fwo n tẽ, sǔ-á nımo náh me n dyo mo fwo tẽ.»

³⁹ Té me yuku yahle kwéy à kyı ko kwĩnki n yah di sétáh, à Liyelle n ni ne nkẽ: «Nımo Sú, káh ki fẽ n pi n pi, yèvyãhrı mè gbe mo nımo. Nte mé náh ne á kè pi nımo-á me ké tyı sǔ dé, kè pi áwo-á me ké tyı sǔ.»

⁴⁰ Wãh n syı po n tò sãhpú népı tǔmı nópi tnô, à po pè we pè me n do. A me yo Pyeri tyı ne: «Yé kègbı yǔ, yé náh tẽ we lérı núkú ntẽ fyé pi yáhnó soko nımo kè?»

⁴¹ Yé káh yé dyo mo n fwo n tẽ. Yé nırıle n pi yé káh n po tǔnmɔnɔ fẽ n syı. Tyıpéplɔ sǔno n ne n me névi soko, té sé tẽnwenpıno tãhkı náh n we n soko.»

⁴² Wãh képah yo, à tǔ gbe mo péle ke ní-òle à kyı Liyelle n ni ne nkẽ: «Nımo Sú, nı yǔ-à ki fẽ n wil n pi nkẽne yèvyãhrı mè soko, áwo-á me nê tyı, képah pi.»

⁴³ Wãh tǔ n syı po, à po pè we pè tǔ me n do. Doy sǔ me tẽ we pé tyı.

⁴⁴ A tǔ yal pé tnô à gbe mo kyı Liyel ni ke tǔ-òle gbro tãn tyı kǔle.

⁴⁵ Képah náh, à n syı po pé tnô, té yo pé tyı ne: «Yé me doy soko sǔ me yéle n mı kè? Névi Pídı tẽ n dahbı gbı we no tyıpél pípu gbǔ yò.

⁴⁶ Yé yuku à soko. Névi nê-á ki n dahbı n pi pé gbǔ, à we n de yò.»

Yesu tẽnóle

⁴⁷ Yesu me képah yónó soko, té Nsyudasi nê-á n tò sãhpú népı gbõnimı soko yóle, nımo yın

nékwíńkí yísyó yah pè pɔ de kèkírń ànê ísnine pé tyí. Sárká syínwìlkìpu yòtām ànê kwil yèwàhni ye sò tekì mɔ péle.

48 Té Nsyudası nê-á sò n dahbı n pi Yesule pé gbò, à sò me pi dùkù yóle pé wèkì sah. A ne páh kɪ wekì névi nê tyí té à pɔrı tẽ, ñmɔ-á. Nkě pè à tẽ.

49 Té nùkú nɔ de Yesule té ne, kwó-ò dí, páh n wekì ñ tyí! Té à pɔrı tẽ.

50 Yesu me yo ñ tyí ne: «N kódí, wáh pɔ nê pí-ńsah, kè pi.» Képah sɔkɔ, no nópi nùkú nɔ de Yesule à à tẽ.

51 Képah tẽne, nónó-á sò me Yesule, pé sɔkɔ yó nùkú ñ kèkírki yɔrı de à sárká syínwìlkìpu yòtẽ ñgbẽ tònpi níki kò kām.

52 Nte Yesu me yo ñ tyí ne: «Á kèkírki dyi ké gbô sɔkɔ. Yah, nónó pól-á málle n pi kèkírne, kèkírń ye kɪ ko mɔ péle.

53 Á náh pĩ ne ñmɔ-á kɪ sò fẽ yo mɔ ní Sú tyí, à kɪ yínyò tònpi kèyò náhnáh tekì mɔ ní kò nénpó swɔ, sè kɪ pɔ ní yohni mɔ di?

54 Nte kàh pi sě, Liyel wey sébéy sɔkɔ tyi wárkínsàhnó kɪ wìl dùkù nêne? Kè mó tɔ me kè yo sah ne sê-á kè yĩne kè pi.»

55 Képah náh, té yo nékwíńkí nópi tyí ne: «Yé pɔ ñmɔ tẽ-ńsah kèkírń ànê ísnine yé tyí, á kɪ ne kèlékě névi sò íne. Nte swɔ swɔ pólle, mé sò ñkěne ne n me kòntěńóle Liyel ní-ńsah gbô sɔkɔ ñ kwónóle n pi, té yé náh ní tẽ.

56 Nte Liyel tẽntò syínyopu tyi wárkínsàhnó

wil yīn ye tyi nópi pól kǒ sè pɪ.» Wǎh képah yo, n̄ tò sáhpú pól to karkɪ té à sah.

Yesu tēnkyinɔle Nsyifunɔ tukey tükèpu t̄inkì tyí

⁵⁷ Nónó-á tē Yesule, pè yuku n̄ne sárká syínwilk̄ipu yǒtē ñgbē Kayifi t̄inne, n̄yāh sɔkɔ-á Liyel tyi k̄onsàhnó kwópú ànê yèwàhnì sò me wē tuke mɔ.

⁵⁸ Pɛɛɪ sò me Yesu sò tē n kɔ fíí n̄ne, pópó à kyɪ yīni tē sárká syínwilk̄ipu yǒtē ñgbē gbô tyí. Té de yuku à kyɪ kǒ tē t̄onpɪbɪ tnô, té n yah yī mē-á kɪ pɔ n syi n pi òkù n̄ne.

⁵⁹ Sárká syínwilk̄ipu yǒtām ànê pé no tukey tükèpu t̄inkì pól sò me n yah n kǒ ne, t̄arfɔ̀nó yísyó wɛ, nónó-á kɪ mìnì wɛ n yo n sah Yesu yǒ, pé mó à wɛ n ko n mɔ.

⁶⁰ T̄arfɔ̀ m̀inyobe náhnáh sénsɔ pɔ mìnì yo sah n̄ yǒ, n̄te pè náh tir yó wɛ wǎh yīne à ko mɔ nê yīnne. Ké tyé-ńsah sɔkɔ, díbí nép̄í ními wil yīn

⁶¹ té ne n̄kē, dí mē-á yo ne páh kɪ fē Liyel ní-ńsah wòkò kètār sɔ té kɪ kè t̄ɔ mɔ sèp̄in t̄onì wró.

⁶² Képah sɔkɔ, sárká syínwilk̄ipu yǒtē ñgbē yuku yīn té yo Yesu tyí ne, no nópi-á tyi nónoné n yo n̄ tyí sɔkɔ, tyíyóné kó me ñmɔ tyí sépi tyí sɔkɔ n̄?

⁶³ N̄te Yesu náh dahbɪ wilki. Képah tēne, sárká syínwilk̄ipu yǒtē ñgbē me yo n̄ tyí ne, min

nétě Liyel yīn yō, à yo pé syah ñmɔ-à kɪ nê Liyel ney yáhntɔkɔnɔle, nê-á ñ Pídíne.

⁶⁴ Yesu me yo ñ tyí ne: «Áwɔ ye yo kéle. Té mé kéle n yo yé tyí, à tɔkɔ núkúnúkú tyí, yé kɪ Névi Pídí we kǒntěńóle tyi pól tyí tẽnwe-ò Liyel gbòyò sòle. Yé kɪ à we tɔle à kɪ me n pi nýîrn sɔkɔ.»

⁶⁵ Képah tẽnne, sárká syínwìlkìpu yǒtě ñgbě ñ gblǒy flo yɔrɪ tɔkɪ té ne, wǎh yo de Liyel tyí. Tàrfyò nê tě se tǒ pé kɪ n yah n kǒ nɪ? Pè kó ñ Liyel tyí yóndenɔ noh nɪ?

⁶⁶ Pépi se me n sǒ sǒ nɪ? Pè me yo ñ tyí ne, wǎh yīne kònmɔnɔle.

⁶⁷ Képah tẽnne, té tyah n sīn n mɔ ñ yah sɔkɔ, té ñne n syɪkɪ gbònkukele, té tókù mó me ñ létáhlólé n kǒlɪ

⁶⁸ té me n yo ñ tyí ne, ñmɔ-à kɪ nê Liyel ney yáhntɔkɔnɔle, à sǎh pǐ yo pé syah nê-á n ko ñne.

Pyeri-á ñ vyǎh kǒlɪ sǒ ne pé náh Yesu pǐ

⁶⁹ Pyeri sǒ me kǒntěńóle gbô táh. Tǒnpi pi yó me nɔ de ñ tnô té yo ñ tyí ne, ñmɔ tɔ-á sǒ me Yesule, nê-á Kalile neyne.

⁷⁰ Nte à me kè kǒlɪ no pól yǐ yah ne, pé náh me ñ wey mè tyí yah we yò dé.

⁷¹ Képah náh, Pyeri sɔkɔ gbô yah tǐnne. Tǒnpi pi yó-á tǒ à we, nónó-á sǒ me néńpó, à yo pé tyí ne, dí mè tɔ-á sǒ me Yesule, nê-á Nasareti neyne.

⁷² Pyeri tǒ kè kǒlɪ à ñ wo ne, pé náh dí mène n pne dé.

⁷³ Dǒ kwéy, nónó-á sǒ me nénpó pépi nɔ de Pyerile té yo ò tyí ne, kègbi yǒ, no nǒpi sɔko yó-á ò tɔle. N wey òkù-á me kéle n wèki dò.

⁷⁴ Képah sɔko Pyeri tyah ò gblǒyne n wo pélpèl ne, pé náh dí mè pǐ. Nénpó swɔ sénpe yó núkú gbo.

⁷⁵ Légbíne, Pyeri dyɔ to kǒ Yesu wey mène, wǎh sǒ nê yo ne òkè: «Sénpe-à ki pópó n gbo, á ki me á vyǎh kǒli te ke tǒnó ne á náh òmɔ pǐ.» Képah sɔko, Pyeri wil kégbó à kyi kah gbo.

27

Yesu tǎnyukunɔle Pilati tǐnne

¹ Séngbǒ púpúle, sárká syínwǐlkǐpu yǒtǎm pól ànê kwil yèwǎhni pól yo sah núkú yǒ ne Yesu-á yǐne à ko mɔ.

² Té me à tǎ pukubi, té kyi òne kwǐltǎm yǒtǎ Pilati gbǒ dahbi.

Nsyudasí kúnóle

³ Képah sɔko, Nsyudasí nê-á sǒ pi pé kǒ pé Yesu we tǎ, wǎh pɔ ò kònmɔnɔ tyí we kè yǐ tǎ, kè à kah fyǎh. A me pó pló yǒgbǎm nǒpi tɔko kyi ne pé sárká syínwǐlkǐpu yǒtǎm ànê kwil yèwǎhni kǒ.

⁴ Té yo pé tyí ne, páh tyípékè pi lékàh ké névi múnóle kǐ sɔko. Nte pé me à syah ne, pépi tir nê se me képah sɔko ni? Képah-á me òmɔle n yah kè.

⁵ Képah soko, Nsyudası pó m̀è milki Liyel ní-ńsah wòkò kètár soko, té wil soko à kyı ñ gblóy gbel.

⁶ Sárká syínwilkıpu yòtãm me pó m̀è toko té ne ńkě, kè náh yıne dahnmonole Liyel ní-ńsah gbô pó soko. Névi tó-á kı n kwe n pi ké tyı soko.

⁷ Képah tēne, pè yo sah núkú yó, té pó m̀ene pnı mó-ò dí yó swāh dwe à pi népān lékyı yı-ńsahle.

⁸ Képah ye, fóó à pɔ syı kwey m̀è tyı, swāh m̀è me n ye tó swāhle.

⁹ Képah soko, Liyel tēntò syınyo-ò Nsyeremi-á lésò nê yo sah, kè wil. A lésò ne ńkě: «Pè ye pó pló yōgbām toko, Yisrayel no-á ne dan nê-á yıne kónóle ñ tyı soko.

¹⁰ Té kyı séle pnı mó-ò dí swāh dwe, à yıne Tē ñgbě Liyel-á kè yo sǒ ń tyı.»*

Pilati me Yesule n piki n yah

¹¹ Pāh Yesu tē kyı kwiltām yòtē dí Pilati tyı, à me Yesu piki yah ne ñmɔ se Nsyifunɔ yòtēne díne ni? Yesu me yo ñ tyı ne: «Áwɔ ye yo kéle.»

¹² Nte sárká syínwilkıpu yòtãm ànê kwil yèwāhni sò me tyile n yo n sah ñ yó. Nte à náh dahbı wilki pé tyı sépi tyı soko.

¹³ Képah soko, Pilati me yo ñ tyı ne, pāh tyi nónó pólle n yo n sah ñ yó, à kó me séle n nohni ni?

* **27:10** 27.9 Yah n te Nsakari 11.12-13 ànê Nsyeremi 18.2-3 ; 19.1-2 ; 32.6-15.

14 Nte Yesu náh dahbi wilki n tyí pólle. Káh pi sě, kè n gbân kah du.

Pilati Yesu kònmɔɔ wěki kɔ

15 Yimeyí Paki syáh sɔkɔ, kwiltām yòtě níkěne wòkònpèkè sɔkɔ nénúkù yó fin n mɔ, tówû-à nê yah wilki.

16 Té légbíne dí yó sò me wòkònpèkè sɔkɔ, nê yínpèkè-á wil yíí náhnáh. N yín ye sò Barabasile.

17 Képah těne, tówû nê-á sò me tükènmɔɔle, kwiltām yòtě dí Pilati me pépi piki yah ne, pè se me ké tyí ne pé nê fin mɔ pè kɔ ni? Barabasi se, tí Yesu nê-á pè n ye Liyel ney yáhntòkòɔle, ñmɔ se?

18 Yé náh we di, Pilati sò pĩ ne Yesu yíngbí wílnó-á n yo péle pè kɔ pè à dahbi péwɔ gbò sɔkɔ.

19 Té wáh me ténóle tukey tükè-ñsah sɔkɔ, n kyi těntò mɔ n tyí ne, lékàh ké dí mè tyí dlénpèl-á pé kwɔ kwey lékâhne. A káh n vyâh dahbi n tyí sɔkɔ dé.

20 Nte sárká syínwìlkìpu yòtām ànê kwil yèwàhni me tówû kurki mɔ ne, pè yo Pilati tyí à Barabasi fin mɔ, à mó Yesu ko mɔ.

21 Kwiltām yòtě dí Pilati me tɔ pè piki yah ne, pè se me ké tyí ne pé nê tě fin mɔ pè kɔ nɛpí ní mí nópi sɔkɔ ni? Pè me ne Barabasi-á.

22 Pilati me ne, nte Yesu nê-á pè n ye Liyel ney yáhntòkòɔle, pé se ki pi sò ñmɔle ni? Pé pól me ne wáh yíne à syi dahni yó.

23 A me pè piki yah ne, nte tyítúkù nê ó se à pɪ nɪ? Nte pè tɔ kah yo mo wòhòh ne, wǎh yĩne à syɪ dahnɪ yõ.

24 Pilati-á po kè pĩ ne pé náh me fẽ tir yóle n pekɪ ké sɔkɔ, té névye-á mó tɔ me n tyah tyah fẽkìnóle, à ni tokɔ à n gbǎn wu tówú yí yah té ne, péwo vyǎh náh me dí mè kònmɔnɔ tyí sɔkɔ. Kǎh pé tyí kè.

25 No pól me ne, n kònmɔnɔ plo pɪ pépi ànê pé wěnpì tyíle wé!

26 Képah sɔkɔ, Pilati me Barabasɪ fin mo pé kɔ. Té sràsyíbí kɔ pé Yesu ko yèfòhle, té n gbàh de mo pé kɔ ne pé à syɪ dahnɪ yõ.

Sràsyíbí-á kóle Yesu ko dùkù nêne

27 Képah tẽne, kwíltám yòtẽ dí Pilati sràsyíbí me Yesu tẽ de tɔrí gbô sɔkɔ, té pé no sràsyíbí pól ye po à mo gbí.

28 Pè me n flo de n wil sɔkɔ, té fwòmònsǎh ñgbě yó mo à kɔ.

29 Té pǎn yòkɔ pɪ dyɪ à kɔ tɔrí yókúrí swɔ, té lépéy yóle à kɔ à tẽ yĩn n gbòyò sɔkɔ. Té gbètukunɔ di n yah sɔkɔ à kóle ñne n ko me yo tũ ne, Nsyifunɔ yòtẽ dí, páh n wekɪ n tyí.

30 Té n sɪn n mo n yõ, té lépéy mè syɪ à ñne n mɪkɪ n yõ sɔkɔ.

31 Pǎh kóle à ko te, pé fwòmò-ñgbě mè de n tyí té n flo tɔ mo à kɔ, té à tẽ n yuku syí-ńsah dahnɪ yõ.

Yesu syínóle dahnɪ yõ

32 Pǎh kyɪ n wil kwil sɔkɔ, pè Sireni kwil dí yó yohni pè n ye Simole. Sràsyíbí me ñmɔ kyĩ mɔ à kǔ à Yesu syɪ syɪ dahnɪ twah.

33 Pǎh kyɪ yĩni tẽ tyah yó sɔkɔ, pè n ye Kɔlkotale, nê kór-á Yògbèkè tyahle,

34 pè wil yónó kèkô kwâh yó fěki mɔ ðivě sɔkɔ Yesu kǔ ne à wɔ. Wǎh kè wɔ yah, à kè yahle.

35 Képah náh, pè à syɪ dahnɪ yó. Pǎh à syɪ te, pè ñdan mɔ à ñ flo dibi pé wě wró.

36 Té me kǔ tẽ nénpó à ñne n syɪki ne ney káh pɔ à pwah mɔ.

37 Yó nê yó-á pè syɪ ñne, pè sò me kè wǎrki syɪ sah ñ yòtah sɔkɔ ne ñkě: «Yesu ye yó, nê-á Nsyifuno yòt̃ne.»

38 Kèlékě pípú népí ními yísyó tɔ sò me syínóle dahlo yó ñ tnô. Núkú sò me ñ gbòyò sòle, ní-ò me ñ gběỹnè sòle.

39 Wěkɔbi nónó-à ko pɔ n sɔkɔ, pè pé ywǔle n mɔ ñ té ñne n gbyɔ

40 ne ñkě, ñmɔ nê-á sò ne páh ki Liyel ní-nsah wòkò kètǎr sɔ, té ki fě kè tǔ mɔ sèp̃in tǔnì wró, ñkě Liyel Pídí-à ki nê ñne, à ñ gblóy pwah mɔ. A tiki n to dahnɪ yó kè.

41 Sě ye, sárká syínwilkipu yòt̃am ànê Moyisi tyi kònsàhnó kwópú, ànê kwil yèwàhnì tɔ sò me kóle ñne n ko me yo tũ ne,

42 wǎh túkú pwah mɔ, té ki tẽ ñ gblóy wɔ pwah mɔ kwɔ nɪ? Yisrayel yòt̃ tẽ-à ki nê ñne, à tiki n to dahnɪ yó núkúnúkú, pé mó sě ñ yó kè.

43 A kó ò sǒnǒ sah Liyel yǒ, té kè yo òtǎne ne ò Pídí-á péle ni? Ñ tyí-à kɪ me nǒ Liyel tyí, à à pwah mǒ núkúnúkú wé.

44 Kèlékě pípú nónó tǒ-á sǒ syínóle ò tnô, pépi tǒ sǒ me òne n gbyǒ sǎntě óle.

Yesu kúnóle

45 Ghĩ-á me yǒtah sírr sǒkǒ, fǎntú mǒ kèkǒyǒ pól sǒkǒ, pópó à pǒ nǒ lérínó tǒnó tyí.

46 Lérínó tǒnó nǒpi-á sǒkǒ, Yesu kah yo yǐnpǒ ògbǎne ne: «Yeli, Yeli, lama sabakɪtani?» Nê kór-á: Nmǒ Liyel, òmǒ Liyel, kwâh nê pi té á ò fin mǒ?

47 Nónó-á sǒ me nénpó, pé túkù-á ò yónmǒnǒ mè noh, pé ne òkě, wǎh me Yelile n ye n yah oo!

48 Nénpó swǒ, pé sǒkǒ yó tǒ kyɪ sènsúkúrí tǒkǒ fǒ yǒyǒkè ni sǒkǒ, à dyɪ mǒ gbey yó vyǎh tyí, té kè nǒ ò tyí ne à wǒ.

49 Pé tǎlǒ mó me yo tũ ne òkě, pé ye yǐn sǒ, Yeli mó pǒ à pwah mǒ pé yah ǎtre.

50 Nte Yesu me tǒ kah de syi té yah kwǒ.

51 Képah tǎne, fwǒ nê-á dyɪnmǒnkàhsàhnóle Liyel ní-ńsah wǒkò kètǎr sǒkǒ, kè tǒ tǒlǒ nínó à tǒkǒ ké yǒtah tyí, à kyɪ dal mǒ ké sètǎhkì sǒ tyí. Té sètǎh me syah, légbýǒ gboke,

52 léyâl yɪkɪ mǒ, Liyel yǒ sǎpú nónó-á sǒ ku sǒkǒ te, pé náhnáh lékyî me yilki mǒ.

53 Képah náh, té me wil léyâl sǒkǒ Yesu lékó yilkinmǒntenǒ náh, té de Yerusalemɪ kwil sǒkǒ Liyel-á képah nê yah tǒkǒ. Névyè náhnáh yí tǎ pé yǒ.

54 Sràsyíbí yòtḗ dí ànê nónó tɔ-á sò me Yesule n syki ònne, pépi-á sétáh syahrí mè we à tahlí tyí nónó tɔ-á pí, tíkí pè kah tḗ. Pè me ne ríkḗ: «Kègbí yò, dí mènne, Liyel Pídí ye sò ònne.»

55 Té syó náhnáh tɔ sò me yīn tḗ fí té me n yah. Kalile duku sɔkɔ ye kéné syó Yesu sò tḗ, à n yah n dah n mɔ ò tyí sɔkɔ.

56 Makadala kwil Mari sò me pé sɔkɔ, à tahlí Nsyaki ànê Nsyosefu yú Mari tyí, ànê Nsebede dínpì yūne.

Yesu lékó yínóle

57 Nv́-á pɔ nɔ, tàh dí yó pɔ de, nê-á sò n wil Arimatí kwil sɔkɔ. Kéné dí yīn ye Nsyosefulé. Yesu tò sáh-ò ye sò ò tɔle.

58 Nmɔ me kyí wil Pilati tyí, à Yesu lékó ni ò tyí. A me ne pè ònne à kṵ.

59 Páh ké wḗkìle à kṵ, à me ò lékó tɔkɔ té à plo fwo gbró snóle.

60 Nsyosefu-á sò pè kṵ pè diki sán nê tū sah ò yḗngbḗ tyíle tekí sɔkɔ, à kyí à dah mɔ képah sɔkɔ. Képah sɔkɔ, té dáh-ḡgbḗ yó pil pɔ ké yah vike té sɔkɔ.

61 Té légbíne, Makadala kwil Mari ànê ò ní-ò Mari sò me kṵntḗnóle nénpó sɔkɔ diki yah yèsreyne.

62 Té kéné yòh sònó ye ríkḗne pḗ péle n vi n sah pé mɔ mɔ yòh sò yīnne. Ké dīndalle, sárká syínwilkípú yòtām ànê Farisi wḗkì kópú me wḗ sò tḗ kyí wil Pilati tyí,

⁶³ té yo òn tyí ne, pé yòtḗ, pé dyo-á to kō ne, kéné névye pílkí-ò-á lésō me kè yo sah òn kú-ńkḗ soko ne, pāh pō ku, ké sèpìn tṣ-ò sōle, pé lékó-á kɪ yilki mō.

⁶⁴ Képah yīnne, ńkḗ à sràsyíbí kō pè diki syɪkɪ pō nō sèpìn tṣnì tyí. Képah-à pí-ńkḗne, ò tṣ sáh-pú-á kɪ n syah n pō òn lékóle n yī n wilki, té kɪ névye syah ne òn lékó-á yilki mō. Képah tḗ-á kɪ tṣ névye pilki kal ghen tḗne.

⁶⁵ Pilati me yo pé tyí ne, tyah syíkí-pú-á yò. Nkḗ pè kyɪ diki mēne n syɪkɪ pāh me ké tyí sō.

⁶⁶ Pè me soko à kyɪ diki yah dáhkì mè pōko mō, té tyah syíkí-pú kō pè kéle n syɪkɪ.

28

Yesu lékó yílkinmōnole

¹ Mɪ mɪ yòh-á soko, dimansyi sō séngbṣ púsóle, Makadala kwil Mari ànê òn ní-ò Mari kyɪ diki yō.

² Nén-pó swō, sétáh syahrɪ òngbḗ pɪ. Tḗ òngbḗ Liyel yīnyō tōnpɪ yó me tiki pō dáh-òngbḗ mè pil to diki yah, té kō tḗ ké yō.

³ A sō me n kō kyòo pṣ sō yīkiri, té òn flō me píkinóle préyy.

⁴ Tíkí ànê wilsyahrɪ tḗ tyí, tyah syíkí-pú markɪ.

⁵ Képah soko, yīnyō tōnpɪ me yo syó tyí ne: «Yé káh tíkí pɪ. Mé pī ne Yesu-á yé n yah n kō, pāh nê syɪ dahɪ yō.

⁶ A náh me ásô, ñ lékó yilki mo à yĩne wăh lésô kè yo sah sô. Yé po n yah ñ snékínmo-ńsahle,

⁷ yè mó n kyi kè yo súú ñ tò sáhpú tyí ne, ñ lékó-á yilki mo. Té wăh mo pé yahle Kalile mara sokó. Păh ki kyi à we nénpó. Nê-á sô me ní tyí yo yo tēne yé tyí, kėpah ye yò.»

⁸ Pè me yal súú nénpó sokó, tíkile pé sokó nìvìnì ñgbē tole fĕkìnmōnole ké sokó, à n to n yuku yĩ mè yáh-ńsah Yesu tò sáhpú tyí.

⁹ Nénpó swó, Yesu núkú pé yohni té ne: «Mé n wėki yé tyí.» Syó nópi me no de ñne, té ñ gbyêh tē à gbilkínó sah ñ yō.

¹⁰ Kėpah sokó, Yesu me yo pé tyí ne: «Yé káh tíkile n pi. Yé kyi n yo ní yúnpyé tyí ne, pé yuku Kalile mara sokó. Nénpó sokó ye pé ki we ñne.»

Tyah syíkípu tyípínine

¹¹ Syó nópi-á me wĕkì yō gbí nēne, tyi nóno pól-á pi, sràsyíbi nóno-á sô n syiki diki mēne, pé tükù po kwil sokó, à po sè yo sárká syínwilkipu yõtām syah.

¹² Kėpah sokó, sárká syínwilkipu yõtām nópi ànê kwil yewăhnì wĕ tuke mo à yo sah núkú yō, té pó-ñgbē yóle sràsyíbi kō,

¹³ té pé syah ne pàh ki pi pé yo ne, ñ tò sáhpú-á po ñ lékó yĩ wilki lékâhne té pé sah doy sokó.

¹⁴ Kwiltām yõtē dí-à ki sô kè noh, pépi-á ki kè niri pé kō pé náh yótír we n pi ké sokó pólle.

¹⁵ Tyah syíkípu mó pó mè syi té kè pi pé yóré yõ. Képah tēne, yī mè tō mō Nsyifunō niyó, fóó à pō syi kwey mè tyí.

Yesu wénóle ò tō sáhpú tyí ò lékó yílkínmōnteno náh

¹⁶ Yesu tō sáhpú népî gbõnúkú me soko Kalile mara yõli yõ, wăh lésõ nyāh tyí yo sah pé tyí.

¹⁷ Păh kyi à we, pé à gbilki, òte pé tókù sò me tòtòle n pi ò tyí soko.

¹⁸ Yesu me nō de pé tnô té yo pé tyí ne:
«Yõtōrí pól ye nmo gbõ dahbi yinyõ ànê sétáh yõ soko.

¹⁹ Yé kyi kwlo kwlo pól névye pi nmo tō sáhpúle, yè mó pé wel n wilki ni soko Sú Liyel, ànê Pídí, ànê Liyel Mirki yīn yõ.

²⁰ Máh tyi nónó kō sah yé kō, yè mó pé kwo séle pé kō pé séle n pi. Té nmo ki me yéle sōmesó, fóó ki kyi syi kèkōyó tyénó tyí.»

CXXX

Toussian, Southern
The New Testament in the Southern Toussian
language of Burkina Faso: toussian du sud: wĩn
nìvìnì tirlɛ New Testament
Nouveau Testament en toussian

copyright © 2013 Wycliffe Bible Translators, Inc. in cooperation with
ANTBA

Language: Southern Toussian (Toussian, Southern)

Contributor: Wycliffe Bible Translators, Inc.

All rights reserved.

2025-07-09

PDF generated using Haiola and XeLaTeX on 11 Mar 2026 from source
files dated 9 Jul 2025

aaf2875e-90b5-5c14-b910-61579d3da2c7